

SAN JUAN

Jaayhui'my Jadu'n Nej Jesucristo Ytun Yjajti

**Dios y'ung huidibi y'oy ya
naaxhuiñ yejci Dios y'ayuc tiy'ajt**

1 Co naaxhuiñybi oga'n chondacy jiiyim anajty Dios y'ung, e yi' yajnejhuiñy jäy ajcxy Dios y'ayuc ytiy'ajt. Dios y'ung tú'ciy anajty yajpaady ma Dios. ²Je' tim oga'n'aty anajty yajpatp ma Dios. ³Tüg'óciy huidijaty yaj'ijxp yajpatp ya naaxhuiñ, yi' yaj'oyiyday yajcojtay. Tüg'óciy huidijaty Dios yajcojy, tú'ciy ytuñ miid y'ung. ⁴Dios y'ung yi' jugy'ajtyejctaayb ma tüg'óciy naaxhuiñyjäy. Miid co jugy'ajtyejctäy ma tüg'óciy naaxhuiñyjäy, je' je' tiy'ajt co Dios y'ung ymiid Dios ymic'ajt. Jadu'n nipaady nej tüg jiin huidibi jäy codiicxp. ⁵Ya naaxhuiñ yajpaady anii. Yi anii jadu'n yi' nej coodzipi. Yi Dios y'ung ti mimiñ ya naaxhuiñ Dios y'ayuc ytiy'ajt. Jadu'n Dios y'ayuc ytiy'ajt ma jäy yjot yhuinma'n nej tüg jiin ytiicxy agoodztuuyb. Yi anii ca' ñaygodigiyii miid Dios ytiy'ajt. ⁶Ma'xung'ajt tüg yëydijc huidibi Dios anajty ti yajni'bicy. Hue' anajty yxii Juan. ⁷Yi' oga'n tiy'ajt yejco

Dios ymic'ajt etz ytiy'ajt yajpaady ma Dios y'ung, jigix tüg'óciy je jäy ajcxy camibijctähuipy je Dios y'ung. Dios y'ung jadu'n nipaady nej tüg jiin huidibi codiicxp ma jäy ytüyöy. ⁸Je Juan ca' je' anajty yjëjity je Cristo, je huidibi capxhuäcxp Dios y'ayuc ytiy'ajt. Hue' janchtiy je Juan ñidiy'ajt'ajt je Cristo. ⁹Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytiy'ajt ymiid, je janchypi, ma jëb tüg'óciy jäy ya naaxhuiñ patcixy Dios ytiy'ajt.

¹⁰Je Dios y'ung ya anajty yhuidity naaxhuiñygi'xy. E jada naaxhuiñ yi' yaj'oyiyday. E may je naaxhuiñyjäy ca' ajcxy ijxcajpy. ¹¹Je ymigügtijc, je judiojäy, je' ajcxy nimiini, e may ajcxy je ymigügtijc ca' ajcxy ycöbijci. ¹²Tüg'óciy je jäy ajcxy pinjaty mijpidac yi' yxi' yi' ymic'ajt, yi' ajcxy yajmoy Dios ymic'ajt, e jadu'n nipaty nejjihuüy ajcxy Dios y'ung'adyii. ¹³Canan hue' je' co naydijiiyb Dios y'ung co ti yma'xung'aty jadu'n nej jäy ajcxy y'ocma'xung'aty. Nañ ni ca' yjadu'nity nej jäy tijy, nej jäy jijp'ixy, ni canan jäy jadu'n ti

huinmay. Hue' janchtiy Dios jadu'n ti huinmay.

¹⁴Je Dios y'ung ya naaxhuiñ je' yma'xung'ajty miid ñin'cx etz chinay miid naaxhuiñjy. E iich ajcxy n'ijxich yi' y'oy'ajt etz ymic'ajt, jadu'n nej Dios Teedy y'ung tügpajc oy'ajt etz mic'ajt miidity. ¹⁵Juan ñidiy'ajt'ajt je Dios y'ung, e chi capxypidzimy, e jadu'n yminañ:

—Jada je' je jäy huidibi iich jadu'n nimiyaacich ma miich ajcxy. Je huidibi miimb jac'axam ma iich, jac mic'ajt miid yi' ca'ydi iich, com jacjayijp yi' jugy'ajt paty ca'ydi iich.

¹⁶Je Dios y'ung oy xychojcin xyjihuiyim mijcjee, paady je' tuuñ may'ajt oy'ajt mijcjee miid iich ajt ycixpi. ¹⁷Com Dios y'ané'min ycötujcin micpi hue' Dios yajniguejx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ miid je jäy ajcxy ycixpi, e nañ je' ytiy'ajt yajniguejx je Jesucristo. ¹⁸Je Dios ni caminaabi pin ca'ixyñi, je y'ung tügpajci yajpatp ma Dios Teedy ity. Je Dios y'ung ti xyajnejhuiyim nej Dios yajpaady.

**Juan el Bautista je' tiy'ajt yejc
co Jesús je' anajty Dios y'ung**

¹⁹Jadaabi je' je tiy'ajt huidibi Juan yejc, co judío jäy ajcxy quejxy nijjity teedytije etz tzajptije tungmiidpi. Jim ajcxy choon Jerusalén nicxy ma anajty Juan yajpaady, chi ajcxy y'amidooy:
—¿Mbin miich? ¿Nej miich je' je Cristo huidibi Dios yquexamy?

²⁰Je' ñigapx je tiy'ajt, ca' ñaygoyützi, chi yminañ:

—Ca' iich njjity je Cristo.

²¹Chi ajcxy jac'amidooy:

—¿E pin miich mnaydijyii? Pen ca' mjējity je Cristo. ¿Nej miich je' je Elías?

Chi Juan y'adzooy:

—Ca' je' n'iichity.

Chi ajcxy jac'amidooy:

—¿Nej miich je' je Dios y'ayuccapxhuäcxpi, je huidibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

²²Chi y'amidooy ajcxy jadüg'oc:

—¿Mbin miich? Jigix iich ajcxy tiy'ajt nyajñicxibich ma yi tiibi iich ajcxy xyquexyich. ¿Ti miich nayxiigoyäxyii?

²³Chi Juan yminañ:

—Iich je' je jäy huidibi Dios y'ayuccapxhuäcxip ma tüg mijtigäduum, tim jadu'n nej jiiby jaybety ymiñ ma Isaías ñecy, nañ tim jadu'n iich nminañiich co copicy nayñi'ixäiyigix ma yi mjot yi mhuinmañ, jēbi naybaatigixy miid mHuindzin Dios. Jadu'n nej jäy ixypy tü'aa yaj'oyiy co tüg huindzin ymiinañ.

²⁴Je teedytije etz tzajptije tungmiidpi huidibi oy migapxy Juan, hue' anajty ajcxy fariseojäy ti yquexyii. ²⁵Chi ajcxy jactim'amidooy Juan:

—¿Ti miich co mjäyyajniibety? Peni ca' miich mjējity je Cristo, ni mgajējity je Elías, ni mgajējity huidibi Dios y'ayuc najtcapxiyip.

²⁶⁻²⁷Chi Juan y'adzooy:

—Iich hue' jäy nyajniibetyich miid nii. Ya naaxhuiñ ji tüg jäy huidibi miich ajcxy ca' m'ixy'adyii. Je' huidibi jac'axam mimb ma iich,

je huidibi ca' mihuaadity nicxy
yi' xytumbi'adyiijich, nicxyich
ycighuin nguejich.

²⁸Jadu'n ytuni yajti jim Betábara,
jim'amy ahuin ma Jordán mij
nii, jim anajty Juan jäy yajniibety.
Juan tiy'ajt yejc co Jesús je' anajty
yjygy'ajt yegam miid iich ajt nbocy
ycixpi.

**Jesús nayyajhuindzigihuaanip ma
Dios miid jäy ajcxy ypocy ycixpi**

²⁹Chi je com jabom co ijxy Jesús
anajty ñimiñyii, chi Juan nimay je
jäy ajcxy:

—Cha je' ymiñ je Dios yjäy huidibi
Dios nayyajhuindzigihuaanip miid
naaxhuiñyjäy ajcxy ypocy ycixpi.
Tim jadu'n nej judíojäy ajcxy Dios
huindzigäy miid ypocy ycixpi.

³⁰Jada je' huidibi iich nnigapxypich
co jac'axam ymiina'ñ ma iich tüg
yëydijc huidibi ñigi Dios ymic'ajt
y'oy'ajt miidity ca'ydi iich. Com
jiiyim anajty yi' yjugy'aty co
oga'n naaxhuiñybi chondacy. ³¹Oy
iich anajty ca' yi' n'ixy'adyiijich
huingíxy jįpcíxy, nyajniibejtich jäy,
jįgix yi judíojäy nejhuihuip ajcxy co
ji yajpaady je Cristo je huidibi Dios
ymic'ajt miid.

³²Chi Juan nigodiy'ajt'ajty je
Cristo co ymina'ñ:

—Iich ti n'ixyich yi Espíritu Santo
jiiby choñ tzajpjoty, jadu'n yquëxigy
nej tüg muuxy, e chi y'ixtacy ma
Jesucristo. ³³Tiydudägy ca' iich
anajty n'ixy'adyiijich. Je Dios
huidibi xyquejxich jäy yajniibejtpi,
je' iich anajty jadu'n ti xyñimäyich
co je jäy ma anajty n'ixyich je
Espíritu Santo ñigidägyii anajty etz
yhu'i'my ma je'. Je' je' jadu'n anajty

huidibi y'adigihuipy yjottigihuipy
Dios yjihui'ñ ymic'ajt ma je jäy
ajcxy. ³⁴Cham nnigapxepetyich co
iich ti n'ixyich je jäy, e nyejcpyich
tiy'ajt co je' je' je Dios y'ung.

**Jesús yhuin'ijx nijëjity jäy huidibi
anajty ydiscípulo'andaanipy**

³⁵Chi je com jabom jopy jim
anajty Juan yajpaady miid metz jäy
huidibi xpijcp ma yi'. ³⁶Chi anajty
ajcxy tzachhuindicxy Jesús co
anajty jim ñaxy, chi Juan nimay je
metzpi jäy:

—Oc'ijxcix ocnejhuiygix,
cha je jäy huidibi Dios
nayyajhuindzigihuaanip miid
naaxhuiñyjäy ypocy ycixpi.

³⁷E je metzpi jäy huidibi anajty
ajcxy xpijcp ma Juan, co jadu'n
ajcxy midoy nej Juan ymina'ñ, chi
ajcxy Jesús padzooñ. ³⁸Chi Jesús
y'ijxhuimbijty, chi ijxy co anajty
ajcxy ypanicxyii, chi jada' nimay
ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiyi ti mja'ttägy?

³⁹Chi Jesús y'adzooy:

—Miingix, jįgix ajcxy m'ixipy ma
ti nja'ttägyich.

Chi jada' ajcxy panicxy, e chi
ajcxy ijxy ma anajty ti yja'ttägy.
Je huin'it xiimbi chi jim je' miid
yhu'i'miy, com mijminacyxii anajty
co ajcxy jim ymejch.

⁴⁰Andrés, je Simón Pedro
ymiguëx, je' anajty tüg tzoonip
huidibi nimetz ajcxy midou jadu'n
nej Juan ymina'ñ, etz je' anajty
ajcxy ti padzooñ Jesús. ⁴¹Chi jada'
Andrés oy ixtäy y'uch Simón tim
jayjįp, chi nimay:

—Ti iich ajcxy nbaady je Mesías —jadu'n je ayuc Mesías yhuimbizima'n̄ Cristo.

⁴²Chi Andrés miidnicxy Simón ma Jesús, e chi Jesús huindixpejty, nimay:

—Miich je' Simón, Jonás miich xy'ung'ajtp. Miich je' mxii'adiyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³Chi com jabom Jesús choon̄ ñicxy jim Galilea, chi minaybaati Felipe, chi jadu'n nimay:

—Pajamgich.

⁴⁴Felipe jim anajty ycogajpity Betsaida, nañ je' je' je cajp ma anajty ajcxy ycogajpity Andrés etz Pedro. ⁴⁵Chi Felipe minaybaati je jäy huidibiyxii Natanael, chi jadu'n nimay:

—Ti iich ajcxy je' nbaadyich je jäy huidibi yajnigapxp yajnimyidacp ma Moisés ñecy, etz yi Dios y'ayucnajtzcaxiixi ñecy. Yi' je' je Jesús, José y'ung huidibi cogajpip jim Nazaret.

⁴⁶Chi Natanael y'adzohuimbijty: —¿Nej jim Nazaret ti choñ tüg oyjäy? Com ac jadu'n jäy ymina'n̄ co ac jibicjäydijc jim tzinaayb.

Chi Felipe yminañ:

—Jam ci'm octim'ix.

⁴⁷Co Jesús ijxy co Natanael ñimiñyii, chi jadu'n yminañ:

—Cha tüg judfojyäy huidibi ca' pin huin'iinipy.

⁴⁸Chi Natanael yminañ:

—¿Nej miich ti xy'ijxcapyich pin jäy iich?

Chi Jesús nimay Natanael:

—Ca'ni anajty Felipe xyñimaayñi: “Jam íxim je Jesús” co anajty miich

jiiiby'emy ma je higueri quipypa't, huin'it iich miich ti n'ijxcapy.

⁴⁹Chi Natanael y'adzooy:

—Huindzin, miich je' Dios y'ung. Miich je' Rey'adam ma je judfojyäy ajcxy.

⁵⁰Chi Jesús y'adzooy:

—Miid co ti nnimäy co jiiiby'emy anajty miich ma je higueri quipypa't co iich miich ti n'ijxcapy. ¿E ti mdimjanimibicy? Jactimmijhuinma'n̄ etz jactimmij'oy'ajt m'ixamyb mbadamyb.

⁵¹Chi Jesús jadu'n yminañ:

—Janch tim tiy iich miich ajcxy yam jadu'n nimäy co m'ixipy ajcxy yi tzajp y'ahuäch etz Dios y'áñgeles ajcxy choon̄ tzajpjoty xyñigidägyich, e ypa'ttigiiygixy jadüg'oc tzajpjoty. Choongixy yja'tcixy ma iich je jäy huidibi tzoon tzajpjoty.

Jesús y'oy ma anajty jäy nixiiduñ tüg pijcin jim Caná

2 Midugiigxiibi anajty maabi ajcxy Jesús minaymigápxigixy, ma je cajp huidibi yxii Caná ma je Galilea naaxjot jim anajty huinxiidungixy tüg jäy huidibi anajty ti ypicy. E jim anajty nañ jadu'n Jesús ytaj. ²Chi Jesús miid je' ydiscípulos ajcxy yajhuooy jim ma je xii anajty ytuñyii yjadyii. ³Ti anajty vino ycijxtaayñi, huin'it Jesús ytaj ñimayñi:

—Ca'p ajcxy miidiñ vino.

⁴Chi Jesús y'adzooy ytaj nimay:

—Ca' ti jotmay nmiididyich miid miich töxyäy. Iich nhorí ca'ni paady mina jäy ajcxy nyajnejhuñhuibich pin iich.

⁵Chi je ytaj nimay je tumbidijc ajcxy:

—Mdúngxixipy nej anajty ajcxy Jesús xyñimaaygixy.

⁶Jim anajty tudujc tzaadu'tz ma anajty nii y'ity. Je nii anajty ajcxy yajtumyb co anajty ajcxy ycibujcixy judu'n nej ypocy ixpujcixy, judu'n anajty ajcxy judíojaý costumbre miidity. Tügpi tzaadu'tz ymiid anajty yjot metz majt tugiig majt nii. ⁷Chi Jesús nimay je tumbidijc ajcxy:

—Yaj'ujtcix yi tzaadu'tz miid nii.

E chi ajcxy yaj'ujtciz mabaat y'a'ujtcizaxy je tzaadu'tz. ⁸Chi Jesús yminañ:

—Yajpidzimgix cham yi nii, e yajnicxcix jiiby ma huidibi ane'mb ma yi caydac uuctac.

Chi ajcxy yajnicxy je nii. ⁹Co jada' je ane'mbi jihuiymajch je nii ti anajty yvinocojy, chi mijhuoy je yëydijc huidibi anajty ti ypicy. Je ane'mbi ca' anajty nejhuüy ma anajty je vino ti choñ. Jëyi anajty je ytumbidijc ñejhuiyb co nii anajty ajcxy yajpidzimgixy ma je tzaadu'tz. ¹⁰Chi je ane'mbi nimay je huidibi anajty ti ypicy:

—Tüg'óciy jäy ajcxy huidibi xiidumb, hue' ajcxy yajtumyb jayijp je vino oybi. E co jäy ajcxy ooy yxondaacni, chi oyñihuidibi vino nii jacyajtungixy. Miich janchtiy, ti m'amay'aty yi vinonii oybi ixti chamni myajtuñ.

¹¹Je' je' je oga'nibi mijhuinmañ huidibi Jesús ytuun jim Caná ma Galilea ñaaxjot. Chi yajniguëxigy je ymic'ajt etz y'oyjäy'ajt. E je huidibi anajty ajcxy yaj'ixpijcpy, chi ajcxy ooy mibijcy mijpidacy je Jesús.

¹²Co judu'n tüg'óciy ytuni yjajti, chi Jesús y'idacy jim ma je cajp huidi yxii Capernaum miid ytaj etz y'uch ajcxy, etz huidibi anajty yaj'ixpijcpy. Jim ajcxy yhuäcxijpy tüg xii mejtz xii.

Jesús yajpidzim ajuuybi adoocpi ma Dios ytijc

¹³Tim huingon anajty je pascua xii huidibi judío ajcxy ytumy jim Jerusalén, paady Jesús ñicxy jim.

¹⁴Jim ma Dios ytijc Jesús paty je' huidibi anajty ajcxy ajuuybi adoocpi, judu'n nej ma ymiin huaj, borregi, etz muuxy (huidibi jäy ajcxy Dios yajhuindzigiib). Nañ jim meenyhuingogombidijc anajty ajcxy y'ñaaygixy ma ymesa.

¹⁵Chi Jesús yaj'oyiyy tüg cochac huojp. E chi ixhuojppidzimday je ajuuybi adoocpi ajcxy ma Dios ytijc ñihuaj etz ñiborrego. Chi yi meenyhuingogombidijc ymeen cöxijtnajxtayi, e chi ymesa tijhuimbijttaayi. ¹⁶Chi nimay je muuxytoocpidijc ajcxy:

—Yajpidzimgix jada muuxy ya. Ca' iich nDeedy ytijc yhuaani ajcxy ajuydac adoocac.

¹⁷Je' ajcxy huidibi anajty Jesús yaj'ixpijcpy chi ajihuiygooti ajcxy je ayuc, judu'n nej jaybety ymiñ ma Dios ñecy: “Ooy ndzocy njihuiyich Dios ytijc, paady ooy nnijottigoyich Dios ytijc.”

¹⁸Chi je judío ixpicytijc ajcxy y'amidooy Jesús:

—¿Ti mijhuinmañ miich xy'ocyaj'ixambich ajcxy nej tüg ijpexjt, pen janch miidity cötujcin co m'ixhuojppidzimday yi ajuuybi adoocpi ajcxy?

¹⁹Chi Jesús y'adzooy:

—Yajhuindigooygix jada Dios ytiyc, e codugiig xii iich yi' jadüg'oc nyajpidigipy.

²⁰Chi jada' je judío ixpicytiyc ajcxy y'adzooy:

—Huixchigüipx tudujc jimijt yhuäcxijpy co jäy cojy jada Dios ytiyc. ¿E miich tiy myajpidigamy codugiigxiiji?

²¹Per ca' je' anajty nigapxy je Dios ytiyc. Hue' je' anajty ci'm ñayñigapxyii co anajty y'öga'n, etz co yjugypigipy jadüg'oc codugiig xii. ²²Chi jada' co Jesús yjugypijcy codugiig xii maabi anajty y'ögy, je huidibi anajty ajcxy ti yaj'ixpicy, ajihuiygooti ajcxy huidibi Jesús anajty ti yajnimäyigixy. Chi jada' ajcxy mibijcy ooy jadu'n nej anajty ycojaayity ma Dios ylibro, etz com nañ jadu'n anajty Jesús ti ymina'n.

**Jesús ñejhuiy nej jäy ajcxy
yjot yhuinma'n miidity**

²³Co anajty Jesús yjimity Jerusalén pascua xiijoty, mayjäy ooy ymibijci co ajcxy ijxy je mijhuinma'n huidibi anajty ytumyb.

²⁴Jesús ca' anajty yjaty ñaygyegyii ma je mayjäy ajcxy (hue' anajty ajcxy chachyajrey'adamy). ²⁵Com Jesús ñejhuiydaayb anajty nej jäy ajcxy nidüg nidüg yjot yhuinma'n miidity ca' tzocy pín yajnimähuiyb ti anajty ajcxy ytunamy, com ñejhuiydaayb nej jäy ajcxy yjot yhuinma'n miidity.

Nicodemo oy ytiy'ajtpicy ma Jesús

3 Jim anajty tüg yëdyjc, fariseojäy y'ixpijcin anajty yajtuunipy. Hue' anajty

yxii Nicodemo. Je' anajty ñigohuajc'ajtyp ma je judíojäy ajcxy ymiin. ²Chi jada' Nicodemo ymiin coodz ma Jesús anajty y'ity, chi nimay:

—Huindzin, nejhuiyb iich ajcxy co miich tüg huindzin huidibi tzomb ma Dios. Com ca' ni pín jaty nej tunipy je mijhuinma'n huidibi miich mdumyb, pen ca' Dios ymic'ajt miidity.

³Chi Jesús y'adzooy:

—Janch janch iich miich yam jadu'n nimäy, co ca' ni pín ixipy Dios y'it, pen ca' jadüg'oc yma'xung'ajttigach.

⁴Chi Nicodemo yajtiy:

—Per, ¿nej tüg jäy tiibi ymij'anäcciiyñi y'ocnima'xung'ajttigájtzpity jadüg'oc? ¿Nej jëbi jadüg'oc ytigy ma ytaj y'aa yjot, e chi yma'xung'adity jadüg'oc?

⁵Chi Jesús y'adzooy:

—Janch janch iich miich yam jadu'n nimäy pen ca' jäy yjothuimbity etz ñiibety, pen ca' Dios yjihui'n ymic'ajt y'adigiyii yjottigiyii, ca' jëbi ytigy ma Dios chinäy. ⁶Je jäy huidibi ajcxy ma'xung'ajtp ma töxyjäy, ymiid ajcxy ñinicx yjugy'ajtin. Je jäy ajcxy huidibi Dios yjihui'n ymic'ajt adigiiyipy jottigiipy ymiid ajcxy Dios yjugy'ajtin. ⁷Ca' nej mnayjihuihuib co ti nnimäy co copicy mma'xung'adipy hujnemy, co Dios yjihui'n ymic'ajt xy'adigihuipy xyjottigihuipy. ⁸Com je poj miiniyb hueñytimyma'amyity, e nmidoohuim co y'a'iich, e ca' nnejhuiyim ma choñ e ma

ñicxy. Jadu'n nej je poj ypojy e nganejhuiyim ma choñ, nañ tim jadu'n yjaty miid je Espíritu Santo, ca' nejhuiyim nej yjaty co adigäy jottigäy jäy.

⁹Chi Nicodemo yajtihuimbijty:
—¿Nej tijy co yjadu'nity? Ca' nhuinjihuïyich.

¹⁰Chi Jesús y'adzooy:
—Miich huindzin'ajtp ma yi judíojäy, ¿ti co ca' mhuinjihuïy jadayaabi tiy'ajt? ¹¹Janch janch iich miich yam jadu'n nnimäy co iich etz nDeedich ngapxyp yi huidibi nejhuiyigixypich, e nyejcpyich ajcxy tiy'ajt yi huidijaty iich ti n'íjxcixyich. Miich ajcxy judío ixpicytijc ca' ajcxy mgöbijccixy iich ajcxy ndiy'ajt. ¹²Pen ca' miich ajcxy mibijccixy jada tiy'ajt huidibi njanimiydacypich huidibi yajpatp ya naaxhuiñ, ca' ajcxy mmibigipy co njanimiydägibich yi tiy'ajt huidibi tzajpjoty yajpatp.

¹³Ca' ni pin ti y'oy tzajpjoty, iich je jäy tügpajc huidibi ti ndzoñich tzajpjoty, ti ngidägyich ya naaxhuiñ. ¹⁴Jadu'n nej Moisés yaj'oyiy je pujx tza'ñ, e chi yajcruudzpety jim migtigüduum jigix chögipy je jäy ajcxy ma je ahua'n iyujc chüchyii. Nañ tim jadu'n jäy ajcxy xyajcruudzpeda'ñich. ¹⁵E tüg'óciy jäy ajcxy pinjaty xymijpidaacpich, ca' yi' jugy'ajtin ycixy ytigoooy ni mina.

**Dios ooy mijcajee tzocy
jihuïy yi naaxhuiñjäy**

¹⁶Ooy mijcajee Dios tzocy jihuïy yi naaxhuiñjäy co yecy y'ung tügpajcpi miid jäy ajcxy ypocy ycixpi. Paady pinjaty mibijcp

mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tüg jugy'ajtin huidibi ca' ni mina ycixipy ytigoyipy. ¹⁷Dios ca' quejxy y'ung ya naaxhuiñ co tzaachytunipy yi naaxhuiñjäy ajcxy miid ypocy ycixpi. Paady y'ung quejxy co yajpocyñihuáatzcixipy.

¹⁸Je jäy ajcxy pinjaty mibijcp mijpidacp Dios y'ung, ca' ajcxy Dios chaachytunipy miid ypocy ycixpi. Je jäy ajcxy pinjaty ca' mibicy ca' mijpidägy Dios y'ung, pocycähuipy ajcxy ma Dios, co ca' mijpidaci ajcxy Dios y'ung tügpajcpi. ¹⁹Paady ycixpi Dios tzaachytuna'ñ mayjäy miid ypocy ycixpi, com co Dios quejxy y'ung miid ytiy'ajt ya naaxhuiñ, e ca' ajcxy mibijcy Dios y'ung, jadu'n je' anajty nej tüg jiin huidi codiicxip jäy ajcxy ma chinaayin yjugy'ajtin. Per ca'p ajcxy je naaxhuiñjäy mijpidacy je jiin, jadu'n nej jihuïy ajcxy anajty yjacjotcujcity co chinaaygixy agoodztuuyb, com je' co nigi tzachnijot'ajtcixy jibic-huinma'ñ. ²⁰Com je jäy ajcxy huidibi jibic-huinma'ñ tzach nijot'ajtcixp, ca' ajcxy tzojci Dios ytiy'ajt, jadu'n nej jihuïy ca' chinähuaangixy ma jiin ytiicxin. Ca' ajcxy y'amidoo'idani Dios y'ayuc, ca'ydi ñiguëxigy je jibicpi huidibi ajcxy ytumyb. ²¹Je jäy ajcxy huidibi cuydumb Dios ytiy'ajt, je' ajcxy ñiminipy Dios y'ung ytiy'ajt, jadu'n nej jihuïy jiin nimiingixy ma ytiicxy, huen jatyimy niguëxigy co oy ytungixy etz co Dios ytiy'ajt ajcxy miidity ma yjot yhuinma'ñ.

**Juan (el Bautista) tiy'ajt yejc ma
jäy ajcxy miid Jesús ycixpi**

²²Co jadu'n ytuni yjajti, chi Jesús ñicxy jim Judea naaxjot

miid ydiscípulos ajcxy. Chi ajcxy jim yhuáčxijpy. Jim ajcxy jāy yajniibejty. ²³Nañ jadu'n Juan anajty yjāyyajniibety jim Enón, com jim anajty ooy comni, e jim anajty jāy ymingixy etz ñiibejtcixy. ²⁴Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵Ca' ajcxy ñay'ayuc-huinjihuuiy nijējity huidibi anajty Juan yaj'ixpījcp etz tūg jāy nej jēbi huaad ypocy ñayajnihuādziyb ajcxy. ²⁶Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jāy huidibi anajty miich jim miid jim'amy Jordán mijniinaxy, je huidibi miich anajty mnidiy'ajt'ajtpy co je' je' je Cristo, nañ ooy chachjāyyajniibety. E janch mayjāy y'ocnimujcin.

²⁷Chi Juan y'adzooy:

—Ca' ni pin ni ti mic'ajt miidity, pen ca' Dios ni ti mic'ajt ymōy. ²⁸Miich ajcxy mnejhuuiyb co nminaañich co iich ca' njējity je Cristo. Hue' janchtiy Dios xyquejxich jayjip co nnidiy'ajt'adipyich je Cristo. ²⁹Co jāy ypicy je yēdyjc je' je' miid'idam je ytōxyjc. E je tōxycapxpi huidibi ti yaj'oyjy je pijcin, ca' je' miid'idañ je tōxyjāy, jēyi co yjotcugiy co yōcmidoohui je tōxyjāy ñāy co yjādy ma je' ytijc co ypigaani. Cristo jadu'n je' nipaady nej tūg tōxyjāy ñāy, e je tōxyjāy jadu'n je' nipaady nej Dios yjāy. Je Cristo ymiid'idaanipy Dios yjāy. Jadu'n iich nipaady nej tūg tōxycapxpi, ti Dios yjāy najni'ixiyyich jigix mijpidáaccixipy

je Cristo. Jotcujcich cham co je Cristo ti ymiñ, e ñicxy yi jāy ajcxy ma yi'. ³⁰Ooy ytimycopicity co Jesús ymij'ajt paatnipy, e iich ndung ycixnipy ymayñipy.

Dios y'ung tzoon jiiby ma Dios

³¹Chi Juan yjacminañ:

—Je Cristo huidibi jiiby tzoon ma Dios jacmij xpijcin miidity ca'ydí naaxhuiñyāy ajcxy. Je jāy ajcxy huidibi ya naaxhuiñ ijt, yminaaxhuiñyāy ti yaj'ixpījcgixy, e je' ajcxy ñidiy'ajt'ajtpy je naaxhuiñyāy y'ixpijcin. Je Cristo tzoon jiiby tzajpjoty, jacmijcjee yi' ma y'ayuc ytiy'ajt ca'dyí pin. ³²Je Cristo ñigapxyp huidibi ti ixy e ti midooy, e yi'y'ayuc ytiy'ajt ca' jāy ajcxy cōbigaangixy. ³³Je jāy ajcxy huidibi cōbijcp Dios y'ung y'ayuc ytiy'ajt, je' ajcxy ñigapxpejtyp co Dios ytiy'ajt janch yi'. ³⁴Je Jesús huidibi Dios yquejx, ca'pxy Dios ytiy'ajt ñigapxpejti, com Dios ti mōy yi' y'ung yi' yjihuiñ ymicc'ajt mijcjee. ³⁵Dios Teedy chojcyp yjihuiyb y'ung, e tūg'óciy ymicc'ajt ytiy'ajt yi'ti yajmigo'ixiyyāy. ³⁶Je jāy ajcxy pinjaty mibijcp Dios y'ung, ymiid'ajtpy ajcxy y'alma je jugy'ajtin huidibi ca' ycixy ytigooy. Je jāy ajcxy pinjaty ca' capxymidooy Dios y'ung, ca' ajcxy y'alma miid'adipy je jugy'ajtin huidibi ca' ycixy ytigooy. Je'yi ypaadipy ajcxy Dios chip y'ejcín.

Jesús ñaybaati miid tūg tōxyjāy jim Samaria

4 Chi je Huindzin Jesús ayuc midoy jadu'n nej anajty je fariseojāy ajcxy ycapxcixy

y miydaaccixy co je Jesús jacmayjäy anajty yaj'ixpicy etz yajniibety ca'ydi Juan. ²Oy Jesús ca' anajty jäy yajniibety ci'm. Hue' janchtiy je' ydiscípulos anajty ajcxy jäy yajniibejtp. ³E co Jesús jada nejhuiy, chi jím Judea choni, yhuimbijtni jím Galilea.

⁴Co yhuimbijty, hue' anajty yjatytiyñaxihua'n jím Samaria. ⁵Chi jada' yja'ty huingon ma je mij cajp huidi xiijip Samaria, jím ma anajty tüg pi'ccajp huidi xiijip Sicar, mi huingon je naax huidibi Jacob anajty ti möy y'ung José. ⁶Jím anajty Jesús yajpaady ma je Jacob ñiigondac. Com ti anajty Jesús y'anucxiyñi miid je tüyöyí, chi y'ijxtacy jím ma je ñiigondac anajty. Hue' anajty xii jím cugihuaanip. ⁷Chi jím yja'ty ñiigombi tüg töxyjäy. Chi Jesús yminañ:

— Hich yajni'uucc. ⁸Com je' ydiscípulos ajcxy huidibi anajty Jesús yjaymiid'ajtip, ti anajty ñicxcixy cajpjoty juuyb pijcp.

⁹Chi je töxyjäy y'adzooy huidibi anajty cogajpip Samaria:

— ¿Na'amy co iich nii xypijctzoohuich? com miich hue' miich judíojäy, e samariajäy iich.

(Co yi judíojäy etz samariajäy ca' ajcxy ñaygodigiyigixy.)

¹⁰Huin'it Jesús y'adzooy:

— Co ixypy m'ocnejhuüy je oybi huidibi Dios yejcyp miid miich ycixpi, e m'ocnejhuüy ixypy nañ jadu'n pin xypijctzoohuipy yi nii, janch co miich ixypy xyñimäyich: “Hich yajni'uucc”. E iich miich ixypy nmooyb nii huidibi jugy'ajt yegipy huinixii.

¹¹Chi je töxyjäy y'adzooy nimay Jesús:

— Huindzin, miich ca' mmiidity ti miid myajpidzimipy yi nii, e yi niijut ciicy yi' ooy. ¿Ma tijy m'ocpada'n yi nii huidibi yajjugy'ajtp? ¹²¿Nej jachni tijy miich mij mnayyajnaxyii, ca'ydi iich ajt n'ap ndeedy Jacob? Je'je' huidibi jada ñiigop yaj'oyiiy. Jacob etz y'ung y'anäg nii'uuc ma jada ñiigop, e nañ jadu'n yajni'uucy yhuaj y'iyujc ajcxy ya.

¹³Chi Jesús y'adzooy nimay je töxyjäy:

— Tüg'óciy pinjaty nii'uucp ma jada ñiigop tidzi huiib ajcxy jadüg'oc. ¹⁴Yi jäy ajcxy pinjaty nii'uucp huidibi nmooybich, ca' ni mina ytidzihuiyb, com hue' yi nii huidibi nyejcypich, ahuimbidity ma je jäy jadu'n nej tüg ñiigop huidibi yegam jugy'ajtin huidibi ni ca' ycixy ytigoy.

¹⁵Chi je töxyjäy y'adzooy:

— Huindzin, iich mooyg yi nii, ca'ydi jabom jabom ndidziyijich, e ca'ydi n'ocjacmfinibich ma jada ñiigop nii yajpidzimbi.

¹⁶Chi Jesús y'adzooy:

— Nicx yajtzon mñäy, e miid miin.

¹⁷Chi je töxyjäy y'adzooy:

— Ca' nmiidityich nñäyich.

Chi Jesús y'adzooy:

— Janch tiy'ajt jadu'n nej miich mina'n, co ca' mmiidity mñäy.

¹⁸Com ti miiddzinäy migoox yëydijc, e huidibi cham mmiid, ca' mñäy'adyii. Janch tiy'ajt jadu'n nej ti m'adzooy.

¹⁹Chi je töxyjäy yminañ:

— Huindzin, cham nhuinjihuüyich co miich je' tüg huidibi Dios yhuij'ajt ycuje'ajt miid. ²⁰Hich ajcxy n'ap ndeedyich hue' je'

yminañ co jëbi ya huaad iich ajcxy nDios'ojadajtcixyich ma jadayaabi huingombi copjiip. E miich ajcxy judíoJay yminaangixy co jim Jerusalén je' ma huaad jëbi nDios'ojadajtim, ca' jac ma.

²¹Chi Jesús y'adzooy nimay je töxyjây:

—Töxyjây mijpidäg iich n'ayuc. Co ypadamy je xii je tiempo co ni ya ma miich ajcxy mDios'ojadajttac, e ni jim Jerusalén jây ca' ojadadipy ajcxy yi Dios Teedy. ²²Miich ajcxy ca' tiy'ajt mnejhuiygixy nej jëbi huaad mDios'ojadajtcixipy. iich ajcxy judíoJay nejhuiybich ajcxy je tiy'ajt nej jëbi huaad nDios'ojadajtim. Com tög judíoJay je huidibi yajnidzoocähuan ma jây ajcxy y'alma ma Dios.

²³Ypadamy je xii je tiempo, e jada jëdu'n je tiempo co je huidibi ajcxy tiydudägy Dios ojadajtp, y'ojadadipy ajcxy Dios miid oyot oyhuinma'n etz miid Dios ytiy'ajt. Com yi Dios Teedy y'ixtaayb yi jadu'mbi jây huidibi ojadadiib miid oyot oyhuinma'n. ²⁴Dios ca' ñinixx miidity, jadu'n je' nej poj ca' yaj'ixy. Je jây ajcxy pinjaty ojadajtp Dios, copicy co huen ojadajtcixy miid tudägyjot tudägyhuinma'n, etz miid Dios ytiy'ajt.

²⁵Chi je töxyjây yminañ:

—iich nejhuiyb co je Mesías ymina'n huidibi naydijaanip Cristo, co je' yminipy, huin'it xyajni'ixihuaanim tög'óciy tiy'ajt.

²⁶Chi Jesús y'adzooy:

—iich jëdu'n je Cristo huidibi miich miidmiydacyp.

²⁷Chi jada' yja'ty ajcxy Jesús ydiscípulos ajcxy. Chi ajcxy

ooy jihuiy ti anajty co Jesús je töxyjây miidmiydägy, e ni pin ca' yaj'amidooy ti anajty chojcyp ti anajty yñimiydacyp miid yi töxyjây. ²⁸Chi je töxyjây jim ymajt ixmajch, chi ñicxy cajpjoty oy mayjây nimay: ²⁹—Mingix, jam tög yëydjic ixjim.

Ti iich yi' xyajnimaydäyich tög'óciy tijaty ti nduñich. ¿Nej ca' jada' yi' jëjity je Cristo?

³⁰Chi choñ ooy mayjây cajpjoty, ninicxy ajcxy Jesús. ³¹Yam anajty ajcxy Jesús ydiscípulos chachnimäyii adzip:

—Huindzin, occaay.

³²Chi Jesús y'adzooy:

—iich nmiidich tög caayin uucin huidibi miich ajcxy ca' mnejhuiygixy.

³³Paady je' ydiscípulos ajcxy tzachhuinmay, ac jëyi ajcxy, nayñimayigixy miñ xipy:

—¿Nej ti pinjaty yajcayyii yaj'lügyii?

³⁴Chi Jesús yminañ:

—Jotcujc nayjihuiyijich co ti nguydunich Dios chojcin. Com yi' ti xyquexyich ya naaxhuiñ, e nguydúunibich yi' y'ané'min. ³⁵Miich ajcxy minaangixp co jactigoy'ijtni jamidaax po' mina cosecha nyajpidicim. Oc-huinmay miich ajcxy, iich nmına'ñich, jëbi nyajpidicim yi cosecha cham cham. Huindicxcix yi mayjây huidibi xyñigidaacim chooñ cajpjoty. Ni'ixi yi' ajcxy y'ity co amido'idaangixy Dios y'ayuc. Jadu'n ajcxy nipaty nej tugi cosecha huidibi ti ymijaani, jëbi nyajpidicim. ³⁶E pinjaty cosecha yajpidicp ypaatyp ajcxy ymuju'n. Nañ tim jadu'n miich ajcxy huidibi myajmibijcy yi jây ajcxy co iich je' je Cristo, mbaadipy

ajcxy jotcuje'ajtin, etz huidibi ajcxy xymibijcpich xymijpidaacpich ypadamy ajcxy y'alma jugy'ajtin huidibi ca' ycixy ytigooy. Tim jadu'n nej je jây ajcxy huidibi niip etz huidibi cosecha yajpidîcp yjotcugiiygixy miid co je cosecha ti y'ity, nañ tim jadu'n je jây ajcxy huidi cojaay jecy'ajty jada Dios y'ayuc etz miich ajcxy jotcugiiygixy aguipxy co yi jây ajcxy xymijpidägyich. ³⁷Paady tiy'ajt je ayuc huidibi minam: "Tüg jây niip etz jadüg jây cosecha yajpidîcp." ³⁸Hich ti nguexyich miich ajcxy myajmibigipy jây huidibi ti paady Cristo ytiy'ajt ma Dios ñecy. Yi Dios y'ayuc ycojaaybi ti möy je jây Dios ytiy'ajt, e miich ajcxy je' mbubedipy co myajmibigipy co iich je' je Cristo.

³⁹Mayjây huidibi cogajpip jim Samaria ymijpidac ajcxy je Jesús co je' je' je Cristo, miid co je töxyjây anajty ti ymina'n: "Ti yi' xyajnimaydäyich tijaty iich ti nduñich." ⁴⁰Co je samariajây ajcxy yjädty ma Jesús yhuinduu, chi ajcxy cohuaniiy huen hui'my. Chi Jesús jim yhui'miyy mejtz xii. ⁴¹Janch mayjây ooy nigî mibijcy mijpidacy Jesús, co je' je' je Cristo co ajcxy ci'm midomiydacy je Jesús. ⁴²Chi ajcxy nimay je töxyjây:

—Canaan jëyi co miich ti xyajnimäy iich ajcxy, paady ycixpi iich ajcxy yam nmibicyich. Nañ ti iich ajcxy yam ci'm n'amido'ityich, paady iich ajcxy nejhuüy co janch jada yjējity je Cristo huidibi yajnidzögam yi naaxhuiñyây ajcxy y'alma ma Dios.

**Jesús yajtzooc tüg gobierno
mijtungmiidpi ymang**

⁴³Mimejtz xiibi anajty co Jesús choon jim, nicxy jim Galilea.

⁴⁴Jesús ci'm anajty ti ymina'n:

—Co jây ajcxy huidibi miid Dios yhuij'ajt ycuje'ajt yajpaady ma yci'mgajp, ca' pin yajmij'adyii.

⁴⁵Co Jesús yja'ty jim Galilea naaxjot, huidi anajty ajcxy jimip agujc jotcuje ajcxy cöbijcy Jesús, com ti anajty ajcxy ijxcixy tijaty mijhuinma'n anajty ti tuñ jim Jerusalén xiijoty, com nañ ti je' anajty ajcxy jim y'oygixy xi'ajtpi.

⁴⁶Chi yhuimbijty Jesús jadüg'oc jim Caná ma Galilea ñaaxjot, ma je nii yajvinocojy. Jim Capernaum anajty tüg rey mijtungmiidpi huidibi anajty y'ung pîjcip. ⁴⁷Co je' nejhuüy co Jesús anajty ti yhuimbity Galilea co anajty ti y 'oy Judea, chi ninicxy, e chi cohuaniiy co Jesús huen nicxy y'ung tzoyiyii huidibi anajty ögaanip. ⁴⁸Huin'it Jesús ymina'n:

—Pen ca' ixypy ti m'ixy mijhuinma'n etz tijaty ijxpejt, ca' ixypy mmibicy.

⁴⁹Chi y'adzoy je rey ymijtungmiidpi:

—Huindzin, tun may'ajt ninicx iich n'ung ma ca'ni y'o'cyñi.

⁵⁰Chi Jesús ymina'n:

—Huimbit ma mdijc, je m'ung jugy'ajtni je'.

Chi je yëydijc mibijcy Jesús nej anajty ti ñimäyii, chi ñicxy jadüg'oc ma ytijc. ⁵¹Nicxnip anajty co ytumbi ajcxy oy yjiipcobadiyii, e chi ñimaayy co je' y'ung ti anajty y'agidägy.

⁵²Chi yaj'amidooy ajcxy ti hora anajty ti yhuaadjihuüy, chi ajcxy y'adzooy:

—Ixiiy cujc yxii naxy je toyii y'ixmajtznî.

⁵³Paady je ungdeedy jihui'nybijcy co huin'it je' jada' je tiempo co

anajty Jesús ti ñimäyii: “Je m'ung jugy'ajtni je'.” Chi jada' mibijcy mijpidacy Jesús miid tüg'óciy jäy huidijaty anajty yajpat ma yjiin ytiyc.

⁵⁴Je' je' je mimetzpi mijhuinmaññ mij'oy'ajt huidibi Jesús ytun co chooñ jím Judea ñicxy jím Galilea ñaaxjot.

**Jesús yajtzooc tüg jäy huidibi
anajty yci' ytecy xuuxy**

5 Co jadu'n ytuni yjajti jím Jerusalén anajty ajcxy judíojäy tungixy tüg mijxii. Huin'it Jesús jím ñicxy jím Jerusalén. ²E jím Jerusalén jím anajty nii abojtzög y'ity, mihuingon je poch aguu huidi xiiijp puerta de las ovejas. Je it hue' anajty yajtijy hebreo'amy Betesda, e ymiid anajty migoox it yhuinguembetpa't. ³Ma je huinguembetpa't mayba'mjäy anajty jím chachcöгнаaygixy; je huintzpi, ciducp tecytucpi, cixuxy tecyxuxypi, huidibi anajty ajcxy jím tzach'ahuijxp mina je nii y'ocpu'xhuimbity. ⁴Com tüg ángel anajty yhuimbety y'adijy ma je nii abojtzög y'ity, chi je nii yajyücx. E je jäy pinjaty anajty jayijp jiiby niijoty tigiib co je nii yücx, huin'it anajty ajcxy choocixy, oy ixyipy ti pa'm ajcxy tim miidity. ⁵Jím anajty tüg yëydijc hue' anajty ti ypa'mgögnäy iipx majmoxc tugiiig jímijt. ⁶Co Jesús ijxy jím ycögnäy, ijxajpy co anajty je' jecyip chachmijtacni, chi nimay:

—¿Nej mdzögambi?

⁷Chi je pa'mjäy y'adzooy:

—Huindzin, ca' nmiididyich tüg yëydijc pin iich xypidägiy jiiby

niijoty co anajty nii y'ahuidijtcoty. E paady ycixpi co oy iich jím njamechich ma yi nii, ti huingbi ñitigiinyñi.

⁸Chi Jesús yminañ:

—Pidig, yajpidig yi mmaabejt, etz tüyöychon.

⁹Chi mic'amy choocy, chi je' ymaabejt yajpidigy ytiigi yöybi najxpi janch mic oy. Hue' anajty tüg sábado xii co choocy. ¹⁰Paady je judíojäy ixpiytyijc ajcxy nimay je huidibi anajty ti chögy:

—Hue' yam sábado xii, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹Chi y'adzooy je':

—Je jäy tiibi iich xyajtzögy, yi' iich jadu'n ti xyñimäy: “Yajpidig yi mmaabejt etz tüyöychoon.”

¹²Chi ajcxy y'amidooy:

—¿Pin miich jadu'n ti xyñimäy: “Yajpidi yi mmaabejt etz tüyöychoon?”

¹³Per je tiibi anajty chögy, ca' anajty je' nejhuüy pin je' anajty. Com ti anajty Jesús niyöydiigooyñi ma je mayjäy huidibi anajty ajcxy jím tzachjajtip ma je it. ¹⁴Chi jada' jaccomjcy minaybaatti Jesús jím ma Dios ytiyc, e chi Jesús yminañ: —Cuentipic nej ti mdzögy, ca' ni ti bocy mjactunipy. Co pocy mjactunipy ca' yjeyity co tim niigi jibic nicxy mjayt.

¹⁵Chi je yëydijc ñicxy oy je' yajnimäy je judío ixpiytyijc co hue' je' anajty Jesús, je huidibi anajty ti yajtzögyii. ¹⁶Paady ycixpi je judío ixpiytyijc anajty tzach'ixhuidijtcixy tzachpahuidijtcixy je Jesús, e yaj'ögaangixy miid co anajty jäy ti yajtzögy sábado xii. ¹⁷Chi Jesús yminañ:

—hich nDeedy tumb je' cham,
ca' ypooxxy, paady ycixp iich nañ
jadu'n nduñich cham ma miich
ajcxy sábadó xii.

¹⁸Co Jesús jadu'n yminañ,
paady ycixpi je judío y'ixpicytije
ajcxy nñi yjacjtotma'tcoty, ytimy
yaj'ógamy anajty aj y Jesús. Ca'
ajcxy jadu'n yjotcujcity co anajty
Jesús ca' cuyduñ judíojaý ajcxy
ytiy'ajt nej ajcxy sábadó xii
yajmij'ajtcixy, etz co jadu'n yminañ:
“Dios yi' nDeedy'ajtypich.” Paady
ycixpi ajcxy judío y'ixpicytije
yminañ co Jesús ci'm anajty
ytügihua'ñ miid Dios.

Dios ymooy je y'ung ymic'ajt

¹⁹Chi Jesús yminañ:

—Janch janch iich miich ajcxy
yam jadu'n nimaaygixy co
iich Dios nDeedy'ajtypich. Ca'
huaad ti nduñich miid ngi'mjot
ngi'mhuinma'ñich. Jëbi janchtiy
nduñich huidibi n'ijxpyich Dios
Teedy ytumy. Huidibi Dios Teedy
ytumyb, ndumybich com Dios yi'
nDeedy'ajtypich. ²⁰Com yi Dios
Teedy ooy yi tzocy jihuñ yci'm'ung,
paady xyajni'ixiydaaybich
tüg'óciy yi huidibi ytumyb.
E nañ xyajni'ixihuaambich
jacmijjatypi mijhuinma'ñ, ca'ydi
jadayaabi mijhuinma'ñ nej ajcxy
ti m'ijxycixy nej jada pa'mjäy
ti chögy, paady ycixpi nñi
mhuinmayipy ajcxy. ²¹Jadu'n nej
Dios Teedy yajjugypicy yi o'cpi, e
chi yajtzinäy jadüg'oc. Nañ jadu'n
iich anajty ndimymöhuamyb.
²²Com je Dios Teedy ca' je' ci'm
ocyajciyöyaani ocyajtecyyöyaani
jäy ajcxy ypocy. Hue' tüg'óciy

je ymic'ajt xyajciidigiyaayich
co iich ndiydunipyich tüg'óciy
naaxhuiñyjäy, com Dios
nDeedy'ajtypich. ²³Hue' tüg'óciy je
ymic'ajt xyajciidigiyaayich, jigix
tüg'óciy jäy xyajmij'adipyich. Je jäy
ajcxy huidibi ca' xyajmij'ada'ñich,
nañ ca' ajcxy yajmij'ada'ñ Dios
Teedy huidibi xyquejxich ya
naaxhuiñ.

²⁴Janch janch iich miich
ajcxy yam jadu'n nimaaygixy:
Co hueñypinjäyity, pinjaty
xy'amido'jtibich n'ayuc, e
ymibijcyp ymijpidacyp je tiibi
xyquejxyich ya naaxhuiñ, ymiid
je'je y'alma jugy'ajtin huidibi
ca'ycixipy ytigoyipy, e ca' Dios
Teedy chaachytuna'ñyii miid
ypocy ycixpi. Hue' janchtiy co
y'ögipy, chi janchtiy jadügtecy
yjugypigipy. ²⁵Janch janch iich
miich ajcxy jadu'n nimaaygixy co
yi xii tiempo paatnipy, e cham
jëdu'n ti paady, co yi jäy ajcxy
tiibi y'o'ccixy ymidohuipy yi
n'ayucich, co anajty ngapxyich,
com Dios yi nDeedy'ajtypich.
Pin jäy anajty midoob n'ayucich
jugypigip jadüg'oc ajcxy. ²⁶Com
yi Dios Teedy mic'ajt miid jëbi
yajjugypicy jäy tiibi y'o'ccixy.
Nañ Dios ti xymöyich ymic'ajt
jëbi huaad nyajjugypicyich jäy
tiibi y'o'ccixy, com Dios iich
nDeedy'ajtypich. ²⁷Ti Dios
xymöyich ymic'ajt jëbi ndiyduñich
je jäy ajcxy miid ypocy ycixpi,
com iich je' je jäy huidibi tsoon
tzajpjoty. ²⁸Ca' ooy jada ayuc tiy'ajt
mhuinmaaygixy. Com ypaadipy
je xii je tiempo co je huidijaty
ajcxy yajpatp ma naaxtiigiydac,

ymidohuipy ajcxy n'ayucich co iich anajty nmigapxyich ajcxy. ²⁹Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi miid ypocy ycixpi.

**Dios tiy'ajt yejc co Jesús
ymiid anajty mic'ajt**

³⁰Ca' ni ti huaad nduñich miid ngi'mmic'ajlich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt miid nyajcüyöya'ñich nyajtecyöya'ñich jäy ajcxy ypocy. Jadu'n tiydudägy nduna'ñich, com ca' iich nduñich ngi'mdzócinich. Yi' iich ndumyb nej Dios Teedy tzocy, yi' huidibi xyquejxich ya naaxhuiñ. ³¹Co ixypiy iich ci'm nayñigodiy'ajt'adyijich, ca' ixypiy miich ajcxy mmijpidägy n'ayuc ndiy'ajlich. ³²Com huingbi yi' huidi xyñigodiy'ajt'ajtpich co iich Dios ymic'ajt nmiididyich, e nejhuiybich co janch yi' huidibi xyñigodiy'ajt'ajtpich. ³³Miich ajcxy ti mguexy je migügtijc ajcxy tiy'ajtpijcpi ma Juan. E je' yejc tiydudägy ayuc tiy'ajt janchypi pin iich. ³⁴Co jadu'n nmina'ñich co Juan xyajnidiy'ajt'atyich co iich je' je Cristo, ca' jadu'n nmina'ñich co ooy ycopicyity co tüg jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nidzoocin paadipy ma Dios. ³⁵Je Juan mictägy ooy Dios y'ayuc najtzcapxiyi, jadu'n je' anajty nej tüg jiin huidibi tiicxp

jajp, e miich ajcxy tüg jaxigyi ti mxondaaccixy miid yi' y'ayuc ytiy'ajt. ³⁶Nigi iich Dios y'ayuc ytiy'ajt nmiididyich ca'ydi Juan. Yi mijhuinma'ñ huidibi ndumybich miid Dios Teedy ymic'ajt. yi' xyajnigüëxigibich co iich ya naaxhuiñ Dios Teedy xyquejxich. ³⁷Yi Dios Teedy tiibi xyquexyich, yi' ci'm yejc tiy'ajt co iich je' je Cristo. E ni caminaabi miich ajcxy yi' mgamidoohui ycapxin, nañ ni caminaabi miich ajcxy Dios Teedy yhuiñyijp maga'ijxi. ³⁸Ni ca' miich ajcxy mmiidity yi' y'ayuc ma mjot mhuinma'ñ, miid co miich ajcxy ca' xymijpidägyich co iich je' je jäy huidibi Dios ti quexy ya naaxhuiñ. ³⁹Ijxtaaygixy jada tiy'ajt ma Dios ylibro, com jiiby mdijy miich ajcxy mbaadipy tiy'ajt nej jëbi ajcxy mjogy'adipy co anajty ti m'o'ccixy, e yi Dios ylibro nañ iich yi' xyñigapxp. ⁴⁰E ca' miich ajcxy mgöbigaangixy iich n'ayuc iich ndiy'ajt, jigix ajcxy jugy'ajti mbaadipy huidibi ca' ycixy ytigooy.

⁴¹Dios xycömayipyich, ca' ngöbigipyich co naaxhuiñyjäy ajcxy xycömayipyich. ⁴²Nnejhuiybich, nej miich ajcxy mjot mhuinma'ñ mmiidity, co ca' ajcxy Dios ytiy'ajt mguyduuni. Ca' ajcxy migüg mdzojccixy mjihuiygixy jadu'n nej Dios tzocy jihuüy jäy ajcxy. ⁴³ñich ti nmiñich miid nDeedyich ymic'ajt. Miich ajcxy ni ca' xycöbicyich. Pen ji huingbi jäy ymiñ miid yci'mmic'ajt, ca' miidity Dios ymic'ajt, je' janchtiy miich ajcxy ooy mijpidägaangixy. ⁴⁴Ca' mjájtciixy nej iich miich ajcxy xymijpidägyich, miid co ajcxy

ci'm mdzachnaygömayáanigixy ac miich ajcxy jëyi. E co ixipy miich ajcxy xycöbiga'ñich, huin'it ajcxy Dios xycömayipy. ⁴⁵Ca ajcxy mmina'nipy co iich miich ajcxy nxihuaamy ma Dios Teedy yhuinduu. Je Moisés miich ajcxy yxihuam ma Dios, je huidibi miich ajcxy mdzachmijpidaacip ytiy'ajt. ⁴⁶Pen mmijpidaacyp ixipy ajcxy je Moisés y'ayuc ytiy'ajt, nañ jadu'n ixipy iich miich ajcxy xymijpidägyich. Com Moisés iich yi' xychachñimiyaacich ma yi' ñecy. ⁴⁷Pen ca' mmijpidaaccixy Moisés ñecy, ca' mjátcixipy nej ajcxy mijpidáaccixipy iich n'ayuc.

Jesús ymoy jây jicxy picy migoox mil

6 Co jadu'n ytuni yjajti, chi Jesús ñicxy jim Galilea mejy nínaxy, huidibi nañ jadu'n xiijip Tiberias mejy. ²Janch mayjây anajty Jesús ypanicxyii axam co anajty ajcxy ixj je mijhuinma'ñ tijaty anajty Jesús ytumyb ma mayba'mjây. ³Chi Jesús ypejty ma tûg cögot, chi jim y'ixtacy miid je' ydiscípulos ajcxy. ⁴Tim huingonip anajty je pascuaxii huidibi anajty judíoñy ajcxy ytumyb. ⁵Chi Jesús ijxy co janch mayjây ti ypamiinyii, chi nimay Felipe:

— ¿Ma jada' caayin uucin n'ocjuyim, ti nyajcaayim jada mayjây huidibi ti xypamiinim?

⁶Hue' anajty y'oc'ijxmadzamy nej Felipe y'oc'adzooy. Jesús anajty ñejhuiyb yajxon ti anajty ytunamy.

⁷Chi Felipe y'adzooy:

—Ni ycahuaadihuip mejtz mil peso meñ, co ixipy ajt n'ocjuyaanim caayin uucin, e

nmöhuaanim cijp tûg'aa cijp mejtz'aa jëyi.

⁸Tûg Jesús ydiscípulo, hue' anajty yxii Andrés, Simón Pedro y'uch, je' jadu'n nimay Jesús:

⁹—Cha tûg pi'c'anäg huidibi miid migoox cebada tzajcaagy, e mejtz acx ung. E ni ycatiijty yi' yi migooxpi tzajcaagy, etz mejtz acx ung miid jada mayjây.

¹⁰Chi Jesús nimay je' ydiscípulos ajcxy:

—Yaj'ixtacta' yi mayjây.

Miijyot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yëydijctijc, abicy yi töxyjäydijc etz y'ung y'anäg ajcxy. ¹¹Chi Jesús je tzajcaagy congy, chi yajnajxy Dioscojuyip, chi yajnidagiiyday je jây ajcxy huidijaty anajty jim iñaayb, mooy jadu'n nej pin tim tzocy je tzajcaagy etz je acx. ¹²Co je mayjây cayday, chi Jesús nimay je' ydiscípulos ajcxy:

— Yajmujcta' ajcxy yi cayduc, ca'ydi huaad ni ti y'iyoy.

¹³Chi ajcxy yajmujctay je cayduc, e yaj'ujch ajcxy majmetz mijjaty cach miid je tiibi anajty yconaxy je migooxpi tzajcaagy. Je' anajty jadu'n ti yjacconaxy. ¹⁴Co ajcxy y'ijxy je mijhuinma'ñ huidibi anajty Jesús ti tuñ, chi je jây ajcxy yminañ:

— Janch jëdim jada je yëydijc huidibi Dios y'oy'ajt ymic'ajt miid, je huidibi anajty miinam ya naaxhuiñ.

¹⁵Co Jesús nejhuiy co ajcxy anajty yajrey'ada'ñyii, chi jada' jadüg'oc huinhuäctuttay je mayjây. Chi ñicxy naydüg ma tûg yuugjot.

Jesús yöy niihuingíxy

¹⁶Co oy chu'íyñi, chi Jesús ydiscípulos ajcxy y'idaacni ma mejypa'. ¹⁷Chi ajcxy ybarcotigíy, ñicxy ajcxy jim Capernaum jadügpi mejypa'. E ti anajty ycoodziyñi, e ca'ni anajty Jesús ajcxy ñihuimbidiyini. ¹⁸Chi tüg mijpoj ymiñ, chi je mejy ytiigíy oy yücxi. ¹⁹Ti anajty ajcxy ytüyöy oy migoox tudujc kilómetro co ajcxy ijxy Jesús yhuingoñ ma je barco, hue' anajty ytüyöy mejyhuingíxy. Chi ajcxy ooy ñay'adzigiíy. ²⁰Chi Jesús yminañ: — Hich yi', ca' mdzigiigíxy. ²¹Chi ajcxy jotcujc Jesús yajbarcotigíy. Chi tim mic'amy ajcxy ymejch jim ma mejypa' ma anajty ajcxy ñicxcixy.

Mayjäy ixtaay Jesús

²²Je mayjäy huidibi anajty ajcxy ti yhui'mäy jim'amy y'ahuin, y'ijx ajcxy co ac jäyi Jesús ydiscípulos ajcxy ytiigíy ma tüg barco, e Jesús ca' anajty ti ytiigíy barcojoty miid je' ajcxy. Ac jäyi anajty ajcxy ti choongíxy barcojoty. ²³Je com jabom nijejity barco huidibi anajty jim tzomb Tiberias, ti anajty yjädy mihuigon ma je it, ma anajty Jesús ti yajcaaygíxy je mayjäy miid je Huindzin Dios ymic'ajt, huin'it co Dios mibijctzoy. ²⁴Chi je mayjäy ajcxy ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigíyday, chi ajcxy oy ixtaaygíxy Jesús jim Capernaum.

Jesús ymöhuamy jäy ajcxy jugy'ajtin huidibi ca' ycixipy ytigoyipy

²⁵Co ajcxy minaybaati Jesús mejy ñinaxy, chi ajcxy nimay:

—Huindzin, imina miich ya ti mmiñ?

²⁶Chi Jesús y'adzooy nimay je mayjäy ajcxy:

—Janch janch co iich miich ajcxy yam jadu'n nimaaygíxy co miich ajcxy xy'ixtaaybich, canan yi' ycixpi co ajcxy ti m'oc'ixy yi mijhuinma'n huidibi ti nduñich, paady ycixpi miich ajcxy xy'ixtäyich co ajcxy nyajcay cüxyi miid tzajcaagy.

²⁷Chi Jesús yjacminañ:

—Ca' myajjotmaygojcixy yi jüxcy picy huidibi cijxp tigooyb. Yi' janchtiy mijottigooygíxy yi jüxcy picy huidibi xymöhuipy yi jugy'ajtin huidibi ca' ycixipy ytigoyipy tücci'yi. Hich miich ajcxy je jugy'ajtin nmöhuibich huidibi ca' ycixipy ytigoyipy tücci'yi, com iich je' je jäy huidibi tzoon tzajpjoty, e Dios Teedy xymic'ajtmooyich, jëbi iich miich ajcxy nmöy jugy'ajtin huidibi ca' ycixipy ytigoyipy tücci'yi.

²⁸Chi ajcxy nimay Jesús:

—¿Ti iich ajcxy jëbi huaad nduñ, nej jëbi iich ajcxy Dios xymijotcuje'aty?

²⁹Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuin.

³⁰Chi ajcxy nimay Jesús:

—¿Ti ijxpejt mdunamy miid iich ajcxy, jëbi iich ajcxy n'ixipy Dios ymic'ajt etz iich ajcxy nmibigipy co miich je' je Cristo? ¿Ti mijhuinma'n mdunamy? ³¹Hich ajt nmij'ap nmijteedy ajcxy jecy'ajty yjiicxy pijc ajcxy je maná jim ma titznaax'it. Jadu'n ymiñ jaybety ma

jadu'n ymina'n: "Dios yejcpy jiicxy picy huidibi tsoon tzajpjoty."

³²Chi Jesús y'adzooy:

—Janch janch iich miich ajcxy yam jadu'n nimaaygixy co canan je' je' je Moisés huidibi miich ajcxy xymooyb je jiicxy picy janchypi huidibi tzomb tzajpjoty. ³³Je jiicxy picy huidibi Dios yejcpy huidibi tzomb tzajpjoty, je' je' huidibi jugy'ajtin moy je naaxhuiñy-jäy huidibi ca' ycixipy ytigoyipy tücci'yi.

³⁴Chi ajcxy nimay Jesús:

—Huindzin, iich ajcxy mooyg je jiicxy picy janchypi jabom jabom huinixii.

³⁵Chi Jesús ymina'n:

—Iich jëdu'n je jiicxy picy huidibi miich ajcxy xymöhuip jugy'ajtin huidibi ca' ycixipy ytigoyipy tücci'yi. Co jäy ajcxy xyñimiinich, e xymijpidägyich, huin'it ca' yi' ajcxy yuböccoda'ñyii niminaxii, e co jäy ajcxy xymibicyich, ca' yi' ajcxy ytidzihua'ñyii niminaxii. ³⁶Com ti iich miich ajcxy nimäy, oy iich miich ajcxy ti xyja'ijxycixy, per ca' mibijccixy. ³⁷Tüg'óciy pinjaty iich nDeedy yquexyp ma iich, xyñimimbich yi' ajcxy. E pinjaty xyñimimbich etz xymijpidaacpich, ca' iich yi' ajcxy n'ixtijy. ³⁸Canan paady ycixpi iich ti ndzooñ tzajpjoty ngidägich ya naaxhuiñ co nduna'ñich ngi'mhuinma'n. Hue' janchtiy yi' ndunaamyich nDeedyich y'ayuc ytiy'ajt, com yi' xyquejxich ya naaxhuiñ. ³⁹Yi' jadu'n tzojcp iich nDeedy huidibi xyquejxich ya, co iich ca' ni pin nyajtigoyipyich, yi huidijaty xymooybich. Hue' janchtiy yi' ajcxy

nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁰Dios Teedy ti xyquexyich ya naaxhuiñ e yi' jadu'n tzojcp co pin jäy iich anajty xy'ijxpich, e xymijpidaacpich, ymiid'adipy je' ajcxy jugy'ajtin huidibi ca' tücci'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñybi ti yhuaad'ajtni mina anajty ytigadza'n.

⁴¹Chi je judíojäy ajcxy ooy yajtzibiyy yajcapxiyy co anajty Jesús jadu'n ti ymina'n: "Iich je' je jiicxy picy huidibi tsoon tzajpjoty."

⁴²Jadu'n anajty ajcxy chachmina'n:

—¿Nej ca' je' yjadaajity je Jesús, je José y'ung, je huidibi ajt ytaj yteedy n'ixy'ajtim? ¿Nej co jadu'n ymina'n: "Iich ti ndzooñich tzajpjoty"?

⁴³Chi Jesús y'adzooy:

—Ca' myajtzibiyygixy myajcapxiyygixy ac miichiy ajcxy.

⁴⁴Ni pin jäy xycaniminipyich, pen ca' jayijp Dios Teedy huinma'n ymöyii co xymijpidägibich.

E co xymijpidägibich, chi nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁵Com jadu'n ymiin jaybety ma Dios ñecy huidibi je jäy ajcxy anajty Dios ytiy'ajt miid huidibi jecy'ajty yjaay co Dios yaj'ixpigamy je jäy ajcxy tüg'óciy. Paady ycixpi tüg'óciy jäy huidibi midoob Dios y'ayuc etz y'ixpijcp Dios ytiy'ajt xymijpidägibich ajcxy.

⁴⁶Ca' ni tüg jäy ti ixy yi Dios Teedy. Jëyi je jäy tügpajc huidibi ti choñ ma Dios, yi' je' ti ixy yi Dios. ⁴⁷Janch janch iich miich ajcxy yam jadu'n nimaaygixy co pinjaty

xymibijcpich xymijpidaacpich,
ymiid yi' ajcxy yjugy'ajtin huidibi
ca' ycixipy ytigoyipy tücc'i'yi.

⁴⁸Hich jëdu'n je jïicxy picy huidibi
jugy'ajt mooyb je jäy huidibi
ca' ycixipy ytigoyipy tücc'i'yi.

⁴⁹Miich ajcxy mmij'ap mmijteedy
yjiicxy'ajti ycaagy'ajti ajcxy je
maná jim títznaaxtuum'it jecy'ajty.
E chi ajcxy y'o'ctay. E ni ca' ajcxy
jugy'ajtin paty huinixiibi. ⁵⁰Je
jïicxy picy huidibi nnigapxypich
huidibi tzoon tzajpjoty, co jäy
ajcxy jïicxipy, ymiid'adipy ajcxy
je jugy'ajtin huidibi ca' ycixipy
ytigoyipy tücc'i'yi. ⁵¹Hich jëdu'n
je jïicxy picy huidibi ti choon
tzajpjoty, etz ti ycidägy ya
naaxhuiñ huidibi jugy'ajtin yejcp.
Co jäy ajcxy jïicxyp je jïicxy picy,
ymiid'adipy ajcxy je jugy'ajtin
huidibi ca' ycixipy ytigoyipy
tücc'i'yi. Je jïicxy picy huidibi
nyegaamyich miid naaxhuiñjäy
ajcxy ycixpi, je' je' je nninïcxich.

⁵²Chi je judío y'ixpicytjic ajcxy
ooy yaj'ayucyoon yajcapxyoon, ac
je'yi ajcxy ñayñimáayigixy:

—¿Nej jada yëydijc tijy yi' ñinïcx
njïicxy'ajtim?

⁵³Chi Jesús yminañ:

—Janch janch co iich miich
ajcxy yam jadu'n nimaaygixy,
pen ca' miich ajcxy mdzüdzcixy
iich nninïcx, e pen ca' m'uuccixy
iich nni'py, iich je jäy tügpajc
huidibi tzoon tzajpjoty, ca'
miich ajcxy miid'adipy yi Dios
yjugy'ajtin. ⁵⁴Com pinjaty iich
nninïcx xychu'tzip etz iich nni'py
xy'uucibich, ca' je ajcxy yjugy'ajtin
ycixipy ytigoyipy tücc'i'yi, oy ajcxy
yja'o'ccixy. Nyajjugypigipyich

je' ajcxy jadüg'oc co anajty
naaxhuiñbyi ti yhuaad'ajtni mina
ytigadzipy. ⁵⁵Hich nninïcx janchypi
jïicxy picy yi', etz iich nni'py
janchypi ügy yi'. ⁵⁶Co yi jäy ajcxy
xymibicyich xymijpidägyich
jadu'n ni paady nej jihuüy iich
nninïcx xychüdzi, etz iich nni'py
xy'uuci. Chi y'idipy ajcxy huinixii
ma iich, etz iich n'idipyich
huinixii ma je' ajcxy. ⁵⁷Dios Teedy
huidibi xyquejxich ya naaxhuiñ
ymiid jugy'ajtin huidibi ca' ycixy
ytigooy. Hich ti nbaadyich ma Dios
Teedy je jugy'ajt huidibi ca' ycixy
ytigooy. Nañ mbadamy miich
ajcxy jugy'ajtin huidibi ca' ycixy
ytigooy ma iich. Co miich ajcxy
xymijpidägyich, jadu'n anajty
nipaady nej jihuüy mjiicxy'ajtigixy
iich nninïcx. ⁵⁸Je jïicxy huidibi
tzoon tzajpjoty, e ycidacy ya
naaxhuiñ co jäy ajcxy jïicxy'adyii,
yajtzinähuiib je ajcxy, ca' ajcxy
yjugy'ajtin ycixipy ytigoyipy
tücc'i'yi. Yi mmij'ap mmijteedy
huidibi jïicx'ajtigixy je maná
jecy'ajty, o'ctay ajcxy, ca' ajcxy paty
je jugy'ajtin huinixiibi.

⁵⁹Jadu'n Jesús ymiydacy jim ma
je judíojäy ajcxy ñaymujctac jim
Capernaum co anajty jim yaj'ixpicy.

Mayjäy ca' mijotcuje'ajty

Jesús y'ayuc

⁶⁰Co ajcxy Jesús y'ayuc
midodaayi, nigujc-huäcxy je
huidibi anajty xpijcp ma Jesús. Chi
ajcxy capxpídzimy, e jadu'n ajcxy
yminañ:

—Ooy chachchipity je Jesús
y'ayuc. Ca' huaad ji pin
huinjihuüyday.

⁶¹Com Jesús ñejhuiyb nej ajcxy anajty yajtzibiy yajcapxiy, chi yminañ:

—¿Nej ca' miich ajcxy mijotcuje'aty je tzip ayuc jadu'n nej cham ajcxy ti nyajnimäy?

⁶²¿Nej xymijpidägbich ajcxy, pen m'ijxpy ixipy ajcxy co anajty nba'ttigiyich jadüg'oc jiiby tzajpjoty ma ndzooñich? Com iich je' je jäy huidibi tzoön tzajpjoty. ⁶³Je jäy ajcxy yjihui'ñ, yì' je' ñinìcx yajjugy'ajtip, e je jäy ajcxy ninìcx ca' yì' ni ma chobaady, pen ca' miiidity yjihui'ñ. Co miich ajcxy mgöbigipy yi ayuc tiibi ngapxyich, huin'it ajcxy mbaadipy Dios yjihui'ñ (je Espíritu Santo), etz mbaadipy ajcxy jugy'ajtin huidibi ca' tüccì'yi ycixy ytigooy, oy mja'o'ccixy. ⁶⁴Per nigujc-huäcxy ma miich ajcxy pinjaty ca' mibicy iich n'ayuc.

Com Jesús ñejhuiyb anajty jayijpni pinjaty ca' ymibigyii y'ayuc, etz pinjaty anajty cìyegaanip ma ymidzip. ⁶⁵Chi Jesús yjacminañ:

—Paady ycixpi jayijp ti nmìna'ñich, co ca' ni pin jèbi iich xymijpidägy, pen ca' Dios Teedy jayijp yhuinma'ñ ymöyii co cöbiga'ñ ymöyii co cöbiga'ñ iich n'ayuc.

⁶⁶Huin'it mayjäy ajcxy, je huidibi anajty xpijcp ma Jesús, chi ajcxy huinhuäctut ixmajtznì ajcxy Jesús. Ca' ajcxy y'ocjacpanìcxni. ⁶⁷Chi jada' Jesús nimay je nimajmetz discípulos ajcxy:

—¿Nej nañ xy'ixmadzaambich miich ajcxyi?

⁶⁸Chi y'adzooy Simón Pedro:

—Huindzin, ca' jac ni pin iich ajcxy jèbi huaad nmijpidägyich,

com miich tügpajc miiid je ayuc huidibi xyajni'ixiiyich ajcxy nej jèbi huaad iich ajcxy nbaadipy jugy'ajtin huidibi ca' ycixipy ytigoyipy tüccì'yi. ⁶⁹Iich ajcxy nmibijcypich e nnejhuiybich co miich je' je jäy huidibi tzoön ma Dios huidibi huädz yhuinma'ñ ymiiid.

⁷⁰Chi Jesús yminañ:

—Miich ajcxy je' ti nhuin'ixyich nimajmetzpi, e nidügti miich ajcxy mujcu' huinma'ñ mmiiidity.

⁷¹Je Judas Iscariote, Simón ymang, anajty ytiipy. Com je' je' anajty cìyegam Jesús ma ymidzip, oy je' anajty yjajèjity nidüg ma je nimajmetzpi.

Jesús y'uch ajcxy nañ ca' anajty jaty mijpidaaci Jesús y'ayuc

7 Co jadu'n ytundaayi yajtaayi, jim anajty Jesús yhuidity Galilea naaxjot, ca' anajty ñìcxa'ñ jim Judea naaxjot, co anajty yi judíojäy ajcxy huidibi midzip'ajtip yaj'öga'ñyii. ²Tim huingon anajty je judíojäy yxii, hue' anajty ajcxy yxiigoyäxy Tabernáculo xii. ³Chi Jesús ñìmaayi y'amigüg y'uch yëydijcpi:

— Tzon miich ya, nìcx jim Judea naaxjot nayguëxigii mayjäyjoty.

⁴Com huenpinity huidibi nayguëxigaanip mayjäyjoty, ca' ajcxy naygoyüchyii. Mdunipy miich mijhuinma'ñ xiijoty, jigix je mayjäy xycömayipy.

⁵Ni Jesús y'amigüg ajcxy ca' anajty yjaty ymijpidägyii y'ayuc.

⁶Paady Jesús y'adzooy:

—Iich nxii ndiempo ca'ni paty mina ndigìhua'ñich jim Jerusalén

jadu'n nej je Mesías. Janch miich ajcxy oytimyminaajity jëbi mnayguëxícigixy ma je mayjäy ajcxy. ⁷Ca' huaad jëbi miich ajcxy, naaxhuiñyäjy ajcxy, xymidziptzoñ. Janch iich xymidzip'ajtpich ajcxy yi', je' co ngapxpídzimych yi yjibic-huinma'n huidibi ajcxy ytumyb.

⁸Nicx miich ajcxy jim ma xii yjadyii. ñich ca' nnicxa'ñich cham, com ca'ni iich ndiempo yhuaad'aty mina ndigihuibych jim Jerusalén jadu'n nej je Mesías.

⁹Jadu'ñydi jëda'ajty yminañ, chi yhui'miïy jim Galilea.

Jesús ñicxy jim Jerusalén xiijoty

¹⁰Co Jesús y'amigügtijc ajcxy jayijp ñicxtay xii'ajtpi jim Jerusalén, chi Jesús nicxy nañ jadu'n ayüch ameech ma anajty xii yjadyii.

¹¹Xiijoty je judíojäy ooy ajcxy jalixtay Jesús, e chi ajcxy yminañ: —¿Ma jada' je Jesús?

¹²Ma je mayjäy ajcxy may anajty ajcxy tzachnigapxcixy tzachnimiydaaccixy Jesús. Nijëjity anajty yminaangixy: “Tüg yëydijc oyjäybi yi'”; e nañ nijëjity yminaangixy: “Ca'p yi' y'oyjäyity, nigo jäy tzachhuin'iiñ.”

¹³E ni pin anajty ca' capxpídzimych mayjäyjoty co y'oyjäyity anajty Jesús, miid co anajty ajcxy je judío ixpicytijc ajcxy tzachtzigiiygixy.

¹⁴E mijxiijoty Jesús ñicxy jim ma Dios ytijc, chi jim ytigiïy yaj'ixpijcpí. ¹⁵Je judío y'ixpicytijc tzachmaañhuindíicxcixy anajty je Jesús, chachminaangixy anajty:

—¿Nej jada' tijy jada chach'ixpicyity? e ca' ni ma ti y'escuel'aty.

¹⁶Chi Jesús y'adzooy:

—Jada ixpijcin ca' iich jada një'adyii. Yi' jada yje' je huidibi xyquejxich ya naaxhuiñ. ¹⁷E pen ji pinjaty cuydunaani yi' ytiy'ajt je huidibi xyquejxich, huinjihuïhuipy yi' jada ixpijcin, pen janch Dios yi' ytiy'ajt, o pen iich yi' ngi'm ayuc huidibi ngapxypich. ¹⁸Je jäy huidibi yci'm'ayuc yci'mdiy'ajt miid yaj'ixpicy, ci'm je' ñaygömaya'ñyii. Janch pinjaty tzojcp co ycömayiïyb je' yhuindzin huidibi ti yquexyii, tiydudägy je', ca' je' y'aniijity.

¹⁹Janch co Moisés miich ajcxy xymoy Dios ytiy'ajt. E ni tüg miich ajcxy mgacuydungixy je tiy'ajt. ¿Ti ycixpi co miich ajcxy xyaj'öga'nich?

²⁰Chi je jäy ajcxy y'adzooy: —Mujcu' miich miid ma mjot mhuinma'n. ¿Pin miich yam xyaj'ögam?

²¹Chi je' ajcxy nimay:

—Miid tügpajc mijhuinma'n tiibi nduñich sábado xii, yi' miich ajcxy mij mdzachjihuiïyb mdzachhuinmaayb. ²²Moisés miich ajcxy xyajnajtz'ane'miïy je cötujein co ajcxy m'ung mdiy'ajttiïygixy (oy je' ca' yajtzondac, miich janchtiy ajcxy mmij'ap mmijteedy Abraham yajtzondac), e paady ycixpi miich ajcxy m'ung mdiy'ajttiïygixy oy yjapocxxiidumity. ²³E chi jada' ca'ydi miich ajcxy Moisés ytiy'ajt mnixiici myajxiici, paady ajcxy m'ung mdiy'ajttiïygixy oy sábado xiijoty. ¿Ti miich ajcxy co xymijotma'tcixich co tüg jäy ti nyajtzögyich sábado xiijoty? ²⁴Ca' m'ix'ijxcixy mba'ijxcixy mmigüg miid anii. Yajciyöyi yajtecyöyi miich ajcxy jäy ypocy miid tiy'ajt.

Ooy ajcxy tzachhuinmay je jāy,
peni Jesús je' je' anajty je Cristo

²⁵Chi ajcxy nijējity Jerusalénjāy
yminañ:

—¿Nej ca' jada jada' yjējity je
huidibi ajcxy yjayaj'ögamyi?

²⁶Oc'ix ajcxy, ta ycapxy ymiydägy
ijxna' que'xna', e ca' ajcxy huam
nimäy. ¿Nej ti jada ajcxy ijxcajpcixy
yajxon tungmiidpi ajcxy co
jada yjējity je Mesías? ²⁷Hich ajt
nnejhuiiyim ma jada yēdyjc chooñ.
Per je Cristo co anajty je' ymiñ, ni
pin je' canejhuñhuipy ma je' anajty
choñ ma ycgajpity.

²⁸Co Jesús jadu'n midooy, co
anajty yaj'ixpicy ma Dios ytiyc,
huin'it Jesús mic yminañ:

—Mnejhuiiyb miich ajcxy pin
iich, e ma ndzooñich. Per ca'p iich
ti nmiñich ya naaxhuñ miid iich
ngi'mdzojcin. Yi huidibi iich ti
xyquexyich, tiydudägy yi' ytuñ, e
ca' miich ajcxy yi' m'ixy'ajtigixy.

²⁹Hich janchtiy n'ixy'ajtypich je'. Je'
co jim ndzooñich ma je', e je' iich
xyquejxich.

³⁰Huin'it ajcxy jamadzaañ, per
ca' ni pin cānixajiy, com ca'ni
anajty paady je xii je tiempo mina
ñaygiyegiiyb ma ymidzip ajcxy.

³¹Per mayjāy ooy mibijcy je Jesús
y'ayuc, e yminañ ajcxy:

—Co anajty je Cristo ymiñ, ca'
jada' nigi mījhuinma'ñ tuna'ñ ca'ydi
jadayaabi yēdyjc.

**Je teedy mījtungmiidpi yquejx ajcxy
soldadotijc huen majtzcixy Jesús**

³²Co je fariseojāy ajcxy ayuc
midooy co jāy chachminaangixy
jadu'n co je Jesús je' je' je' Cristo,

chi ajcxy quejxy tungmiidpi huen
Jesús yajmach. ³³Paady Jesús
yminañ:

—Hich jac-huäcxijpich hueeni ma
miich ajcxy, chi nnicxa'ñich jadüg'oc
jiiby tzajpjoty ma huidibi xyquejxich.

³⁴Xy'ixtähuibich miich ajcxy, e
ca' iich miich ajcxy xypaadipy. Ma
anajty iich nnicxyich, miich ajcxy ca'
jaydēbi jiiby mnicxcixy.

³⁵Huin'it je judío jāy ixpietyijc
acjēyi ajcxy ñay'amidoohui:

—¿Ma jada jada' y'ocnicxa'ñ, e
nicxy iich ajt ngapaatim? ¿Nej
nicxiib jada' ma je judío jāy ajcxy
huidibi yajpaatcixy yxii yaa ma yi
griego jāy ajcxy, e yaj'ixpigaangixy
yi griegos ajcxy? ³⁶¿Nej jada'
yajhuimbizimiy? co yminañ:
“Xy'ixtähuibich miich ajcxy, e
ca' xypaadibich, e ma anajty iich
nyajpaady, ca' miich ajcxy jaydēbi
jiiby mnicxcixy.”

**Je nii huidibi jugy'ajt yejcp
huidibi ca' ycixy ytigoy**

³⁷Co je mījxii ycodiicxni, chi
Jesús ytinay'ahuiy, chi mic yminañ:

—Pen ji pinjaty tiy'ajt nejhuihua'ñ
jadu'n nej ixypiy jāy ytidziyii
tzocy yi nii, huen xyñimiñich,
etz nmöhuibich tiy'ajt. ³⁸Je
jāy ajcxy pinjaty xymibijcpich
xymijpidaacpich, ytunipy
ajcxy jadu'n nej Dios ñecy
yminañ ma jadu'n yjaybetyity:
“Ycapxypidzimipy je' ajcxy Dios
ytiy'ajt, etz mayjāy jotcuyc'ajtin
etz jugy'ajtin pada'ñ huinixii,
ytimynipaaty jadu'n nej nii
ypidzimiy janch com ma tūg niigop.”

³⁹Je' anajty jadu'n Jesús ytiyyp
pinjaty je' anajty mibijcip, je' anajty

ajcxy adigihuaanip jottigihuaanip je Espíritu Santo. Ca' ni anajty je Espíritu ymini ma je discípulos ajcxy com ca'ni anajty Jesús yhuimbityni tzajpjoty.

Jäy ajcxy ca' ñay'ayuc-huinjihuiyi miid Jesús ycixpi

⁴⁰Je mayjäy ajcxy huidibi anajty ti midooy nej Jesús anajty ti ymina'n, nidüg nimetz ymina'n:

— Jadaabi je' je tiydudägyi jäy huidibi Dios y'ayuc najtzcapxiyip.

⁴¹Jacjadyi ymina'n ajcxy:

—Je' yi' je Mesías.

Per nijējity ajcxy huidibi ca' ymibjccixy chachminaangixy:

—Ca' jim Galilea naaxjot chona'n je Mesías. ⁴²Com jadu'n yjaybetyity ma Dios ñecy co je Mesías jim chona'n ma David y'ap y'oc, jim ma je cajt huidi xiijip Belén ma David ycocajpity.

⁴³Je mayjäy ca' anajty ajcxy ñay'ayuc-huinjihuiygixy miid Jesús ycixpi. ⁴⁴Nijējity anajty ajcxy ytimymadzamy Jesús, per ca' ni pin ymajtzi.

Judío ixpicytjic ca' ajcxy mijpidacy Jesús

⁴⁵Chi ajcxy policías huidibi tumb ma tzajptjic nihuimbijty ajcxy je teedy mjtungmiidpi etz je fariseojäy ajcxy, chi ajcxy ñimaayi: — ¿Nej ajcxy co ca' ti mmajtcixy je Jesús?

⁴⁶Chi ajcxy je' y'adzooy:

— Nicaminaaxi tüg yēdjic jadu'n ti ymiydägy jadu'n nej yijiibi yēdjic.

⁴⁷Chi je fariseojäy ajcxy ymina'n:

— ¿Nej nañ ti miich ajcxy myajhuin'ñigixyi?

⁴⁸Ca' nminaanim ti ajcxy teedy mjtungmiidpi o fariseojäy ajcxy mibjccixy Jesús. ⁴⁹Je mayjäy huidibi mijpidaaci Jesús y'ayuc, ca' ajcxy y'ixpicyity ma Dios ycötujcin. Dios yi' ajcxy tzaachytuniib.

⁵⁰Nidügti ajcxy je' anajty je Nicodemo huidibi oga'n'aty ni'oy Jesús coodz, je' ymigügtjic jadu'n nimay:

⁵¹— Jadu'n iich ajt ngötujcin xy'ane'mim co ca' huaad ndzaachytuunim pinjäy, pen ca'p jayijp n'ixyöyım nbayöyım ti anajty ti tuñ.

⁵²Chi ajcxy ymigügtjic y'adzohuimbijty oyñinej:

—¿Nej miich nañ jadu'n galileojäy? Ixta' yajxon ma Dios ñecy, com jiiby mnejhuihuipy co jim Galilea ca' jim chona'n pinjäy huidibi Dios y'ayucnajtzcapxiyip.

⁵³Chi ajcxy ñicxtay nidüg nidüg ma yjiin ydjic.

8 Chi Jesús ypa'ttigiiy ma je cögop huidibi xiijip Olivos. ²Com jabom jopyni Jesús yquidacy jadüg'oc ma Dios ytjic. Chi mayjäy ñimiini. Chi y'ixtacy, e chi ytiigi yaj'ixpijcp. ³Je jäy ajcxy huidibi Dios ycötujcin yaj'ixpijcp etz je fariseojäy ajcxy miidmiin tüg töxyjäy ma Jesús huidibi anajty ti ytundigooy miid huingbi yēdjic. Chi ajcxy pidacy cujc'amy ma je mayjäy. ⁴Chi ajcxy nimay Jesús: —Huindzin, jadayaabi töxyjäy huingbi yēdjic miid ti ytundigoy. ⁵Moisés ytiy'ajt iich ajcxy xyñajtz'ane'miy jecy'ajty co

yajtzaagögädzipy jada jadu'mbi töxyjäy. ¿Nej miich m'ocminambi?

⁶Jadu'n ajcxy nimay co anajty ajcxy oc-huinma'n'ixa'n. Hue' anajty ajcxy ixtaayb nej jëbi huaad yajpocycäy Jesús. Chi Jesús yhuindacy, chi jada' ytigiiy jaaybi miid ycihuäx naaxcäxy. ⁷Com je' anajty ajcxy chachyaj'amidooyb, chi Jesús ytinayigy. Chi ajcxy nimay:

—Pin jäy ji ma miich ajcxy ca' ti pocy miidity, huen y' jayjip tzaagäch jada töxyjäy.

⁸Chi Jesús yhuindacy jadüg'oc. Chi ytigiiy jaaybi jadüg'oc naaxcäxy. ⁹Co ajcxy jadu'n ayuc yajhuinjihuiydaayi, chi ajcxy ooy chöyduñ, com yjihuiy ajcxy ypocy. Chi ajcxy yjihüactay. Chi je mijjäydijc ajcxy ñaybattzondayi. Jesús yhui'miïy nimetz miid je töxyjäy huidibi jim anajty tinaayb huingon. ¹⁰Chi Jesús yhuäccugiy jadüg'oc nimay je töxyjäy jada':

—¿Ma ajcxy je jäy? ¿Ca' ni pin ti yychaachytuñ miid mbocy ycixpi?

¹¹Chi je töxyjäy y'adzooy:

—Huindzin, ca' ni pin.

Chi Jesús yminañ:

—Ni iich miich ngatzaachytunipy miid mbocy ycixpi. Nicx, e ca' m'ocjacpocytuunip.

**Jesús jadu'n nipaady nej
tüg jiin huidibi tiicxp**

¹²Chi jadüg'oc Jesús yjactigiy miydacp yminañ:

—Hich je tiy'ajt nmiid ya ma naaxhuin'yjäy, jadu'n iich nipaady nej tüg jiin huidibi tiicxp ma jäy ajcxy. Pinjäy xymijpidaacpich ymiid tiy'ajt nej jëbi huaad tudägy

chinähuipy, jadu'n nipaady nej jihuiy ytüyöy ma jiin ytiicxin.

¹³Chi je fariseojäy ajcxy nimay Jesús:

—Miich ci'm nayñidiy'ajtip co miich je' je Cristo, e ca' mdiy'ajt chobaady.

¹⁴Chi Jesús y'adzooy:

—Janch co iich ci'm

nayñidiy'ajt'adyiijich co iich je' je Cristo. E iich ndiy'ajt janch y'. Com nnejhuiy'ibich ma ti ndzooñich, e ma nnicxa'n'ich. E miich ajcxy ca' mnejhuiy'igixy ma ndzooñich, e ma nnicxa'n'ich. ¹⁵Miich ajcxy mmigüg mbocy'ijxyp miid ngi'mhuinma'n. Ca' ni pin nbocy'ixyich miid ngi'mhuinma'n'ich.

¹⁶Pen iich anajty nyajcäyöybich nyajtecyöybich jäy ypocy, tiydudägy anajty jadu'n nduñich. Com iich ca' nyajpaadyich naydüg. Je' xymiid'ijtpich je Dios Teedy huidibi ti xyquexyich. ¹⁷Com cojaay jadu'n y'ity ma miich ajcxy mgötujcin ñecy: “Pen nimetz jäy nigodiy'ajt'aty huentiijity, tzoobatp ajcxy y'ayuc.” ¹⁸Hich ci'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtpich, co je' ya ti xyquexyich.

¹⁹Chi ajcxy y'amidooy:

—¿Ma miich mdeedy yajpaady?

Chi Jesús y'adzooy:

—Com co ca' iich miich ajcxy xy'ijxcapy co iich je' je Cristo, nañ ca' ajcxy m'ixy'adyii iich nDeedy. Co ixypy ajcxy xy'ijxcapyich, nañ jaydëbi ixypy ajcxy nejhuiy pin iich nDeedy'ajtpy.

²⁰Jim jadu'n Jesús ycapxy ymiydacy ma je meen'ijttac, co

anajty yjāy yaj'ixpicy ma Dios ytiyc.
E ca' ni pin ymajtzi. Com ca'ni
anajty yxii yhora anajty paadyñi
mina ñaygiyegiiyb ma ymidzip.

**Jesús ñimay ymigiŭgtijc co ca'
huaad ñicxy ma je' anajty ñicxy**

²¹Chi Jesús yjacnimaayi ajcxy:

—Hich nnicxaanip iich, miich
ajcxy xy'ixtāhuiβich. Miid ajcxy
mbocy ycixpi m'ōgaangixy, com ma
nnicxa'ñich ca' huaad miich ajcxy
jēbi mnicxcixy miid mbocy ycixpi.

²²Huin'it je judíoŭy ajcxy ac jēyi
ñayñimaayi:

—¿Nej nicxy jada' ci'm
ñayyaj'ōga'ñiyiŭ? Com jadu'n
ymina'ñ co ma y' ñicxy, ca' huaad
iich ajt jēbi nnicxim.

²³E Jesús ñgi nimay'idich anajty:

—Miich ajcxy ya naaxhuiñ
mmiidity mdiy'ajtcop. Hich tzajpjoty
nmiididyich ndiy'ajtcopich.
Miich ajcxy naaxhuiñyāy ajcxy
ytiy'ajt mmijpidaacipy. Hich ca'
nmijpidāgyich naaxhuiñyāy
ytiy'ajt. ²⁴Hich miich ajcxy
jadu'n nnimaayb co m'ōgam
miich ajcxy, e ca' ajcxy Dios
mbocy xyhuinmeecxip. Copicy
ajcxy m'ōgipy, e ca' Dios mbocy
ajcxy xyhuinmeecxip, pen
ca' xymibigāangixyich co iich
je' je huidibi jēbi mbocy ajcxy
xyhuinmeecxip.

²⁵Chi ajcxy nimay Jesús:

—¿E miich, pin miich?

Chi Jesús y'adzooy:

—Ti ajcxy nyajnimaaŭgixy
pin iich, co oga'n ndigiiyich
jāy yaj'ixpiŭcpi. Cham jadug'oc
nyajnimaaŭgixy. ²⁶May ooy tijaty
ayuc nyajnimāhuaangixy nej ti

mdundigooygixy ma Dios ytiy'ajt.
Cham ca' ajcxy nyajnimaydāhuiŭy.
Je huidibi ti xyquexyich ya
naaxhuiñ je' tūg'óciy tiy'ajt miid. E
ngapxpīdzimiyich je ayuc je tiy'ajt
jēyi huidibi ti nmidooyich ma je'.

²⁷Je jāy ca' ajcxy huinjihuŭy co
Dios Teedy anajty Jesús ñigapxyp.

²⁸Paady Jesús nimay ajcxy:

—Co anajty miich ajcxy ti
xyajcruudzpetyich, iich je jāy
huidibi tzoon tzajpjoty, huin'it
miich ajcxy mnejhuñhuŭy co
iich je' je Cristo. E co iich ca'
ngi'mhuinma'ñ nduñich. Yi' iich ya
nmiydacypich huidibi Dios Teedy
ti xyaj'ane'myich. ²⁹Je Dios Teedy
huidibi ti xyquexyich, yi' iich miid
n'ityich. Ca' iich yi' xy'ixmachich.
Com co iich njatytimyutybich
jabom jabom huidibi y' chojcyp.

³⁰Co Jesús jadu'n ymina'ñ, chi
mayjāy ooy ymibijcy.

**Jāy huidibi mibijcp Jesús
ycuychīnaayipy yi' ytiy'ajt**

³¹Chi Jesús nimay je judíoŭy
ajcxy huidijaty anajty ti ymibicy:

—Pen mmibijc ajcxy cixyot
huinijot tūg'óciy iich n'ayuc, e
ca' m'ijxmadzipy ajcxy iich
n'ayuc, huin'it iich miich ajcxy
jēbi njāy'adyi. ³²Huin'it jēbi ajcxy
mnejhuñhuŭy Dios ytiy'ajt. E. Dios
ytiy'ajt xyñihuaangixip ma je
mjibic-huinma'ñ ooy xy'ané'mgixy.

³³Chi ajcxy y'adzooy:

— Abraham iich ajcxy nmij'ap
nmijteedy'ajtpy. Ca' iich ajcxy
huaad ni pinjāy xyjac'ane'my. ¿Nej
co miich jadu'n mina'ñ: “Dios ajcxy
xyñihua'ñip ma yi mjibic-huinma'ñ
xy'ane'mgixy”?

³⁴Chi Jesús y'adzooy:

—Janch janch iich miich ajcxy jadun nimaaygixy co tūg'óciy pinjaty pocy ytundiib, jibicp yi' ane'mip. Tim jadun nipaady nej tūg tumbi huidi codoogŷ y ijtp, yi' yhuindzin jatytimy'ane'mip. ³⁵Yi tumbi huidibi codoogŷ ijtp, ca' yhui'ma'ñ ma je jāy ytijc huinixii. Yi jāy y'ung janchtiy hui'mam huinixii ma yteedy ytijc. ³⁶Pen Dios y'ung miich ajcxy xyajpidzimgixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ané'mgixnipy. Tim jadun nej Dios y'ung y'ity, ca' ti jibicpi y'ane'myii. ³⁷Nejhuiybich co miich ajcxy Abraham mmij'ap'adyii mmijteedy'adyii. Per miich ajcxy chachyaj'ōgaambich. Je' co ca' mijpidaaccixy iich n'ayuc huidibi njayajnimaaigixyp. ³⁸Iich miich ajcxy nyajmiidmiydaacyp tiibi n'ixyich huidibi ndeedyich ytumyb. E miich ajcxy yi' mdumyb nej m'ap mdeedy ti xyajnimaaigixy.

³⁹Chi ajcxy y'adzooy:

— Hue' iich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

— Pen janch ajcxy Abraham mmij'ap'adyii mmijteedy'adyii, yi' ixypy ajcxy mdungixyp jadun nej Abraham tuuñ. ⁴⁰Janch iich miich ajcxy xychachyaj'ōgāangixyich, e ti ajcxy njayajnimāy je huidibi iich ti nmidooyich ma Dios. Ca' Abraham yaj'ōgy je jāy ajcxy huidijaty anajty Dios ytij'ajt miid, jadun nej miich ajcxy m'iditzaangixy. ⁴¹Miich ajcxy jibic-huinma'ñ mdungixyp, tim jadun nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca'iich ajcxy ndigoy'ungity. Je' tūgpajc iich ajcxy ndeedy'ajtyp Dios Teedy.

⁴²Chi Jesús yminañ:

—Peni Dios ixypy ajcxy mdeedy'ajtyp, xychojcpich xymijpidaacpich ixypy ajcxy. Com Dios ti xyquexyich ya naaxhuiñ, e jiiyby ndzooñich ma Dios. Ca'iich ngi'mdzojcin ycixpi nmiñich ya naaxhuiñ. Yi' je' jadun tzojcp pin ti xyquexyich. ⁴³¿Ti co ca' miich ajcxy mhuinjihuŷ iich n'ayuc? Je' co ca' ajcxy midohuaangixy iich n'ayuc. ⁴⁴Je' miich ajcxy mdeedy'ajtyp je mujcu'. Miid mgi'mdzojcin mguydungixy je mujcu' chójcin. Je mujcu'yaj'ōctiŷy yi' jāy maabi naaxhuiñybi chondāgy. Je mujcu' ca' je' ixaani Dios ytij'ajt. Ca' ni ti tiy'ajt yajpaady ma je', com je mujcu' indaac je', chi ci'm ooy nijot y'idich. Je' ooy indacy, e je' oga'n anii yajtzondac. ⁴⁵Com miich ajcxy mujcu' yhuinma'ñ miid, paady miich ajcxy ca' xymibijci xymijpidaaci n'ayucich co iich tiy'ajt njamiydāgy. ⁴⁶Ni pin miich ajcxy xycayajpocycāhuipy. Peni tiy'ajt iich miich ajcxy nyajnimaaŷy, ¿ti co ca' mmijpidaaccixy iich n'ayuc? ⁴⁷Je jāy ajcxy huidibi yajpatp ma Dios, y'amido'ijtyp ajcxy Dios y'ayuc. Paady miich ajcxy ca' m'amido'ijtcixy Dios y'ayuc, com ca' ajcxy Dios mDeedy'ajtigixy.

**Jesús jiiyim anajty yjugy'aty
ca'ydi Abraham**

⁴⁸Chi je judío xpicityijc ajcxy y'adzooy:

— Ti iich ajcxy yajxon nmīna'ñ co miich mgogajpity jim Samaria,

e mujcu' miich miid ma mjot mhuinma'ñ.

⁴⁹Chi Jesús y'adzooy:

— Ca' iich mujcu' nmiidity ma njot mhuinma'ñ, com nyajmij'ajtypich nDeedy, e miich ajcxy xy'ixtijpich. ⁵⁰ñich ca' ci'm naygömayijich. Dios Teedy iich xycömaayb, com yi' je' huidibi ixyöyp payöyp jäy ajcxy ypocy. ⁵¹Janch janch iich miich ajcxy nimaaygixy co ji nijëjity jäy huidibi iich n'ayuc cuydumb, e ca' yi' ajcxy yjugy'ajtin ycixipy ytigoyipy tücc'i'yi co y'ó'ccixipy.

⁵²Chi je judío xpicitytjic ajcxy y'adzooy:

— Cham iich ajcxy janchtiy ti nnejhuiyich tiydudägy co miich mujcu' miidity ma mjot mhuinma'ñ. Abraham o'c je', nañ jadu'n o'c ajcxy je huidibi anajty Dios ytiy'ajt capxhuäcxip, e miich mmina'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³¿Nej mjacmiid miich mic'ajt, ca'ydi Abraham, iich ajt nmij'ap nmijteedy huidibi o'ci? ¿Nej mjacmiid miich mic'ajt, ca'ydi ajcxy huidibi Dios y'ayucnajtzcaxi'y, huidibi ajcxy o'ci? ¿Pin miich mdimnaydijyii?

⁵⁴Chi Jesús y'adzooy:

— Pen iich nnaygömayibich ci'm, ca' n'ayucich chobaadipy. ñich nDeedy yi' xycömayipich, je huidibi miich ajcxy mdijpy co ajcxy mDios'adyii. ⁵⁵Per miich ajcxy ca' Dios m'ixy'adyii. ñich janchtiy n'ixy'ajtypich Dios. E co ixyipy nmina'ñich co ca' iich Dios n'ixy'adyii, indaacpich ixyipy, jadu'n nej miich ajcxy

m'indaaccixy. Janch iich n'ixyich Dios, e nguydumyibich yi' y'ayuc.

⁵⁶Je Abraham, miich ajcxy mmij'ap mmijteedy, jotcuyc ooy ñayjihuiyi co anajty ixa'ñ iich nxii ndiempo ya naaxhuiñ. E co ijxy co iich nmiinich, chi ooy yjotcugiiy.

⁵⁷Chi je judío xpicitytjic ajcxy nimay Jesús:

— Ni mgamiidity huixchigui'px majc jimijt, e ¿mmina'ñ co m'ijxy Abraham? (Ca' m'ixy'ajti je Abraham, naxy tüg mil jimijt maabi je' y'o'cni.)

⁵⁸Chi Jesús y'adzooy:

— Janch janch iich miich ajcxy jadu'n nimäy co ji anajty iich co ca'ni anajty Abraham yma'xung'aty.

⁵⁹Chi ajcxy tzaa conigy tzaagädza'ñ anajty ajcxy. Chi Jesús yhuingoyüch, e ypidzimy ma Dios ytiyc.

Jesús yajtzooc tüg huintzpi

9 Hue' anajty Jesús huidijtp co ijxy tüg huintz, jadu'n anajty huiintz ti yma'xung'aty. ²Chi ydiscípulos ajcxy y'amidoohui:

— Huindzin, ¿pin pocy ytuun, jada huintzpi o ytaj yteedy, co huintz yma'xung'aty?

³Chi Jesús y'adzooy:

— Ca' yi' ypcocytuun, ni ytaj yteedy, hue' janchtiy paady ycixp jadu'n yjajty, jigix Dios ymic'ajt ñiguëxigity ma yi'. ⁴Copicy njactúunibich yi' ytung huidibi ti xyquexyich ya naaxhuiñ. Miinip je xii tiempo ma ca' pin Dios y'ayuc tunaani. Jadu'n nej jihuiy ixyipy je xiimbi ti ñaxy etz je coodzpí ti ymiiñ. ⁵Jadu'n nej n'ityich ya naaxhuiñ nmiidich Dios ytiy'ajt,

jadu'n iich nipaady nej tüg jiin
huidibi codiicxp yi naaxhuiñyäj.

⁶Co Jesús jadu'n yminanday, chi
nidzujiiy naax, chi mo'ntz yaj'oyiiy
miid chujnii, chi jada' yajjaaxi je
jây yhuuin miid je mo'ntz. ⁷Chi
nimay jada':

—Nícx quejtzpuj yi mo'ntz jim
ma yi Siloé nii y'abojtzigity —je
ayuc Siloé jadu'n yhuimbizimy:
quexyöybi.

Chi je jây huintzpi ñicxy jim, chi
oy quejtz puji je mo'ntz, chi oy
huimbity ti anajty yhuindicxgy.

⁸Je ymijiin ymidijc ajcxy etz
tüg'óciy huidijaty anajty ajcxy ti
ixy je huintzpi co jabom jabom
iñây limosna yajmucy, chi ajcxy
ñay'amidoohui miñ xyipy:

—¿Nej ca' jada yjējity je huintzpi
huidibi anajty jabom jabom
limosna yajmucpi?

⁹Nijējity ajcxy yminañ:

—Je' yi'.

E jacjadyii ajcxy yminañ:

—Huingbi yi', nigoob jadu'n
yquëxgy nej je'.

E je' yminañ ci'm:

—Iich jëdu'n huidibi anajty huintz.

¹⁰Jadu'n anajty ajcxy

tzach'amidooy:

—¿Nej yi mhuuin ti ñay'ahuäcxyii?

¹¹E je' anajty y'adzooy:

—Yi yëydijc huidibi ajcxy
ytijyp Jesús, yi' mo'ntz yaj'oyiiy
xyajjaaxich nhuiin, e chi
xyñimaayich: “Nícx quejtzpuj
ma yi Siloé nii.” Chi nnicxyich,
e oy nguejtzpujyich, e chi
nhuindicxi'cyich.

¹²Chi ajcxy je' nimay:

—¿Ma je' je yëydijc?

Chi je huintzpi y'adzooy:

—Ca' nnejhuiyich.

**Fariseojây tiy'ajt pijcy nej je
huintzpi anajty ti chögy**

¹³Chi ajcxy yajnicxy ma fariseojây
ajcxy yhuinduu, je huidibi anajty
huintz yajpatp. ¹⁴Hue' anajty tüg
sábado xii (judíoajây ajcxy amayxii)
co Jesús mo'ntz yaj'oyiiy, e
yajhuindicxgy je huintzpi. ¹⁵Chi je
fariseojây ajcxy jadüg'oc yajtiy nej
anajty je jây ti yhuindicxgy. Chi je
jây y'adzooy:

—Mo'ntz ti pidägy ma iich nhuiin,
chi iich ti nguejtzpuji, e cham
n'ijxnibich.

¹⁶Nijējity fariseojây ajcxy yminañ:

—Yi yëydijc huidibi jada jadu'n
ti tuñ, ca' yi' Dios ytiy'ajt miidity,
com ca' yi' amay'aty sábado xii.

Chi ajcxy jacjadyii y'adzooy:

—¿Nej tijy jada mijhuinma'ñ
octuñ, pen hue' yi' pocyjây?

Ca' ajcxy nay'ayuc-
huinjihuñyigixy. ¹⁷Chi ajcxy
jadüg'oc nimay je jây huidibi anajty
ti y'ijxgy:

—E miich, ¿nej m'ocminambi?

¿Pin jây yi tiibi xyajhuindicxgy?

Chi je jây y'adzooy:

—Tüg jây huidibi Dios y'ayuc etz
ymic'ajt miid.

¹⁸Chi je judío xpicityijc ajcxy
ca' anajty tim mibigaangixy co je
yëydijc anajty huintz yajpaady, e co
anajty ti yhuindicxgy, ixti cooni
ajcxy ytaj yteedy mijhuoohui. ¹⁹Chi
ajcxy amidoohui ytaj yteedy:

—¿Nej je' jada miich ajcxy m'ung
huidibi huintz ma'xung'ajti? ¿Nej
jada ti yhuindicxgy?

²⁰Chi je' ytaj yteedy ajcxy
y'adzooy:

—İich ajcxy nnejhuiyb co iich ajcxy yi' n'ung, e co yma'xung'ajty huiintz. ²¹Per jadu'n nej cham ti yhuindicxıy, e pin yi' yhuin ti yajhuäcxyii, ca' iich ajcxy yi' nnejhuiygıxy. Amıdoo miich ajcxy yi' ci'm. Mij'anäciñ yi', ñigapxıpy yi' ci'm.

²²Jadu'n ajcxy ytaj yteedy y'adzooy, miid co ajcxy tzachtzigııygıxy je judıo xıpcıytıjc ajcxy. Com je judıo xıpcıytıjc ajcxy ti anajty ñaygäpxıgıxy co anajty yajpidzımaangıxy ma ajcxy ñaymujctac je jäy ajcxy pinjaty anajty mibıjcp co Jesús anajty yjējıty je Cristo. ²³Paady ajcxy ytaj yteedy yminañ:

—Mij'anäciñ yi', amıdoogıx miich ajcxy yi' ci'm.

²⁴Chi ajcxy y'amıdooy mimejtz'oc je yēydıjc huidibi anajty ti y'ıjxıy, e chi ajcxy nimay:

—Cömay capxpat yi Dios co ti mdzöy. Ca' mgömay mgapxpaady je Jesús. Com iich ajcxy nejhuiyb co yi Jesús, tüg yi' pocytumbi. Ca' yi' Dios y'ayuc ytiy'ajt miidıty.

²⁵Chi je jäy y'adzooy:

—Pen tüg pocytumbi yi Jesús, ca' nejhuiyich. Huidibi janchtiy nnejhuiybich, co anajty iich nhuintzıty etz co cham huındıcxnıbich.

²⁶Chi ajcxy y'amıdooy jadüg'oc: —¿Nej ti xytuñ? ¿Ti ti tuñ co ti xyaj'ıjxıci yi mhuin?

²⁷Chi je' y'adzooy:

—Ti ajcxy nyajnımaaygıxy, e ca' ajcxy ti m'amıdo'ıdaangıxy. ¿Nej nañ xıpıgaangıxy miich ajcxy ma yi'ji?

²⁸Chi ajcxy je' oıy, nimay ajcxy jadu'n:

—Miich xıpijc ma yi', iich ajcxy n'ıxpıjcpıch ma Moisés ytiy'ajt.

²⁹İich ajcxy nejhuiyb co Dios Moisés migapxy. Janch yi Jesús ca' iich ajcxy nnejhuiygıxy ma yi' chooñ (ma mic'ajt ti paady).

³⁰Chi je jäy y'adzooy:

—Ooy yi' y'oychıgiıyñıty y'oyhuinma'ñıty co miich ajcxy ca' mnejhuiygıxy ma yi' chooñ (ma mic'ajt ti paady), e ti iich yi' xyajhuındicxıyich. ³¹Yajxon yajnejhuıy co Dios ca' yi' midoohui pocyjäydıjc y'ayuc. Pen oy jäy iich ajt, e nguyduunim Dios ytiy'ajt, huin'it ajt Dios n'ayuc xymıdoohuım. ³²Ni camınaaxıi ycayajmıdoy, co pinjäy tüg huıntzpi ti yaj'ıjxıy huidibi jadu'n ti yma'xung'aty huıntz. ³³Co xıyıpy je Jesús ca' jııby chooñ ma Dios, ca' xıyıpy jaty nej ti tunıpy.

³⁴Huin'it ajcxy y'adzooy:

—Miich jadu'n ti mma'xung'aty pocymıid. Ca' miich huaad ti xyaj'ıxpıjccıxyich.

E chi ajcxy yajpidzımy tibäy'tücü'yi (ma ajcxy ñaymujctac etz ma Dios ytiyc).

**Je jäy ajcxy huidibi ca' cöbıjccıxy
Dios ytiy'ajt jadu'n nıpaady
ajcxy nej jıhuıy huıntzıty**

³⁵Chi Jesús nejhuiy jadu'n co anajty ti yajpidzımy tıba'y tücü'yi ma Dios ytiyc. Co mınaaybaati chi nimay:

—¿Nej mmıbıjcyp mıjpıdaacyp miich je jäy huidibi tzoon tzajpjoty?

³⁶Chi je' y'adzooy:

—Huindzin, nimaaygich pin je', jigix nmibicyich.

³⁷Chi Jesús je' y'adzooy:

—M'ijxyp y'i'du'n yam. Yi je' je huidibi xymiidmiydacp.

³⁸Chi jada' huingoxtinay'ahuiy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹Chi jada' Jesús yminañ:

—Iich ti nmiñ ya naaxhuiñ co n'ixyöyaanich nbayöyaanich jäy ypocy, jigix nyajpocycähuibich pin ca' ypocymiidity, etz nyajpocyñihuádzibich pin ypocy miid. Jadu'n nej jihuüy nyajhuindzäyich je jäy huidibi ijxp, etz jadu'n nej jihuüy nyajhuindixigiyich yi huintzpi.

⁴⁰Chi nijējity fariseojäy huidibi anajty jim ma Jesús ymijc jadu'n midoy nej Jesús yminañ, chi ajcxy nimay Jesús:

—¿Nej nañ jadu'n miich mdijy iich ajcxy ca' Dios ytiy'ajt nejhuuiyich, jadu'n nej jihuüy iich ajcxy nhuintzity?

⁴¹Chi Jesús y'adzooy:

—Co ixypiy miich ajcxy janch janch ca' mnejhuuiygixy Dios ytiy'ajt, ca' ixypiy ti pocy ajcxy mmiidity. Per miich ajcxy minam co Dios ytiy'ajt mguyduuniy, e ca' yjanchity. Paady ajcxy mbocymiidity. Nipaaty jadu'n nej jihuüy miich ajcxy mhuintzity, e mminaangixy co m'ijxcixy.

Jesús yaj'ixpijc jihuimbit ayuc

10 Chi Jesús jacnimay je judío y'ixpicytjic, je fariseojäy ajcxy:

—Janch janch iich miich ajcxy yam jadu'n nimaaygixy co je jäy

ajcxy huidibi ca' ytigihuaangixy ma borregi agaj aguu (ma je cuend'ajtpi ycuend'aty), huidibi huingduum ameech tzach tigihuaam ma yborregi agaj, je' je' je meetzpi huidibi meedzam je borregi ajcxy ameech. ²Je jäy huidibi tigihuam ma yborregi agaj aguu, je' je' je borregi cuend'ajtpi. ³Co je borregi cuend'ajtpi ymiñ ma agaj aguu, chi je agaj aguu cuend'ajtpi yaj'ahuäch je agaj aguu. Chi yborregi ajcxy yöcmidoyii, chi je' migapxy xiibety xiibety, chi yajpidzimy ajcxy. ⁴Co ajcxy yajpidzimdäy, ac je' yje', chi jayijp ñicxy, e axam ajcxy ypanicxyii, com je' co yöcmidoyii. ⁵Ca' je borregi ajcxy jēbi panicxy tūg huingjäy. Nīgi ajcxy cōguēgy, com yöcmidooyb ajcxy co yhuingjäyity.

⁶Jadu'n Jesús mayjäy yaj'ixpijcy jihuimbit'amy, jaygue' ajcxy ca' huaad huinjihuüy nej anajty Jesús yjaminānañ.

Jesús je oybi cuend'ajtpi

⁷Chi ajcxy Jesús jadüg'oc ñimaayi:

—Janch janch iich miich ajcxy yam jadu'n nimaaygixy, co je Dios nDeedy'ajtypich. Jēbi jäy ajcxy paady Dios ytiy'ajt ma iich, e huin'it ytigiygixipy ma Dios y'it. Jadu'n nipaady nej jihuüy iich je agaj aguu ma borregi ajcxy ytigiygixy. ⁸Tüg'óciy je huindzindijc huidibi ajcxy miin jayijp ca'ni iich anajty nmiñich, e yminaangixy anajty co ajcxy miid'ajti Dios ytiy'ajt, jadu'n je' anajty ajcxy nej meetzpi huidibi meedzaanip Dios yjäy. Per je Dios yjäy ca'p je' ajcxy tuuñ

cuendi, jadu'n nej je borregi ca' yöcmidoogixy je meetzpi. ⁹Jadu'n nej je borregi ajcxy ytigiiygixy ma agaj aguu, nañ tim jadu'n jäy ajcxy paady Dios ytiy'ajt ma iich. Je jäy ajcxy huidibi ypaatyp Dios ytiy'ajt ma iich, nañ ypadaamy jugy'ajtin huidibi ca' ycixipy ytigoyipy tücc'i'yi. E huidibi je' ajcxy yajmayajtyp ma yi chinaayin, nmöhuibiyich. Tim jadu'n nej borregi ajcxy jabom jabom ypidzimgixy ma agaj aguu nicxcixy miy'ojcpi, etz yhuimbijtcixy tzuu tzuu.

¹⁰Yi meetzpi ajcxy mimb co ymeedzaangixy yaj'ögaangixy yajhuindigoyaangixy. Iich ti nmiñich, jigix miich ajcxy mbáatcixipy jugy'ajtin mijcajee huidibi ca' tücc'i'yi ycixipy ytigoyipy.

¹¹Chi Jesús yjacminañ: —Iich jadu'n nipaady nej tüg borregi cuend'ajtpi oybi. Je oybi borregi cuend'ajtpi ycïeyecyp yi' yjugy'ajt ma yi o'cin miid yborregi ycixpi. ¹²Je borregi cuend'ajtpi huidibi mujuy tumb, huidibi ca' yci'mborregi cuend'aty, ni ycajëjity je borregi yhuindzin, co ixycaa ymiñ, chi cöguëgy je borregi, e yajqueec-huäcxtäy. ¹³Com je' co mujuy ytuñ, paady cöguëgy je borregi ajcxy, ca' tzocy jihuüy borregi.

¹⁴Tim jadu'n nej je oybi borregi cuend'ajtpi ijxcajptäy je' yborregi, nañ tim jadu'n iich n'ijxcajptäy je njäyich (huidibi xymijpidaacpich), etz je' ajcxy xy'ixy'ajtpich. ¹⁵Tim jadu'n nej Dios Teedy xy'ixy'adyiijich, nañ

tim jadu'n n'ixy'adyiijich Dios Teedy. Tim jadu'n je' nej je oybi borregi cuend'ajtpi ycïeyegamy yjugy'ajtin miid yborregi ycixpi. Nañ tim jadu'n iich ngïyegamyich njugy'ajtin miid iich njäy ajcxy ycixpi. ¹⁶Nmiidich jadügpiçy jäy, ca' ajcxy yjudiojäyity, je' ajcxy nañ jadu'n nmiid'idaamyich tügmucy (miid je judío jäy ajcxy huidibi xymijpidaacpich). Tim jadu'n nej je cuend'ajtpi ymiid'ajtyp je' yborregi ajcxy tügmucy. E je' ajcxy y'amidoo'idaamy iich n'ayuc, tim jadu'n nej borregi ajcxy yöcmidoogixy yhuindzin. Ji y'idipy tügmucy jäy (huidibi xymijpidägibich), etz tüg cuend'ajtpi (iich jëdu'n).

¹⁷Chi Jesús yjacminañ: —Paady ycixp Dios Teedy ooy xychocyich xyjihuiyich, co ngïyegaamyich njugy'ajtin ma yi ó'cin (miid jäy ajcxy ypocy ycixpi), etz njugypigipyich jadüg'oc. ¹⁸Ca' ni pin xypijcibich yi' njugy'ajtin, iich yi' ci'm ngïyegamy. Nmiidich mic'ajt nej ngïyegipyich njugy'ajtin, etz nañ nmiidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹Chi jadüg'oc ajcxy ca' nay'ayuc-huinjihuiyi je judíojäy ajcxy miid Jesús y'ayuc ycixpi. ²⁰Mayjäy yminañ:

—Ca'oybi yi' ymiid, locjiyib yi', ñnej co ajt n'amido'ijtim y'ayuc?

²¹E jacjadyi ajcxy yminaangixy:

—Jadayaabi tiy'ajt etz mic'ajt ca' yajpaady ma tüg jäy huidibi mujcu' ymiid. Ca' jëbi tüg mujcu' jäy huintzpi yaj'ixigy.

May judíojäy ajcxy ca' cöbījcy Jesús

²²Jim Jerusalén anajty xii yjadyii, je' anajty ajcxy ñixiidumyb jimijt Dios ytijc. ²³E hue' anajty tiich tiempo. Chi jim anajty Jesús yhuidity ma Dios ytijc, ma je Salomón ytijc-huinduu. ²⁴Chi ajcxy je judío y'ixpicytije nimujcy ooy Jesús, nimay ajcxy:

—¿Ixti minaaní miich iich ajcxy tiydudägy xyajhuinji huíhuáangixyich pen miich je' je Cristo?

Yajhuinji huígyich ajcxy tiydudägy.

²⁵Chi Jesús y'adzooy:

—Ti ajcxy nyajnimaaaygixy, e ca' miich ajcxy ti nmibijccixy. Je mijhuinma'n huidibi ndumybich nmiidich nDeedy ymic'ajt, yí' je' nidiy'ajt'ajtp co iich je' je Cristo. ²⁶Paady ycixp miich ajcxy ca' mmibijccixy, com ca' miich ajcxy njäy'adyiijich. ²⁷Hich njäy ajcxy ymijpidaacyp iich n'ayuc, e n'ijxcajpich ajcxy je', e je' ajcxy xypanicxpich. Tim jadu'n nej je borregi ajcxy yöcmidoy je yhuindzin, jadu'n nej je huindzin ijxcapy je' yborregi, e jadu'n nej yí yborregi ypanicxyii. ²⁸Hich njäy ajcxy nmooybich yí jugy'ajtin huidibi ca' tüccí'yí ycixa'n ytigoya'n. Ca' je' ajcxy yjugy'ajtin ytigoyipy ni camina, e ni pin ca' huaad je' ajcxy xypijcich. Je' ajcxy ci'am nmiididyich. ²⁹Yí Dios Teedy huidibi iich njäy ti xymöy, tügpajc yí' ymijity, e ni pin huaad ni ti capíjciy huidibi Dios Teedy ymiid ci'am. ³⁰Dios Teedy etz iich tú'ciy iich ajcxy.

³¹Chi je judíojäy ajcxy jadüg'oc tzaa conig cädzaangixy anajty ajcxy.

³²Chi Jesús je' ajcxy nimay:

—Ti iich ooy mij oybi nduñich ma miich mhuinduu miid je nDeedyich ymic'ajt ycixpi. ¿Huidi ycixpi miich ajcxy xychaagädzaangixyich?

³³Chi je judío ixpicytije ajcxy y'adzooy:

—Ca' nminaanim paady iich ajcxy miich ndzaagädzaangixy miid je oybi tiibi mduñ, hue' janchtiy ycixpi ndzaagädzaangixy miid co ooy Dios myajjotmädy. Com miich nañ jäy, e mnayyajnaxyii Dios.

³⁴Huin'it Jesús je' ajcxy nimay:

—Jadu'n ycojaayity ma yí judíojäy ajcxy ytiy'ajtnecy, ma Dios jadu'n ymina'n: “Jadu'n nej dios miich ajcxy.” ³⁵Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huidibi Dios y'ayuc cöbījcip (e ca' huaad pinjäy ymina'n co Dios ñecy ca' yjanchity). ³⁶Dios ti xyajniibicyich jada tung, e xyquejxyich ya naaxhuin. ¿Nej co mminaaangixy co iich ngapxtigooyich co nmina'ñich co Dios xy'ung'adyiijich? ³⁷Pen ca' nduñich nDeedyich ytung, ca' iich ajcxy huaad n'ayuc xymibijcich. ³⁸E pen ndumybich nDeedyich ytung, oy ixypiy miich ajcxy ca' xymijpidaacich n'ayuc, jēbi ixypiy mijpidägy ajcxy je mijhuinma'n huidibi ndumybich. E chi mnejhuíhuipy miich ajcxy, etz mmijpidägipy miich ajcxy co je Dios Teedy yajpaady ma iich, e iich nyajpaadyich ma Dios Teedy.

³⁹Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰Chi Jesús ñicxy jadüg'oc jim Jordán mij nii nínaxy ma Juan yjäy yajniibejty oga'n'aty, chi jim

yhui'miïy. ⁴¹Mayjäy Jesús ooy ñimujci, e yminañ ajcxy:

—Je Juan el Bautista ca' jadu'n ooy mïjhuinma'ñ tuuñ, per tüg'óciy yi tiy'ajt jadu'n nej nimiydactay jada Jesús, janch tiy'ajt je'.

⁴²E janch mayjäy ooy mibijcy Jesús jim ma je jimbí it.

Co Lázaro y'o'cy

11 Jim Betania anajty tüg pa'mjäy, hue' anajty yxii Lázaro. Hue' je' anajty chinäy ma María etz Marta ycgajpity. ²María je' anajty huidibi je Huindzin Jesús anajty ti yajjaxy je ujtzpíjyñi huidibi ooy oy yxuugy, etz po'ti Jesús ytecy miid ycöhuay. Hue' je' anajty María etz Marta ymidügquëx Lázaro huidibi anajty pijcip. ³Chi Lázaro ymidügquëx ajcxy ycapxyquejxy ma je Huindzin Jesús anajty yajpaady, e chi oy yajnimäyii:

—Je mmigüg huidibi ooy mdzocy, pijcip je'.

⁴Co Jesús jadu'n midooy, chi yminañ:

—Je' ypa'm ca' yaj'öga'ñyii tücci'yi. Je' ypa'm hue' yajnigüëxigamy Dios ymic'ajt, jaydëb Dios ycömaybidzimipy, e nañ iich nyajcömayipyich, iich je jäy huidibi tzoon tzajpjoty.

⁵Jesús ooy anajty tzocy jihuïy je Marta, María etz je Lázaro. ⁶Oy jadu'n Jesús nejhuïiy co anajty Lázaro ypigyii, jamejtz xii jim yjacxiinajxy ma anajty yajpaady. ⁷Huin'it Jesús nimay ydiscípulos ajcxy:

—Tzoc jamim jim Judea naaxjot.

⁸Chi je' ydiscípulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e ñmnicxaanip jim jadüg'oci?

⁹Chi Jesús y'adzooy:

—Majmetz hora tüg xiimbi miidity. Pinjäy miid Dios ytiy'ajt, ca' ayo'n pada'ñ, tim jadu'n nej jihuïy yhuidity xiim, e ca' ycönepy, com co xii codiicxy jada naaxhuïnybi. ¹⁰Pinjäy ca' miidity Dios ytiy'ajt, ca' je' nejhuïy ti anajty jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy miid co ca' anajty ixy ma ñicxy.

¹¹Huin'it Jesús je' ajcxy nimay: —Iich ajt nmigüg Lázaro maab je', nicxy nyajpidiga'ñich.

¹²Chi je' ydiscípulos ajcxy y'adzooy:

—Huindzin, pen maab, huaadjihuïijhuip yi', ci'm yi' ymäyhuijipy.

¹³Je' Jesús anajty ñimiyaacyp je o'cin, e je' ajcxy tijy Jesús ñimiyaacyp je mähuii. ¹⁴Chi Jesús yajmiidmiydacy ajcxy tiydudägy, yminañ:

—Lázaro ti je' y'o'cy. ¹⁵E ooy njotcújcidyich miid miich ajcxy ycixpi co anajty iich ca' njimity, jigix ajcxy mmibigipy co Dios ymic'ajt nmiididyich. Tzoc ajt jamim jim Betania.

¹⁶Tomás huidibi anajty ajcxy yxiigoyaaxyp Dídimó, huidi ayuc-huimbizim: cuate, nimay jacjadyii Jesús ydiscípulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy miid Jesús.

**Jesús yajjugypigipy je jäy ajcxy
etz möhuipy ajcxy jugy'ajtin**

¹⁷Co ajcxy jim yja'ty, chi ajcxy paty tiy'ajt co mimidaaxxiibi anajty maabi Lázaro ñaaxtigy. ¹⁸Betania ca' anajty ooy yjiguëgyity miid Jerusalén, jëyi jada' anajty miidity tugüig kilómetro. ¹⁹May judíojäy ajcxy anajty ti ymiingixy ma Marta etz María, yajjotcugihua'ñ ajcxy miid je' ymiguëx ycixpi co anajty ti y'ögy. ²⁰Co nejhuiy Marta co Jesús anajty jim ymiñ, chi nidzooñ oy jijpcobadiy. E María jim yhui'miyy ma ytjc, tigoty anajty iñäy. ²¹Chi Marta Jesús nimay:

—Huindzin, co ixypy miich ya anajty myajpaady, ca' ixypy ti y'ögy nmiguëxich. ²²Per nnejhuiybich co miich cham jëbi Dios mmibijctzoy, e xymöhuip ti mdimdzojcyp.

²³Chi Jesús y'adzooy:

—Je mmiguëx jugypigip jadüg'oc.

²⁴Chi Marta y'adzooy:

—Nnejhuiybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

²⁵Per huin'it Jesús y'adzooy:

—Iich je' nayjugypigipyich je jäy ajcxy, e nmöhuibyich ajcxy jugy'ajtin. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶E tüg'óciy pinjaty ajcxy xymibijcp xymijpidaacpich juugyñi, ca' y'ögipy ajcxy tücci'yi. ¿Nej mibijcyp miich jadaaji?

²⁷Chi Marta y'adzooy:

—Nmibijcypich, Huindzin. Nmibijcypich co miich je' je Cristo,

Dios y'ung, huidibi anajty miinam ya naaxhuiñ.

Jesús taj may ooy miid Lázaro ycixpi

²⁸Co Marta jadu'n yminañ, chi jada' oy huoy y'luch María, e yajnimay ameech:

—Je Huindzin chiiby je', e miich jiiby xymiidmiydägamb.

²⁹Co María jadu'n midooy, chi ypidigy mic'amy, e chi ñicxy ma Jesús. ³⁰Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yjipcobaadiy.

³¹Co ajcxy ixxy co María ypidigy, e ypidziimy janch mic'amy, je judíojäy huidibi anajty ajcxy jim ma je tijc miid je', hue' ajcxy tijy María ñicxy yaaxpi ma anajty ti ñaaxtigy je Lázaro. Chi ajcxy panicxy.

³²Co yjädy María ma je it ma anajty Jesús, co ixxpaty, chi ycojxtinaay'ahuüy ma Jesús yhuinduu, chi nimay:

—Huindzin, co ixypy miich anajty m'ocyaaity, iich n'ay ca' je' ixypy y'ögy.

³³Co Jesús ixxy yäxy je María etz je judíojäy ajcxy huidibi anajty yjaymiid'ajtip, chi ooy jihuiy etz ytaj ymaay. ³⁴Chi jada' Jesús yajtiy:

—¿Ma ajcxy Lázaro ti myajnaaxtigy?

Chi ajcxy nimay:

—Huindzin, jam ixxim.

³⁵Chi Jesús yaaxy. ³⁶Chi judíojäy ajcxy ñayñimaayi miñ xyipy:

—Ooydim anajty tzocy je Lázaro.

³⁷Per nijëjity ajcxy yminañ:

—Jadayaabi jäy huidibi huintzjäy yajhuindicxigy, ¿nej ca' jada' ixypy mic'ajt miidity jëbi ixypy ti yajtzögy je Lázaro, e ca'ydí ixypy ti y'ögy?

Jesús yajjugypijc Lázaro

³⁸Chi Jesús jadüg'oc yjotmaybaty, chi ymijhuägy ma je o'cpi jut. Hue' je' anajty tüg ang miid tüg mij tzaa y'lagiyducyity je jut aguu. ³⁹Chi Jesús yminañ:

—Jiigi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxiibiñ maabi ñaaxtigy.

⁴⁰Chi Jesús yminañ:

—¿Nej cay ti jadu'n nnimäyi? Pen xymibájcibich yi' n'ayuc, m'ixipy Dios ymic'ajt y'oy'ajt.

⁴¹Chi ajcxy je tzaa jiigi'y, chi Jesús cix ypa't'ixy, yminañ:

—Dios Teedy, jäygidaacin nyajnajxypich ma miich, co miich xymidoohui n'ayucich

⁴²Yajxon nnejhuüyich co miich xy'amido'ijtpich jabom jabom, paady ycixp miich jadu'n ti nnimäy miid jadayaabi jäy ajcxy ycixpi ma iich nhuinduu, huen ajcxy mibicy co miich xyquejxich ya naaxhuñ.

⁴³Co Jesús jadu'n yminañ, chi jada' mic ycapxy:

—Lázaro, pidzim tibäy.

⁴⁴Hue' je o'cpi mic'amy ypidzimy ymo'nity yajxon tüg'óciy ñinix etz huingoyebäyity miid huit, chi Jesús yminañ:

—Huimbidiyttuutcixy, e najtzmazziygix, huen yöychooñ.

Judío ixpicytijc ymadzamy anajty Jesús

⁴⁵May je judíojäy ajcxy ymibijcy huidibi anajty María yjaymiid'ajtyp, co ajcxy ijxy je huidibi anajty

Jesús ti tuñ. ⁴⁶Per jadyii judíojäy ajcxy oy ixtäy je fariseojäy ajcxy, chi ajcxy yajmiidmiydacy huidibi anajty Jesús ti tuñ. ⁴⁷Je teedy tungmiidpi ajcxy, etz je fariseojäy ajcxy, chi ajcxy ñayhuoomujctayi je tungmiidpi ajcxy nidüg'óciy, chi ajcxy yminañ:

—¿Nej ajt Jesús n'octuunim?

Yijiibi yëydijc ooy yi' mijhuinma'ñ tzachtuuni. ⁴⁸Pen nnajtz'ixiyyim jadu'ñyi, tüg'óciy jäy mibijctähua'ñ yi'. Chi ajcxy ymiinipy je Romano tungmiidpi huidibi ajt xy'ané'mim, e chi yajhuindigoyipy iich ajt nDios y'it, e nañ yajhuindigoyipy iich ajt ndzinaayin njugy'ajtin.

⁴⁹Nidügti ajcxy je jäy, hue' anajty yxii Caifás, hue' anajty mijtungmiid, je' anajty teedy huindzin, je' jadu'n jäy nimayday:

—Miich ajcxy ca' ti mhuinjihuüyigixy. ⁵⁰Ca' ajcxy mnejhuüy co jac'oy nyaj'o'cim je Jesús tügpajc, huen yi' codinaydähuiip naax cajn, jigix ca'ydi iich ajt nnaax ngajp yhuindiooyim.

⁵¹Canan yci'mhuinma'ñ jadu'n ycixpi yminañ je'. Hue' janchtiy com je' anajty ymijtungmiidity je huin'it jimijt ma teedy ajcxy ymiñ, paady Dios huinma'ñ jadu'n yejcy, co jadu'n najtzcaxpiy co Jesús anajty y'öga'ñ miid tüg'óciy ajcxy naax cajn ycixpi. ⁵²E ca' nminaanim miid jëda'ajty miid je judío ajcxy ñaax ycajp ycixpi, nañ jëgíx co huoomujctähua'ñ tüg'óciy Dios y'lung huidijaty anajty ajcxy yajpatp xii ya. ⁵³Huin'it oga'n ajcxy je tungmiidpi yajnogodugiyy co yaj'ögaangixy Jesús.

⁵⁴Jesús ca' anajty ma y'ocyaj'ijxni mayjäyoty ma je judíojäy ajcxy. Chi jada' ñicxy jiguem mihuingon ma je títznaax'it, ma anajty tüg cajp xiiijty Efraín. Chi jim yhui'miy miid ydiscípulos ajcxy.

⁵⁵Huingoonip anajty je pascua xii huidibi anajty judíojäy ytumyb. Ti anajty may judíojäy ajcxy ñinicxni jim Jerusalén xi'ajtp huidibi anajty jigügyjaty tzomb. Jayijpni ajcxy ñicxy ca' anajty xii paady, co anajty ajcxy ñayyajpocyñihuädza'ñyii.

⁵⁶Ooy anajty jäy ajcxy ijtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuiy ma Dios ytijc, jadu'n ajcxy yminañ: —¿Nej m'ocminaangixy? ¿Minipy jada' Jesús xi'ijxpi, o ca'ji?

⁵⁷Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinity huidibi anajty nejhuiyb ma je Jesús, huen nigapxy jigix ajcxy madzipy.

María yajjaax aceite Jesús ytecy

12 Jatudujcxiiini anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je huidi anajty ti yajjugypicy jadüg'oc. ²Chi ajcxy jim yaj'oyiiy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty miid Jesús iñäy ma je mesi. ³Chi María conigy tüg libra ujtzpjiyñii huidibi anajty ooy oy yxuugy. Tzou je' anajty ooy, je' miid Jesús ytecy yajjaaxtaayi. Chi jada' miid ycöhuay po'ttiich. Chi ac ujtzpjiyñii yxuugítay tigoty. ⁴Huin'it je Judas Iscariote je Simón ymang huidibi

anajty yhuindzin cýegam ma ymidzip, je' jadu'n ymina'ñ:

⁵—Jac'oy co ixipy ti ndoocim jada ujtzpjiyñii oy migo'pxpeexyti jadiib ixipy ajt ayoobtijc nbubejtim.

⁶Canan paady Judas jadu'n yminañ co ayoobitijc tzachpa'ayoy. Paady jadu'n yminañ co ajcxy chachmeedza'ñ. Com je' anajty meenybijty cuend'ajtp, e chachpuugomyb huidijaty anajty jiiby ajcxy yjapidaacyp. ⁷Chi Jesús nimay je Judas:

—Ixmatz miich yi', hue' yi' yi María ti yujpcicy jada ujtzpjiyñii co yajtuna'ñ co anajty naaxtigiyich. ⁸Com yi ayoobitijc ajcxy huinixii yi' miich ajcxy miid'idipy. Janch iich ca' iich miich ajcxy miid n'idipy huinixii (ya naaxhuiñ).

Judío ixpicytijc yaj'ögamy anajty Lázaro

⁹Co ajcxy nejhuiy may judíojäy ajcxy co anajty Jesús yjimity Betania, chi ajcxy nimiiñ. E canan miid Jesús ycixpi jëda'ajty, je' anajty ajcxy nañ jadu'n chach'ixaamy je Lázaro huidibi anajty ti jugypicy jadüg'oc. ¹⁰Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹com may judíojäy ajcxy anajty ñayjiibijcin, etz tzachmibijccixni Jesús.

Jesús tigiy Jerusalén jadu'n nej tüg rey

¹²Je com jabom je mayjäy huidibi anajty ajcxy ti ymiingixy xi'ajtpi ñejhuiy ajcxy co Jesús anajty ymina'ñ jim Jerusalén. ¹³Chi ajcxy

cabägy may ytiixy y'aacx, chi ajcxy nidzooñ Jesús, chachmínaangixy:

—iDios ajt xyñihuaanim xyajtzoocim! Mimb tüg jäy huidibi Dios ti yconucxyii. Ymiid yí! Dios ymic'ajt, je' je' je judíojäy yrey.

¹⁴Co Jesús paty tüg burro mang huidibi ca' ni pin yaj'iñaayñi, chi yajpejty, chi cuyduuñ jadu'n nej anajty jaybety y'ity ma Dios ñecy co jadu'n yminañ:

¹⁵—Ca' mdzigäy miich ajcxy huidibi tzinaayb ma Sión cajp (Jerusalén). Cha je mrey ymiñ y'iñäy ma tüg burro mang.

¹⁶Je huidibi anajty ajcxy Jesús discípulo'ajtyp, ca' anajty ajcxy huinjihuigixy ixti cooni Jesús paty jadüg'oc yí! y'oy'ajtin ymij'ajtin jiiby tzajpjoty. Huin'it ajcxy ajihuigooti co jadu'n anajty ycojaayity miid Jesús ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

¹⁷Je jäy ajcxy huidibi anajty ajcxy ymiid Jesús, huin'it co Lázaro ypidzimy ma yajnaaxtigiyyi, e yajjugypijci jadüg'oc, chachyejtyp anajty ajcxy tiy'ajt nañ jadu'n huidibi anajty ajcxy ti ijxcixy. ¹⁸Nañ paady ycixpi je mayjäy oy nañ jadu'n yjiipcobadiyyi, co ajcxy nejhuüy je mijhuinma'ñ huidibi anajty Jesús ytumyib. ¹⁹Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'óciy yi mayjäy axam ajcxy je' paníxcixy.

**Nijējity anajty griegojäy
miidmiydägaangixy Jesús**

²⁰Nijējity griegojäy nañ ti anajty ñíxcixy jim Jerusalén Dios

ojadajtpi xijoty. ²¹Chi jada' je griegojäy ajcxy nimijhuägy Felipe, huidibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús iich ajcxy nja'ixamy.

²²Chi Felipe oy yajnimay Andrés, chi ajcxy Felipe etz Andrés oy Jesús yajnimay. ²³Chi Jesús yminañ:

—Ti je tiempo paady co iich je jäy huidibi tzoon tzajpjoty nyajcömayipyich. ²⁴Janch janch iich miich ajcxy jadu'n nimaagyixy co jäy nĩby tüg mocpajc, e co je mocpajc ymuxy, huin'it yhuindigoy, e chi ytiim'ajtni may'amy. Pen ca' ni pin nĩby jada mocpajc, ca' ytiim'ada'ñ. Jadu'n iich nipaady nej je mocpajc. Copicy n'ögibyich, huin'it mayjäy jugy'ajtin paadaangixy huidibi ca' ycixipy ytigoyipy ni mina. ²⁵Je jäy huidibi ooy nĩgi nixondägy yi chinaayin ya naaxhuiñ, yajtigoyamy je' yjugy'ajtin tücci'yi. Per je pin ca'p ooy nijot'aty je chinaayin ya naaxhuiñ, e nixondaaci ooy nĩgi Dios y'ayuc, je' y'alma nidzoocin paadip ma Dios. ²⁶Pen ji jäy huidibi naybidaacip ma iich, copicy ajcxy xypaníxcibich. Ma iich nyajpaady, nañ jim yí! yajpaadipy nañ jadu'n. Yi jäy pinjaty naybidaacip ma iich, Dios Teedy yi' cömayiib.

Jesús capxpidzimy co y'öga'ñ

²⁷Chi Jesús yjacminañ:

—Tájñibich mayñibich cham jotjoty huinma'ñyoty. ¿Nej nnimähuibich nDeedyich?

¿Nihuaangich ma jada ayo'n tzaachypi huidibi ti yhuaad'ajtni?

Ca' yjadu'nity. Com paady ycixp ti nmiñich ma jada xii tiempo, jēbi ayo'n nyajnajxich miid jāy ajcxy ypocy ycixpi. ²⁸Dios Teedy tun huidibi copicy, jēbi jāy ajcxy ijxcixy miich mmic'ajt etz miich m'oy'ajt.

Huin'it je jāy ajcxy huidi anajty jim ma Jesús yajpaady midooy tūg ayuc choñ tzajpjoty yminañ:

—Ti nduñich mijhuinma'ñ, e ti jāy icy iich nmic'ajt n'oy'ajt. E nañ jadüg'oc ndunipyich mijhuinma'ñ, jigix jāy ajcxy ijxcixipy jadüg'oc iich nmic'ajt iich n'oy'ajt (jadu'n Dios y'adzooy y'ung Jesús).

²⁹Je mayjāy huidibi anajty ajcxy jim, je tiibi anajty ajcxy midoogixy je ayuc huidibi tzoon tzajpjoty, yminañ ajcxy:

—Enee yi' ti yjidity.

Jacjadyii ajcxy yminañ:

—Tūg ángel ti ymigapxyii.

³⁰Chi Jesús nimay je mayjāy ajcxy:

—Ca' nminaanim miid iich ycixpi jadu'n ti yajmidoy jadayaabi ayuc huidibi ti chooñ tzajpjoty. ³¹Jadachambi jada' Dios yajpocycāhua'ñ naaxhuiñyājy, e nañ ypigaanipy je mujcu' ymic'ajt huidibi ane'mb naaxhuiñyājy ajcxy. ³²Co iich anajty jāy ti xyajcruudzpetyich, e co iich anajty ti njugypicyich jadūgtecy, e co iich anajty ti nhuimbityich tzajpjoty, huin'it tūg'óciy jāy ajcxy huidibi xymibijcpich, nyajpa'ttigihuibich jiiby tzajpjoty ma nyajpaadyich.

³³Paady jadu'n Jesús yminañ, jēbi huaad tūg'óciy jāy ajcxy huinjihuñhuip ti o'cin anajty ypadamy. ³⁴Chi je mayjāy ajcxy yminañ:

—Ma Dios ñecy jiiby jadu'n ymiñ jaybety co je Cristo huinixii je' y'ida'ñ. E ñej miich co cham jadu'n mina'ñ co copicy co yi jāy huidibi tzoon tzajpjoty, huimbidad jadūgtecy tzajpjoty? ¿Pin jēdu'n mdijyp huidibi tzomb tzajpjoty?

³⁵Chi Jesús nimay je jāy ajcxy:

—Jahueeni xii tiempo njac'ida'ñich miid miich ajcxy. Jadu'n iich ndiy'ajt nej tūg jiin huidibi codiicxp jāy co ytūyōy. Cuychināy iich ndiy'ajt, co tzojc nhuimbida'ñich tzajpjoty, e miich ajcxy mhu'ima'ñ jadu'n nej jāy huidibi ca' jiin miidity. Je jāy ajcxy huidibi ca' cuychinaaygixy iich ndiy'ajt, ca' ajcxy nejhuiyigixy ma ñicxcixy. Jadu'n ajcxy nej jihuñy yōygixy coodz, e ca' ijxcixy ma ñicxcixy. ³⁶Com occhaani iich ma miich ajcxy, nyaj'ixpijcyp iich miich ajcxy Dios ytiy'ajt. Pen xymibjccixpich, m'ijtcixip ixpicy ma Dios ytiy'ajtin.

Co Jesús jadu'n je jāy ajcxy nimayday, huin'it Jesús je' ajcxy puhua'ctuutni, chi ñicxni, e ca' ma y'ocjac'lijxin.

Je judío jāy ca' mibiga'ñ Jesús

³⁷Ooy anajty canaag mijhuinma'ñ Jesús ti jatuuñ ma jāy ajcxy yhuinduu, e ca' anajty ajcxy ni ti tim mibijccixy. ³⁸Huidibi Jesús ytun ycapx, jiiby anajty jadu'n ycojayity ma je Dios y'ayuc necy, je Isaías ñecy, co Isaías jadu'n yminañ:

Huindzin, ca' ni pin ajt n'ayuc ndiy'ajt ti xymibijcim. Ca' ni pin huidibi huinjihuñyib je Huindzin Dios ymic'ajt.

³⁹Ca' anajty ajcxy huaad ymibijccixy, com nañ ti anajty jadu'n Isaías jay ma jadu'n yminañ:

⁴⁰ Jadu'n yi' ajcxy nej jihuüy
 Dios ti yajhuindziygixy, e
 ti yajjotjuniygixy, jigix
 ca' y'íjxcixipy miid yhuuin,
 e miid yjot yhuinma'n
 ca' huijihuüiygixyipy, ni
 ycajothuimbíjtcixipy nej jëbi
 Cristo yajtzóocigixy.

⁴¹ Paady jadu'n Isaías yminañ je' co
 anajty ti ijxi Cristo y'oy'ajt, e chi
 cojay nej anajty ti ixy.

⁴² Ca' nidüg'óciy judío xpicityijc
 mijotmädy anajty Jesús. Jim
 anajty nijëjty huindzindijc huidibi
 mibijcp Jesús. Per miid je fariseojäy
 ycixpi co chachjotma'tcixy, paady
 anajty ajcxy ca' capxpizimgixy
 co mijpidaaccixy Jesús. Je' co
 chigiigixy co jim yajpidzimiiyb
 ajcxy tücci'yi ma Dios ytijc, etz
 ma yi judío ñaymujctac. ⁴³ Jacnëgi
 anajty tzojccixy co huen jäy
 cömáayigixy, ca'ydi co ajcxy Dios
 ycömayiib.

**Dios yajpocycähuij je
 mayjäy miid Jesús y'ayuc**

⁴⁴ Chi jada' Jesús yminañ mic:
 —Je jäy ajcxy huidibi
 xymibijcpich xymijpidaacpich,
 caminaanim iich naydüg
 xymibijcpich xymijpidaacpich, nañ
 ymibijcyp ymijpidacyp ajcxy je tiibi
 iich ya naaxhuiñ xyquexyich. ⁴⁵E
 je jäy huidibi xy'ljxpich, tim jadu'n
 nipaady nej jihuüy ti ixy je huidibi
 ti xyquexyich. ⁴⁶Ich ti nmimiñich
 ya naaxhuiñ Dios ytiy'ajt, jadu'n
 iich nipaady nej jihuüy tüg jiin
 huidibi codiicx je jäy ajcxy. Je
 jäy ajcxy huidibi xymibijcpich ca'
 ajcxy yhui'mipy jibictuuby, jadu'n
 nej jihuüy ca' ajcxy chinaaygixy

agootztuuby. ⁴⁷ Je jäy ajcxy
 huidibi midoob iich n'ayuc, e ca'
 cuydungixy, ca'p je' iich je' ypocy
 ajcxy n'ixyöyaani nbayöyaani
 cham. Ca'p iich ti nmiñich
 ya naaxhuiñ miid co jäy ajcxy
 ndzaachytunipyich miid ypocy
 ycixpi. Paady iich ti nmiñich ya
 naaxhuiñ co nyajpocynñiñhädza'nich
 yi jäy ajcxy. ⁴⁸ Je jäy ajcxy huidibi
 xycapxhuimbíjtibich n'ayuc, e ca'
 xycöbiga'nich, ymiid ajcxy huidibi
 yajpocycähuiib. Yi ayuc huidibi
 ti ngapxyich, yi' yajpocycähuiib
 ajcxy co anajty naaxhuiñybi
 ti yhuaad'ajtni co Dios anajty
 yajtigatzaani. ⁴⁹ Com iich ca'
 ngi'm'ayuc ngapxhuäcxyich. Je'
 je' Dios Teedy y'ayuc, je huidibi ti
 xyquexyich, yi' ngapxhuäcxiibich
 y'ayuc. Je huidibi ti xyquexyich ya
 naaxhuiñ ti xyñajtzcapxiyich yi'
 y'ayuc, jada ayuc ngapxhuäcxypich
 nyajnimaaaygixyp. ⁵⁰ E nejhuiybich
 co Dios y'ayuc ytiy'ajt ymimimyb
 yi' tzinaayin jugy'ajtin huidibi
 ca' tücci'yi ycixy ytigoy. Paady
 ycix je ayuc huidibi ajcxy
 nyajmiidmiydacyp, jadu'n
 nyajmiidmiydaaccixy nej Dios
 Teedy ti xyajnajtz'ane'miych.

Jesús ypuji ydiscípulos ajcxy ytecy

13 Ca'ni anajty xii paady,
 pascuaxii anajty ajcxy
 tijy. Chi Jesús ñejhuiyb co
 anajty yxii ytiempo yhuaad'ajtni
 mina chonaani ya naaxhuiñ
 yhuimbidaani ma Dios Teedy. E
 Jesús ooy anajty tzocy jihuüy
 ymigügtijc ajcxy huidibi ya
 naaxhuiñ anajty ajcxy hui'ma'n.
 Jadu'n tzocy jihuüy huinixii.

²Chi jada' Jesús etz ymigügtijc ytiigiy ajcxy adzuu'ajtp (je pascuaxii adzu'ajtin). Ti anajty je mujcu' huinma'ñmöy Judas Iscariote, Simón ymang, co anajty Jesús cäyega'ñ ma ymidzip ajcxy. ³Ñejhuiyb anajty Jesús co je Dios Teedy ti yajcädigiyi tüg'óciy ymic'ajt, e Jesús nañ ñejhuiyb anajty co je' ti choon ma Dios y'it, e nañ jiiby anajty jadüg'oc yhuimbida'ñ. ⁴Chi ypidigy ma mesi, chi je yoñybi yhuut ñayyajniijenduutti. Chi huijtzigy tüg huit huidibi miid ñaymextiitzi nayböttiitzi, ñayyajmijxojtpejti yhuindiy. ⁵Co jadu'n ñayñi'ixiyyi, chi pidacy nii ma tüg cibuj'iñyoc. Chi nihuägiyi ydiscipulos ajcxy ytecy. Chi yajtzondacy tecupujii tüg tüg, e mextiich pöttiich miid je huit huidibi anajty ti ñayyajhuindiyyii.

⁶Co nihuägiyi Simón Pedro ytecy, chi Pedro yminañ:

—Huindzin, ca' huaad miich ndecy xypujich.

⁷Chi Jesús y'adzooy:

—Huidibi iich ndumyib ca' y'i miich ajcxy mhuinjihuiyigixy jadachambi, jaccomjey miich ajcxy mhuinjihuihuipy.

⁸Chi Pedro y'adzooy:

—Miich ca' huaad iich ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' iich miich jëbi njäy'adyii.

⁹E huin'it Pedro nimay Jesús:

—Huindzin, ca' iich jëda'ajty ndecy xypújibich, hue' janchtiy tüg'óciy ngäjich etz ngohuajcich.

¹⁰Chi Jesús nimay Pedro:

—Com tiibi mjet mhuinma'ñ yajhuäch, ca' y'i' ocjactzojcní

yajhuädzipy mjet mhuinma'ñ jadügtecy. Tim jadu'n nej jihuüy naamni chiy, e cham ca' tzojcní yajtzihuiybich jadügtecy. Jëda'ajty mdecy nbujich cham. Miich ajcxy huädz mjet mhuinma'ñ ajcxy mmiidiñ, oy ca' miich ajcxy nidüg'óciy.

¹¹Com Jesús ñejhuiyb anajty pinjäy cäyegaanip ma ymidzip, e paady jadu'n yminañ:

—Ca' ni tüg'óciy miich ajcxy mjet mhuinma'ñ yhuädzity.

¹²Chi jada' co yajtecypujtay, chi jada' yoñyhuit yajtiigiy jadüg'oc. Y'ixtacy ma mesi, e chi jada' nimay ajcxy:

—¿Nej mhuinjihuiyb ajcxy ti iich ti nduñich miid miich ajcxy?

¹³Miich ajcxy jadu'n minamb co iich miich ajcxy myaj'ixpijcy, etz iich miich xyhuindzin'ajtpich. E tiydudägy miich ajcxy mina'ñ com iich jëdu'n miich ajcxy mHuindzin.

¹⁴Pen iich miich ajcxy nyaj'ixpijcyp etz xyhuindzin'ajtpich, e ti iich miich ajcxy nyajtecypujy, nañ jadu'n miich ajcxy myajtecypujiiyb miñ xyipy. ¹⁵Iich miich ajcxy ti nmöy tüg iixpejt, jigix ajcxy jadu'n mdunipy jadu'n nej ti nduñich, e huin'it ca' amij agix nayjihuihuiyb ajcxy. ¹⁶Janch janch iich miich ajcxy yam jadu'n nnimäy co je huindzin jac mij je' ca'ydi y'i' ytumbi. E nañ je' huidibi yajquejxyöyb jac mij je' ca'ydi huidibi quejxyöyb. ¹⁷Co ajcxy tiy'ajt mnejhuihuipy, chi jotcujc ajcxy m'idipy, pen mbadumyib ajcxy jadu'n nej nduñich.

¹⁸Ca' nmina'ñich co nidüg'óciy miich ajcxy mbocymiidity. Ti iich

yi' nnejhuüy pin ti nhuin'ixyich. Ti nhuin'ixyich tüg huidibi pocymiid, jigix cuyduunip nej anajty yjaybetyity ma Dios ñecy ma je Cristo jadu'n ymina'n: "Yi' huidibi caymujcp miid iich, ti iich yi' xymibidigy." ¹⁹Ti iich yam miich ajcxy jayijp nyajnimaaigyxy, jigix co anajty jadu'n ytunyii yjadyii, mmibigipy ajcxy co iich jëdu'n je Cristo. ²⁰Janch janch yam ajcxy jadu'n nnimaagyxy co je jay ajcxy huidibi cöbijcp je huidibi anajty nguejxypich, tim jadu'n nipaady jadu'n nej iich anajty xycöbijcyich. E je jay ajcxy huidibi xycöbijcpich, je' ajcxy anajty ycöbijcyp je' huidibi xyquejxich ya naaxhuiñ.

Jesús ñimay ymigügtijc co je Judas anajty cäyegaanip ma ymidzip

²¹Co jadu'n Jesús yminañ, chi tajnip mayñip anajty ooy jotjoty huinma'ñyoty, chi capxypidzimy:

—Janch janch iich miich ajcxy yam jadu'n ñimäy co nidügti miich ajcxy xycäyega'nñich ma nmidzipich.

²²Chi Jesús ydiscípulos ajcxy ñayhuindixpejttaayi nidüg nidüg. Ca' anajty ajcxy nejhuüy pin anajty jëdu'n Jesús ytijyp. ²³Nidügti je' ajcxy huidibi anajty Jesús ooy miid ñaychogyii iñäy anajty ma mesi tim huingon ma Jesús yhuinduu. ²⁴Chi Simón Pedro yci' yaj'ijxy yajhuinjihuüy co huen yaj'amidooy Jesús pin anajty jadu'n ytijyp. ²⁵Chi je discípulos ajcxy huidibi anajty iñaayb ma Jesús yhuinduu ñimay yhuindzin:

—¿Pin jadu'n mdijyp?

²⁶Chi Jesús y'adzooy:

—Yi' je' pin anajty iich nmooybich yi tzajcaagy huidibi anajty nyajxoocpyich ma je ügy.

Chi yajxoogy tüg pedasi tzajcaagy, chi moy je Judas, je Simón Iscariote ymang. ²⁷Tim huin'ítii co Judas je tzajcaagy cöbijcy, chi je mujcu' ytiigiiy ma je' y'ay yjot. Chi Jesús ñimay Judas:

—Yi huidibi mdunamyb, tungo jadu'n mic'amy.

²⁸Huidijaty anajty ajcxy jim caayb, ni pin cahuinjihuüy je ayuc huidibi Jesús yajnimay Judas, nej je ayuc yhuimbidzimy. ²⁹Com je Judas anajty miid je meeñybijty, paady ajcxy nijëjity huinjihuüy co anajty tijy ñimäyii:

—Nícx juy yi huidibi ajt nyajmayajtim yi xiigixpi.

Jacjadyii ajcxy anajty tijy ñimäyii:

—Mo' tigatii ayoobitijc. ³⁰Tim huin'ítii co je tzajcaagy cayday, chi ypidzimy Judas tība'y, e ti anajty ycoodziyiñi.

Jesús ñajtz'ane'miy jemybi cötujcin

³¹Co Judas ypidzimy, chi Jesús yminañ:

—Cham je jay ajcxy ixa'n iich nmic'ajt iich n'oy'ajt, iich je jay huidibi tzoön tzajpjoty. Etz nañ ma iich je jay ajcxy ixa'n Dios ymic'ajt Dios y'oy'ajt. ³²Jadu'n nej je jay ajcxy ti ijxcixy Dios ymic'ajt ma iich, nañ tim jadu'n Dios yajniguëxigipy yi nmic'ajtich n'oy'ajtich tim mic'amy. ³³Migügtijc huidibi ooy ndzocy njihuüyich, ca' n'ochuäcxibaanich jecy miid miich ajcxy.

Xy'ixtähuibich miich ajcxy. Jadu'n nej ti nnimäagyxyich yi jacjadyii judíojäy ajcxy, nañ jadu'n iich miich ajcxy yam njacnimaaigyxy co ma nnicxa'nñich, ca' huaad miich

ajcxy jiiby mnicxcixy. ³⁴Cham ajcxy nmöhua'n tüg ané'min huinjemybi. Cham miich ajcxy nyajnajtz'ane'mihuaangixy jadüg'oc jadayaabi tiy'ajt: Naychójcigix nayjihuiyigix ajcxy nidüg nidüg, tim jadu'n nej iich miich ajcxy ti ndzocy ti njihuüy. Naychójcigix nayjihuiyigix aguipxyi. ³⁵Miid jada ycixpi ñejhuühuipy tüg'óciy jäy co iich miich ajcxy ti nyaj'ixpijccixy co ajcxy nidüg nidüg mnaychogiiyb mnayjihuihuüyb.

**Jesús ñimay ymigütiyc co je
Pedro anajty coyüdzanip**

³⁶Chi Pedro ñimay:

—Huindzin, ¿ma miich mnicxa'n?

Huin'it Jesús y'adzooy:

—Ma iich mnicxa'ñich miich ca' huaad xypanicxyich. Jac'axam xypanicxyibich.

³⁷Chi Pedro yminañ:

—E ¿nej co ca' huaad jëbi iich miich nbanicxy? com iich ngïyegamych njugy'ajtin ma yi o'cin miid miich ycixpi.

³⁸Chi jada! Jesús y'adzooy:

—¿Nej janch co mgïyega'n yi mjugy'ajtin ma yi o'cin miid iich ycixpi? Janch janch iich miich ajcxy yam jadu'n nimäy, co ni ca'ni anajty jabom tugiig'oc tzey yaaxïgy, co iich miich anajty tugiig'oc ti xycoyüchich.

**Pinjaty mibijcp Jesús nicxip
ma Dios Teedy yajpaady**

14

Chi Jesús yjacminañ: —Ca' ajcxy jotmay mjihuüy ma m'aa mjot miid jada ayuc. Mibic ajcxy Dios etz iich nañ jadu'n mibijccich. ²Jiiby ma iich

nDeedy chinäy, jiiby mijtigiycac. Co ixypy ca' yjadu'nity, ca' ixypy ti nnimaaygixy co mnicxyich ma nDeedyich n'ocni'ixiy tzinaaydac miid miich ajcxy ycixpi. ³E co iich anajty ti nba'ttigïyich, e ti ni'ixiyyich tzinaaydac jayijp miid miich ajcxy ycixpi, huin'it ajcxy nihuimbidity, jëbi iich ajt naydügmujcim, jigix ma anajty n'ityich, nañ jiiby miich ajcxy m'idipy. ⁴Miich ajcxy mnejhuiyb nej jëbi ajcxy mjädip ma mnicxyich oyduuby.

⁵Chi Tomás yminañ:

—Huindzin, ca' iich ajcxy nejhuiygixy ma miich mnicxa'n, e ca' iich ajcxy nnejhuiygixy nej jëbi njá'tcixibych jiiby.

⁶Chi Jesús y'adzooy:

—Jadu'n nej ti ndzinäyich jada je' je iixpejt nej Dios tzocy co miich ajcxy mdzinähuipy. Nyejcpyich je tiy'ajt huidibi jëbi huaad mguychinaaygixy. Co jadu'n mguydundáygixipy iich ndiy'ajt, chi mjá'tcixipy ma Dios. Nyejcpyich je jugy'ajtin huidibi ca' tücc'i'yi ycixy ytigoy. Ca' ni pinjäy yjädipy ma Dios Teedy, peni ca' cuydundáy iich ndiy'ajt. ⁷Jadachambi etz nej xii tiempo yjacnicxa'n miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸Chi Felipe y'adzooy:

—Huindzin, iich ajcxy yi Dios Teedy yaj'ijxcich cham cham, e miid tim y'i'yi jotcuyc'adipyich ajcxy.

⁹Paady Jesús ñimay je Felipe:

—Cham xii jimijt ñicxni maabi iich nja'ityich miid miich ajcxy, e ¿ca'ni miich xytimy'ijxhui'myich

Felipe? Yi jäy ajcxy tiibi xy'íjxcixyich, nañ y'íjxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'íjxcich je Dios Teedy?” ¹⁰ ¿Nej ca' mmibicy co iich n'ity ma Dios Teedy, e Dios Teedy ijtp ma iich? Yi ayuc huidibi ngapxhuäcxypich, ca' yí' ngi'm'ayuc'adyiijich ngi'mdiy'ajt'adyiijich. Yi mijhuinma'n huidibi ajcxy m'íjxyp ndumyich, yi Dios Teedy huidibi ijt ma iich, yí' jadu'n tumb. ¹¹ Mibijccich ajcxy co iich n'ityich ma Dios Teedy, e Dios Teedy ijtp ma iich. Peni ca' mdimmibigaangixy, mibic ajcxy miid je mijhuinma'n ycixpi huidibi ti nduñich. ¹² Janch janch iich miich ajcxy jadu'n nimaaygixy co je jäy ajcxy huidibi xymibijcpich, nañ ytunipy ajcxy nañ jadu'n yi mijhuinma'n huidibi ti nduñich. Jac tim nigi tunipy mijhuinma'n, com iich nnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy miid iich nxii, ndunipyich yí'. Dios Teedy huidibi nDeedy'ajtypich, je' cömay y'idip miid huidibi miich anajty ajcxy mdumyb miid iich nmic'ajt. ¹⁴ Co myajmibijctzohuipy tijaty, xycapxpáatibich nxii, huin'it nguydunipyich huidibi anajty ti mbijctzoogixy.

**Jesús yquexamy Dios
yjíhuí'ñ ymic'ajt**

¹⁵ Peni xychojcpich miich ajcxy, cuydúñigich ajcxy tüg'óciy n'ayuc ndiy'ajt, jadu'n nej anajty ti nnajtz'ane'miyich.

¹⁶ E co ndzoonibych, chi

nbijctzóohuibyich yi Dios Teedy jadüg yjaymiid huidibi ajcxy xyjaymiid'adiib. Dios ajcxy xymöhuipy jadüg jaymiid huidibi ajcxy xycapxhuijip, je huidibi ajcxy mjot'amij'adiiyb, e je' xymiid'idipy ajcxy huinixii. ¹⁷ Je huidibi xycapxhuijip, je' jada'ajty Dios yjihui'ñ ymic'ajt, je Espíritu Santo. Je' Dios ytiy'ajt ymiid. Dios yjihui'ñ ymic'ajt ca' adigíhua'ñ yi naaxhuiñyjäy huidibi ca' xymibicyich. Com ca' ajcxy ix, e nañ ca' ajcxy ix'yadyi je Espíritu Santo. Miich ajcxy m'ixy'ajtyp je Espíritu Santo, com je' tzinaayb ma miich ajcxy, e nañ xy'adigíhuipy xyjottigíhuipy ajcxy. ¹⁸ Ca' miich ajcxy nyajhui'maangixy naydüg jadu'n nej co'ögy'ung. Nnihuimbidityich miich ajcxy jadügtecy. ¹⁹ Tim huingónip yi xii tiempo mina yi jacyadyi naaxhuiñyjäy ajcxy ca' xy'ocjac'íjxnibich. Com jadu'n nej iich njactzinähua'ñ, ca' iich njugy'ajtin ycixipy ytigoyipy tücci'yi. Nañ jadu'n miich ajcxy mjactzinähua'ñ, ca' mjugy'ajtin ajcxy ycixipy ytigoyipy tücci'yi. ²⁰ Co anajty Dios yjihui'ñ ymic'ajt ajcxy xy'adigíy xyjottigíy, huin'it ajcxy mnejhuíhuipy co nyajpaadyich ma nDeedyich, yi Dios Teedy, e miich ajcxy myajpaady ma iich, e iich nañ jadu'n yajpatpich ma miich ajcxy. ²¹ Je jäy ajcxy huidibi iich n'ayuc ndiy'ajtich xycöbijcip, e cuydungixy, je' je' jadu'n xychojcpich, e tzogíib je' iich nDeedy. E iich nañ jadu'n ndzogipy njihuíhuibyich je' ajcxy, e nnayyajniguëxigíyich ma je' ajcxy.

²²Je jadügpi Judas, ca' nmínaaním Judas Iscariote, nímáy Jesús:

—Huindzin, ínej co mnayyajniguëxíga'ñyíi ma íich ajcxy, e ca' mnayyajniguëxíga'ñyíi ma je jáy ajcxy huidibí ca' xymíjpidägy?

²³Chi Jesús je' y'adzooy:

—Yí jáy ajcxy huidibí xychojcpích xyajmíj'ajtpích, xycuyduuníbích yí' ajcxy íich n'ayuc ndíy'ajt. E huin'it yí' ajcxy chogíiyb íich nDeedy. Je nDeedyích etz íich miínip íich ajcxy ma je jáy ajcxy huidibí xycuyduunip íich ndíy'ajt, e tzínaydacpígípyích ma yí' ajcxy yjot yhuinma'ñ. ²⁴Je jáy ajcxy pinjaty ca' xychocyích, nañ ca' ajcxy íich n'ayuc xycuyduuních. Paady ca' nnayyajniguëxíga'ñyíijích ma je' ajcxy. Com yí ayuc huidibích miích ajcxy nyaj'amído'íjtyp, ca' yí' íich ngí'm'ayuc'adyíi. Yí' je' Dios Teedy y'ayuc ytiy'ajt, com yí' íich ya naaxhuíñ xyquejxích.

²⁵Jadayaabi ayuc ajcxy cham jadu'n njacyajnímaayb, jadu'n nej njacyáanígyích ya naaxhuíñ miíd miích ajcxy, ma ca'ni ndzooñích.

²⁶Per je Espíritu Santo huidi miínam, je' ajcxy xycapxhuijíp. Dios Teedy yquexamy je Espíritu Santo miíd íich nxíi. Je Espíritu Santo xyajnejhuíydáhuípy miích ajcxy tüg'óciy tíy'ajt, e nañ xyaj'ajíhuíhuíib tüg'óciy jadu'n nej íich miích ajcxy nnímaaygíxy.

²⁷Íich miích ajcxy nyajmíhuí'my jotcujc'ajtin. Jadu'n nej íich njotcujc'atyích, nañ nyajjotcujc'adípíyích miích ajcxy. Yí jotcujc'ajtin huidibí

nyajmíhuímaamyích miích ajcxy, ca' yí' yjadu'níty nej je jotcujc'ajtin huidibí yajpaatp ya naaxhuíñ. Ca' mdajcxy maygíxy, nañ ca' mdzígíiygíxy. ²⁸Tí íich miích ajcxy nnímaaygíxy jayíjp'aty co ndzona'ñích ma miích ajcxy, e nhuimbida'ñích jadüg'oc ma miích ajcxy. Pení xychojcpích miích ajcxy, mxondägípy ajcxy co nníxa'ñích ma Dios Teedy, com yí Dios Teedy jac mój yí' ca'ydi íich. ²⁹Tí íich jada tíy'ajt jayíjp nímíydägyích ma ca'ni ndzooñích, jígíx co anajty je tiempo paady mína jadayaabi ytuníiyb yjadíiyb, huin'it ajcxy mmíbígípy íich n'ayuc.

³⁰E ca' íich miích ajcxy mójcájee ooy njacmíidmíydägaangíxy yam. Com tím huingóníp mína je mujcu' huidibí ane'mb ya naaxhuíñ xyñímína'ñích. Ca' íich yí' huaad jébi xymímadägyích. ³¹Per copícy yí' nguydunípyích Dios Teedy y'ayuc nej xyajnajtz'ane'míiyích, jígíx je naaxhuíñyáj nejhuíhuípy co nyajmíj'atyích yí Dios Teedy. Pidíccíx, tzoc'ajt huingduum jamím.

Je camuuxy'aadz etz y'aacx

15 Chi Jesús jacnímay ydiscípulos ajcxy:

—Jadu'n íich nipaady nej camuux'aadz ma tüg muuxy'aadz cam. Íich nDeedy, yí Dios Teedy, jadu'n yí' nipaady nej je muuxy'aadz cam cuend'ajtpí. ²Tüg'óciy jáy jadu'n ajcxy nipaady nej muuxy'aadz y'aacx. Je jáy ajcxy huidibí ca' cuychinäy íich ndíy'ajt, yí Dios Teedy yajcödígoyíib, jadu'n nej je muuxy'aadz cam cuend'ajtpí quejtzpuxy je muuxy'aadz y'aacx

huidibi ca' ytiim'aty. Je jäy ajcxy huidibi cuydundaayb iich ndiy'ajt, Dios yaj'oyiib je' ajcxy yjot yhuinma'n, jëbi oybi tuñ, jadu'n nej je muuxy'aadz cam cuend'ajtpi huijtz'oyi'y je muuxy'aadz y'aacx, jigix jëbi nigi ytiim'aty. ³Yi ayuc huidibi ti nyajnimaa'ygixy, yi' ti yajhuäch yi jibicpi ma miich ajcxy mjot mhuinma'n. ⁴Mibijcicx ajcxy, pan'cixigich ajcxy ndiy'ajt huinixii. Co ajcxy jadu'n mdunipy, iich miich ajcxy miid'idipy huinixii. Jadu'n nej ixipy camuuxy'aadz y'aacx co ca' ytiim'aty co ahuinggujce y'lity, e ca' mic'ajt paady ma ycop. Nañ tim jadu'n miich ajcxy pen ca' mmic'ajt mbaadipy ma iich, ca' mmimada'accixipy mguychináaygixipy iich ndiy'ajt.

⁵Jadu'n iich nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jäy ajcxy huidibi yajpatp ma iich, e iich nyajpaady ma je' ajcxy, je' ajcxy oyhuinma'n tunam mij cajee, tim jadu'n nej camuuxy'aadz huidibi tiim'ajtp may'amy. Co ixipy iich ca' nyajpaady ma miich ajcxy, ca' miich ajcxy huaad ti mdungixy. ⁶Co jäy ajcxy ndiy'ajt xy'ixmájtzibich, Dios ajcxy yajcödigoyiib, tim jadu'n nej jäy yajcödigoy miid jiin yi muuxy'aadz y'aacx huidibi ymibuxiiyb co ca' ytiim'ajtni. Co je y'aacx ytidzity, chi ajcxy yajmucy, e pidaaccixy jiinjoty, e jadu'n jiibiy ñidoyi'y jiinjoty.

⁷Co miich ajcxy m'ijtcixy ma iich, e co iich n'ayuc nañ jadu'n ijtp ma miich ajcxy mjot mhuinma'n, jëbi mbijctzoogixy ti ajcxy mdzojcyp

ma Dios, e nguydunipyich miid miich ajcxy ycixpi. ⁸Chi je jäy ajcxy cömayipy Dios co miich ajcxy mguydunipy iich ndiy'ajt tiydudägy, tim jadu'n nej camuuxy'aadz y'aacx ytiim'aty may'amy. Co je jäy ajcxy ixipy nej tudägy mguydungixy iich ndiy'ajt, chi je jäy ajcxy tiydudägy nejhuihuipy co ti nyaj'ixpicyich miich ajcxy. ⁹Jadu'n nej Dios Teedy xychocyich xyjihuiyich, nañ tim jadu'n iich miich ajcxy ti ndzocy ti njihuiyich. Ndzogipy njihuihuibyich miich ajcxy huinixii co ca' ajcxy xy'ixmájtzibiyich ndiy'ajtich.

¹⁰Co mguydunda'huipy ajcxy jadu'n nej nyajnajtz'ane'miiygixy, ndzogipyich njihuihuibyich miich ajcxy huinixii. Tim jadu'n nej nguyduñich yi huidibi Dios Teedy xyajnajtz'ane'miiybich, e yi' xychojcpiich xyjihuiybich huinixii.

¹¹Cham jadayaabi ayuc nyajnajtz'ane'miiygixy, jigix jotcujc m'ijtcixipy. Jadu'n nej jotcujc ti n'ityich, e nañ jadu'n miich ajcxy mjotcujc'adipy anaxy. ¹²Jadaabi ayuc iich miich ajcxy nyajnajtz'ane'miiybich co naychöjcigix nayjihuiyigix nidüg nidüg, tim jadu'n nej iich miich ajcxy ndzocy njihuiy. ¹³Je tiy'ajt jac'oybi co migügtijc ajcxy naychogiiyb nayjihuihuiiyb, co tüg jäy ciyegipy yjugy'ajtin miid ymigügtijc ycixpi. ¹⁴Iich miich ajcxy migüg'ajtyp, pen mguydumy nej ajcxy nyajnajtz'ane'miiygixy. ¹⁵Jadu'n nej xii tiempo yjacnicxa'n, ca' miich ajcxy n'ocnaydijnip iich ndumbi. Com je tumbi ca' huinjihuüy huidibi yhuindzin ytumy. Hue' miich ajcxy

nyajnagyich nmigügtijcich, com tüg'óciy tiy'ajt tiibi nmidooyich ma iich nDeedy, yi Dios Teedy, ti iich miich ajcxy nnimaaygixy. ¹⁶Ca' nminaanim iich miich ajcxy ti xyhuin'ixy. iich miich janchtiy ajcxy ti nhuin'ixy. E ti iich miich ajcxy nyajniibicy co nicxy mgapxhuäxcixy iich n'ayuc. E nañ mayjäy mijpidägipy je ayuc huidibi miich ajcxy mgapxhuäcxipy. E nañ iich n'ayuc, huidibi miich ajcxy mgapxhuäcxipy, y'idipy ma je jäy ajcxy yjot yhuinma'ñ huinixii. Paady ycix tüg'óciy tijaty miich ajcxy mbijctzooyb ma Dios Teedy miid iich nxii, y'i' ajcxy xymöhuipy. ¹⁷Jada ayuc ajcxy yam nyajnajtz'ane'miiyb co ajcxy mnaychogiiyb mnayjihuihuiyb miñ xyipy.

**Je maybi naaxhuiñyäjy ca' ajcxy
ixaangixy Jesús etz cham je' yjäy**

¹⁸Co je may naaxhuiñyäjy ca' xy'ixaangixy miich ajcxy, ca' ajcxy ooy mhuinmayipy, com mnejhuiiyb ajcxy co iich nañ jadu'n jac jayijp ca' yi' ajcxy ti xy'ixáangixyich.

¹⁹Co ixipy ytügüy miich ajcxy m'ayuc mdiy'ajt miid je jacjadyii naaxhuiñyäjy y'ayuc ytiy'ajt, huin'it ixipy ajcxy xychojccixy xyjihuiygixy, com tú'ciy miich ajcxy mhuinma'ñ ixipy miid yi' ajcxy yhuinma'ñ. Janch com co ca' ytügüy miich ajcxy m'ayuc mdiy'ajt miid je jacjadyii naaxhuiñyäjy y'ayuc ytiy'ajt, paady je jacjadyii naaxhuiñyäjy ca' ajcxy xy'ixa'nip. Com iich miich ajcxy ti nyajijphuijtzütüdy, jadu'n nej yi' jacjadyii naaxhuiñyäjy

ajcxy chinaaygixy yjugy'ajtcixy. ²⁰M'ajihuihuiib ajcxy jadu'n nej ti nnimaaygixy co iich miich ajcxy xyhuindzin'ajtpich, paady jac mij iich ca'ydi miich ajcxy. Jadu'n nej naaxhuiñyäjy ajcxy ti xy'ixhuidityich ti xypahuidityich, nañ jadu'n miich ajcxy yi' xy'ixhuidida'ñ xypahuidida'ñ. Nañ may je jäy huidibi ca' ti xycapxymidooyich, nañ jadu'n may je jäy huidibi miich ajcxy ca' xycapxymidohuaangixy. ²¹Nijot ajcxy y'iditzaangixy miid miich ajcxy ycixpi, com ca' ajcxy ix'yadyii Dios Teedy huidibi xyquejxyich ya naaxhuiñ.

²²Co ixipy ca' ti nmiiñich ya naaxhuiñ nyajnimäyich je jäy ajcxy Dios ytiy'ajt, ca' ixipy ajcxy pocy miidity. Per com ti nmiiñich ya naaxhuiñ, paady cham ypocy ajcxy miidity co ca' ajcxy xy'ixa'ñich. ²³Je jäy ajcxy huidibi ca' xy'ixa'ñich, jadu'n nipaady nej iich nDeedy ca' ajcxy ixaangixy. ²⁴Co ixipy iich ca' ti nduñich ma yi' ajcxy yhuinduu mijhuinma'ñ, huidibi ca' ni pin jäy tuñi, ca' ixipy ajcxy pocy miidity. E janch ti ajcxy ooy ja'ijxcixy je mijhuinma'ñ, e ca' iich yi' ajcxy xy'ixa'ñ, e nañ ca' ixaangixy iich nDeedy. ²⁵Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi' judfojyäjy ajcxy ley ñecy, ma jadu'n ymina'ñ: "Ni ti tiy'ajt ycaca'ty, co iich yi' ajcxy ca' xy'ixa'ñich."

²⁶E co anajty xyñigidaaccixy yi Espíritu Santo, yi huidibi xycapxhuijip ajcxy, je huidibi miich ajcxy nyajnigüexam, chon ma Dios

Teedy, je huidibi Dios ytiy'ajt miid. Yi' xyñidiy'ajt'adaambich co Dios ytiy'ajt nmiididyich. ²⁷E miich ajcxy nañ jadu'n xyñidiy'ajt'adipich co Dios ytiy'ajt nmiididyich. Com iich miich ajcxy jayijp nyaj'ixpijctzondac Dios y'ayuc ytiy'ajt.

16 Ti ajcxy yam tiy'ajt njacyajnimaa'ygixy, jigix ca' ajcxy m'ixtigihüägipy. ²Com judíojäy ajcxy xy'ixhuidzipy ajcxy ma ajcxy yi' ñaymujctac. Ypadaamy yi xii tiempo co miich ajcxy jäy xyaj'ögipy, hue' ajcxy tijipy co Dios anajty ooy jadu'n jäygidägy tiibi anajty ajcxy tuñ. ³Paady ajcxy jadu'n xytunipy jibic, je' co ajcxy ca' ix'yadyii yi Dios Teedy, etz nañ jadu'n ca' xy'ixy'adyiijich. ⁴Paady iich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuñhuiyb ajcxy co ti anajty jayijp nnimaaygixy co ayo'n tzaachypi mminaxa'ñ myajnaxa'ñ ajcxy.

**Dios yjihui'ñ ymic'ajt tunam
ma jäy yjot yhuinma'ñ**

Ca' anajty ajcxy jada ti nyajnimäy miid jëgix nmiid'ity ajcxy. ⁵E cham janchtiy nnicxáanibich ma yi huidibi ti xyquexyich ya naaxhuiñ. E ni tüg miich ajcxy xyca'amidooyich: "¿Ma mnicxa'ñ?" ⁶Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjihuüyigixy. ⁷Oy ixypy miich ajcxy cham mjatajy mjamay, tiy'ajt nej mmina'ñich co jac'oy miid miich ajcxy ycixpi co nhuimbidityich ma Dios Teedy. Co ixypy ca' jiiby

nnicxa'ñich tzajpjoty, ca' ixypy xyñiminaangixy Dios yjihui'ñ ymic'ajt, je Espíritu Santo, je huidibi ajcxy xycapxhuijip. Per co iich anajty tzajpjoty ti nhuimbity, huin'it iich yi' miich ajcxy nyajniguexipy. ⁸E co anajty je Espíritu Santo miiñ ya naaxhuiñ, huin'it yi' yajjihui'ñybigipy jäy ajcxy ypocy. E nañ yajni'ixihuipy je jäy ajcxy co Dios tiyduniib miid ypocy ycixpi. ⁹Yi Espíritu Santo yajjihui'ñybigipy jäy ajcxy ypocy, co iich ca' ajcxy ti xymibicy ca' ajcxy ti xymijpidägyich. ¹⁰Je Espíritu Santo yajnejhuñhuiipy jäy ajcxy nej huaad cuychinaaygixy Dios y'ayuc ytiy'ajt. Com co iich nba'ttigihua'ñich ma Dios Teedy, e miich ajcxy ca' xy'ocjac'ixnibich. ¹¹Je Espíritu Santo yajhuinjihuñhuiipy je jäy ajcxy co Dios tiyduniib ajcxy miid ypocy ycixpi huidibi ajcxy ca' tiydudägy chinaaygixy. Com yi Dios ti yi' mujcu' tiyduñ miid ypocy ycixpi.

¹²Ooy may ayuc iich nmiidity huidibi njayajnimähuaamyich ajcxy per ca' miich ajcxy mhuinjihuñhuiipy cham. ¹³Jacjiini mhuinjihuñhuiipy ajcxy je ayuc huidibi njayajnimähuaamy ajcxy, co Dios quexipy je Espíritu Santo ya naaxhuiñ huidibi tiy'ajt miid. Yi' je' miich ajcxy xyajhuinjihuñhuiipy tüg'óciy Dios ytiy'ajt. Com yi' ca' yci'mhuinma'ñ tunipy. Yi' janchtiy ñigapxtähuipy tüg'óciy ayuc tiy'ajt huidijaty anajty ymidooyb ma Dios Teedy, e nañ yajniguëxictähuipy tüg'óciy tiy'ajt huidibi mimb cidaacp. ¹⁴Je Espíritu Santo iich yi' capxpaady xyaj'idipyich,

com yi' iich ndiy'ajt miich ajcxy xyajhuinjihuñhuaam. ¹⁵Tüg'óciy huidibi Dios Teedy ymiid, nañ një'ajtypich yi', paady jadu'n ti nmína'ñich co je Espíritu Santo xyajhuinjihuiydáaygixipy ajcxy iich yi n'ayuc yi ndiy'ajtich.

Jesús ñimay ymígügtijc co ajcxy yjotmay ahuimbidipy jotcuje'ajtin

¹⁶Tim huaad'ajtp xii tiempo, co iich miich ajcxy ca' xy'ocjac'ixip. Chi co xii tiempo yjacnajtznínicxihiup, huin'it iich miich ajcxy xyjac'ixipy jadüg'oc.

¹⁷E huin'it ajcxy nijëjity Jesús ydiscípulos ajcxy ñayñimaayi miñ xyipy ac jëyi:

—¿Ti jadu'n ytiyyp? Co jadu'n ymína'ñ, co tim huaad'ajtnip xii tiempo mina iich miich ajcxy ca' xy'ocjac'ixnibyich, e co yjacnajtznínicxihiup xii tiempo, huin'it miich ajcxy xyjac'ixipyich jadüg'oc, com nnicxaamich ma Dios Teedy. ¹⁸Chi ajcxy jadu'n ñayñimaayi miñ xyipy:

—¿Ti jadu'n ytiyamy? Co jadu'n ymína'ñ co tim huaad'ajtnip xii tiempo. Ca' iich ajt nhuinjihuñiyim ti jadu'n ytiyamy.

¹⁹Com Jesús ñejhuiyb anajty nej ajcxy yja'amidoohua'ñyii, chi nimay ajcxy:

—Yi' miich ajcxy ooy mjayajtiñhua'ñ. ¿Nej co jadu'n ti nmína'ñich? Tim huaad'ajtnip xii tiempo co iich miich ajcxy ca' xy'ocjac'ixnipy. E chi yjacnajtznínicxihiup xii tiempo, e chi miich ajcxy xyjac'ixipyich jadüg'oc. ²⁰Janch janch iich miich yam nnimaaygixy co

mjotmaybaadip ajcxy, e nañ myäxip ajcxy miid jotmay. Chi je naaxhuiñyäjy ajcxy huidibi ca' xymijpidägyich, xondägam ajcxy, e miich ajcxy nañ mjotmaybaadip. Per yi mjotmay ajcxy ahuimbidipy tüg xondaacin. ²¹Jadu'n ajcxy mjada'ñ jadu'n nej tüg töxyjäy tzaachypi jihuñy co y'ung yma'xung'ada'ñ. E co ti yma'xung'aty ypi'c'ung, chi jäydgoy yi tzaachypi miid xondaacin co tüg jäy ti ymiñ ya naaxhuiñ. ²²Tim jadu'n nej yjaty miid je töxyjäy, nañ jadu'n yjada'ñ miid miich ajcxy. Cham ajcxy jotmay mjihuñy ma m'aa mjot, e chi co xy'ixipyich jadüg'oc miich ajcxy, huin'it ajcxy m'aa mjot yxondäga'ñ. E ni pin huaad mxondaacin ajcxy xycapijciy.

²³Je huin'it xiimbi (co anajty je Espíritu Santo ti ymiñ ya naaxhuiñ) ca' iich miich ajcxy ni ti xyjacyajmibijctzohuipyich, com janch iich miich ajcxy yam jadu'n nimaaygixy co tüg'óciy huidijaty myajmayajtcixyp, chi ajcxy mbijctzohuipy ma Dios Teedy miid iich nxii, e xymöhuipy ajcxy yi'. ²⁴Chambaadni ca'ni ni ti ajcxy mbijctzoy ma Dios miid iich nxii. Pijctzoogix, e xymöhuipy ajcxy yi', jigix mjotcugñhuip ajcxy anaxy.

Jesucristo ymimadac je jibic-huinma'ñ ya naaxhuiñ

²⁵Tüg'óciy jada ayuc tiy'ajt ac jiihuimbit miich ajcxy ti nyajnimäy. Huingomb xii tiempo mina tiydudägy ajcxy nyajmiidmiydactähuipy yi Dios Teedy y'ayuc ytiy'ajt yajxon, e

ca' y'ocjiihuimbitiñ. ²⁶Je huin'it xii co anajty iich ti nhuimbityich ma Dios Teedy, jëbi miich ajcxy mbijctzoogixy ma Dios Teedy tijaty ajcxy myajmayajtyp. Co ti mbijctzooogixipy miid iich nxii, xymóoygixipy yi' Dios Teedy. Ca' ycopicyity co iich yi' nmibijctzohuipy miid miich ajcxy ycixpi. ²⁷Com yi' Dios Teedy nañ xychojcp xyjihuiyb yi' miich ajcxy. Com miich ajcxy jayijp ti xychocyich ti xyjihuiyich, e ti mmibicy ajcxy co ti ndzooñich ma Dios Teedy, paady Dios miich ajcxy xymöhuipy tijaty anajty myajmbijctzooyb. ²⁸Jiiby iich ndzooñ ma Dios Teedy yajpaady, co nmiñich ya naaxhuiñ, per jadachambi n'ixmájtznibyich jada naaxhuiñybi, e nhuimbijtnich ma Dios Teedy.

²⁹Huin'it je' ydiscípulos ajcxy yminañ:

—Cham janchtiy tudägy miydägy, ca' m'ocyajtuuni jiihuimbit ayuc.

³⁰Cham iich ajcxy nnejhuiy co miich mnejhuiyday tüg'óciy tiy'ajt. E ti xyajnimaydäyich co anajty ca' ti tiy'ajt iich ajcxy nmibicy co miich mdzooñ ma Dios.

³¹Chi Jesús y'adzooy:

—¿Nej mmibijcyp cham jada ayuc jadu'n nej ti nnimáaygixy?

³²Jihuiñybijccix co huingonip je xii tiempo, e ti tim paady mina miich ajcxy mgueec-huäcxtáaygixipy nidüg nidüg ma pin timdzocy, e xyajhuí'mgixich naydüg. Per ca'p iich nnaydügity, com yi' Dios Teedy yi' ijtp miid iich. ³³Miich ajcxy yam jada ayuc nyajnimaaayb, jigix ajcxy jotcujc'ajtin mbaadip ma

iich. Ya naaxhuiñ mbadamy ajcxy ayo'n etz tzaachypi. Jotcugiiygix, ca' mdajcixy maygixy, com ti nmimadägyich yi' jibicpi ya naaxhuiñ.

Jesús ymibijctzou Dios miid ydiscípulos ajcxy ycixpi

17 Co Jesús jadu'n yminañ jayijp, chi ypa't'ijxy tzajpcíxy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'ñich jadu'n nej miich jayijp'aty myajnihuinmayiyy. Yajniguëxig iich nmic'ajt iich n'oy'ajt, com iich miich nDeedy'ajtypich, jigix iich nañ jadu'n nyajnikuëxigibych miich nmic'ajt miich m'oy'ajt ma yi' jäy ajcxy. ²Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huidibi ca' ycixipy ytigoyipy. Nmöhuibych jada jugy'ajtin tüg'óciy jäy ajcxy huidibi miich ti xymöyich. ³Je jäy ajcxy huidibi ix'y'ajtp je Dios janchypi, je Dios tügpajcpí etz y'ixy'ajtyp nañ jadu'n Jesucristo huidibi ti mguexy ya naaxhuiñ, ymiid ajcxy jugy'ajtin huidibi ca'ycixipy ytigoyipy niminaa.

⁴Ti iich nyajnikuëxigych miich ajcxy yi' nmic'ajt ya naaxhuiñ, co iich ti nduñ yi' mdung huidibi miich xyajñibijcich. ⁵Jadachambi Dios Teedy yajmijtigiigych miich, miid je mic'ajtin huidibi anajty nmiidich ma miich mhuinduu co anajty ca'ni naaxhuiñybi chondacyñi.

⁶Ti iich miich ya naaxhuiñ nyajnikuëxici yi' nmic'ajt ma yi' jäy ajcxy huidibi miich xymooyich,

huidibi miich mhuin'ijx ma naaxhuiñyäjy ajcxy. Miich yi' ajcxy mjäy, e miich ti xymöyich, e ti ajcxy miich m'ayuc cuydungixy.

⁷Jadachambi ñejhuiñyñip yi' ajcxy, co tüg'óciy tijaty tiy'ajt iich miich yi' xymooyb, jiiby yi' chooñ tzajpjoty ma miich. ⁸Com yi ayuc huidibi miich ti xymöyich, ti iich yi' ajcxy nyajnimaydäy, e ti yi' ajcxy cöbijccixy. E nañ ti ajcxy huinjihuiyigixy tiydudägy co iich jiiby ndzooñich ma miich, e nañ ti ajcxy mibijccixy co miich ya naaxhuiñ xyquejxyich.

⁹Miid yi' ycixpi ajcxy miich Dios Teedy nmibijctzooy, ca' nminaanim miid jacjadyii naaxhuiñyäjy ajcxy ycixpi nmibijctzoy. Miid yida'ajty ycixpi ajcxy huidibi miich ti xymöyich, com nañ mjë'ajtyp miich yi' ajcxy. ¹⁰Tüg'óciy tijaty iich një'ajtyp, nañ mjë'ajtyp miich yi', e tijaty miich mjë'ajtyp nañ një'ajtyp iich yi'; e iich nmic'ajt niguëxi'cp yi' ma yi' ajcxy chinaayin yjugy'ajtin.

¹¹E ca' n'ocjacyajpadaanich ya naaxhuiñ. Iich njäy ajcxy jacyajpadam ya naaxhuiñ. Nñícxnibich jiiby tzajpjoty ma miich. Dios Teedy, cuend'at iich ndiscípulos ajcxy miid miich mmic'ajt huidibi miich ti xymöyich, jigix yi' ajcxy tú'ciy yjot yhuinma'ñ yajpaadipy ma miich, tim jadu'n nej iich ajt tú'ciy njot nhuinma'ñ nyajpaatim. ¹²Co anajty iich njac'yaajity naaxhuiñ miid iich njäy ajcxy, ti ngüend'atyich anajty ajcxy miid je mic'ajt huidibi miich xymooyich. E ni tüg ajcxy ca' yhuinma'ñyidgooy. Abicy iich n'octimpidägy je huidibi

nayyajhuinma'ñyidgooyi (je Judas Iscariote), co yi' anajty jadu'n yajcuydunam jadu'n nej jaybety ymiñ miid yi' ycixpi etz miid iich ycixpi.

¹³Cham iich miich niba'ttigihuaani jada'. Miich m'ayuc mdiy'ajt nyajnimaybich jada naaxhuiñyäjy ajcxy huidibi nyaj'ixpijccypich, jigix agujc jotcujc yhui'mip ajcxy. ¹⁴Ti iich ajcxy yi' nyajnimaydäyich miich m'ayuc mdiy'ajt. E ca' ajcxy y'ixa'ñyii yi naaxhuiñyäjy ajcxy huidibi ca' xymijpidägyich. Com je' co ajcxy yjot yhuinma'ñ ti yajtigach, ca' ytügüy miid yi jacjadyii naaxhuiñyäjy yjot yhuinma'ñ. Jadu'n nej iich ca' ytügüy njot nhuinma'ñ miid naaxhuiñyäjy ajcxy yjot yhuinma'ñ. ¹⁵Ca' iich cham miich nmibijctzoy co myajpidzimipy iich ndiscípulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi ca'oybi ymiñ. ¹⁶Yi' ajcxy yjot yhuinma'ñ ca' ytügüy miid yi jacjadyii naaxhuiñyäjy ajcxy yjot yhuinma'ñ. Tim jadu'n nej iich ca' ytügüy njot nhuinma'ñ miid yi jacjadyii naaxhuiñyäjy ajcxy yjot yhuinma'ñ. ¹⁷Yajhuaatzí ajcxy yjot yhuinma'ñ miid miich m'ayuc, com yi m'ayuc yi' je' tiy'ajt miid. ¹⁸Jadu'n nej miich xyquejxyich ya naaxhuiñ, nañ jadu'n iich yi' ajcxy nguejxhuäcxyich ya naaxhuiñ. ¹⁹Miid yi' ajcxy ycixpi ti nnaygüyegyiijich amuumdügjet ma miich, jigix yi' ajcxy nañ jadu'n ñaygüyegüiyb amuumdügjet ma miich, co ajcxy cuydunipy miich m'ayuc mdiy'ajt.

²⁰E ca' iich jada'ajty ajcxy nibijctzohuüyich. Hue' iich janchtiy nibijctzohuüydaaybich tüg'óciy jäy ajcxy huidibi xymibíjicibich xymijpidägibich miid yi ayuc huidibi iich ndiscípulos ajcxy ycapxhuäcxipy. ²¹Huen ajcxy nidüg'óciy yjot yhuinma'n jaytügüy, jadu'n nej miich Dios Teedy mjot mhuinma'n yajpaady ma iich, e iich njot nhuinma'n yajpaady ma miich. Co yi' ajcxy yjot yhuinma'n jaytügühuipy miid iich ajt njot nhuinma'n, huin'it jacjadyii naaxhuünyjäy ajcxy mibígipy co miich xyquejxyich ya naaxhuüñ. ²²Ti iich ajcxy nmöyich je tiy'ajt etz je oy'ajt huidibi iich miich ti xymöy, jigix ajcxy yjot yhuinma'n jatyimy jaytügühuipy ajcxy, jadu'n nej iich ajt njot nhuinma'n yajpaatim tú'ciy. ²³Hich yajpatpich ma iich njäy, e miich nañ myajpatp ma iich, jigix tiydudägy ajcxy tügmucy y'idipy, e nañ jigix naaxhuünyjäy ajcxy jatyimy nejhuühuipy co miich xyquejxyich ya naaxhuüñ, e nañ co yi' ajcxy ti mdzocy ti mjihuüy jadu'n nej iich miich xychocy xyjihuiyich. ²⁴Dios Teedy ndzojcpych co yi jäy ajcxy huidibi miich ti xymöyich y'idipy ajcxy nañ jadu'n ma anajty n'ityich jilby tzajpjoty, jaydëbi ajcxy ixipy iich nmic'ajt iich n'oy'ajt huidibi miich ti xymöyich. Com miich ti xychocy ti xyjihuiyich jacjayijp ca'ni anajty naaxhuünybi myajcojyñi. ²⁵Dios Teedy, miich ooy mmijity mjanchity, e yi jacjadyii naaxhuünyjäy ca' ajcxy yi' xy'ixy'ajtyp. Hich miich n'ixy'ajtyp. Hich njäy ajcxy ti mibicy ti mijpidägy co miich xyquejxyich

ya naaxhuüñ. ²⁶Ti nyajnimaayich yi' ajcxy pin miich, co miich je' Diosip. E njacyajnimähuaamyich yi' ajcxy tiydudägy, jigix yi' ajcxy nañ jadu'n ñaychogiiyb ñayjihuihuüyb nidüg nidüg, jadu'n nej miich xychocyich xyjihuiyich, e nañ jadu'n jigix iich ndiy'ajt yajpaadipy ma yi' ajcxy yjot yhuinma'n.

Ymajtz ajcxy Jesús

18 Co jadu'n Jesús ycapxymiydacy jayijp, chi jada' ñicxy miid je jäy ajcxy huidibi anajty ajcxy yaj'ixpijcp. Ñicxy ajcxy jim'amy huoc ninaxy, je huoc hue' anajty xijity Cedron. Ñicxy ajcxy jim ma anajty tüg aguemy. Chi Jesús ytigiüy ma je aguemy miid ydiscípulos ajcxy. ²Judas huidibi anajty cäyegam Jesús, ñejhuüyb anajty ma je it ma anajty miid'oy canaag'oc je' ydiscípulos ajcxy. ³Chi jada' Judas miiddzooñ soldados ajcxy etz jacjadyii tungmiidpi huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymiid ajcxy linterna, ymiid ajcxy chinjiin etz canaagnax tijaty huidibi anajty ajcxy miid chiptuñ. ⁴E Jesús com ñejhuüydaayb anajty tüg'óciy nej anajty yjada'n y'ayohua'n, chi jipcohuägty je ymaymidzip ajcxy, e nimay:
—¿Pin ajcxy m'ijxtaayb?
⁵Chi je' ymidzip ajcxy y'adzooy:
—Yi' iich ajcxy n'ixtaayb je Jesús, je Nazaret jäy.
Chi Jesús yminañ:
—Hich jëdu'n.
Je Judas huidibi anajty cäyecp Jesús, jim anajty ytinäy miid

Jesús ymidzip. ⁶Co Jesús jadu'n yminañ: “İich jëdu'n.” Chi ajcxy yëphuimbijtay jadu'ñyi. ⁷Chi Jesús jadüg'oc y'amidooy ajcxy:

—İPin ajcxy m'ijxtaayb?

Chi ajcxy jadüg'oc y'adzooy:

—Yi Jesús, je Nazaret jäy. ⁸Chi Jesús yminañ:

—Ti ajcxy njanimäy co İich jëdu'n. Pen janch İich miich ajcxy xy'ijxtaayb, najtzmazdiydäy jadayaab İich nmigügtijc ajcxy, huen nicxcixy.

⁹E jadu'n yajcuyduñ je ayuc co anajty Jesús cİ'm ti yminañ: “Tüg'óciy jäy huidibi nDeedy ti xymöyich, ca' ni tüg jëbi huaad ytigooy.” ¹⁰Chi jada' je Simón Pedro huidibi anajty miid tüg espada, juudy je y'espada ma ñidijc, e chi yajtzaachiiyi je Teedy mijtungmiidpi ytumbi, tüg yta'tz'ac aa'oy'amybi yajminájciy. Je tumbi hue' anajty xiijity Malco. ¹¹Chi Jesús nimay Pedro:

—Pidäg m'espada ma ñidijc. Ca' mnejhuüy co copicy nyajnaixipyich je tzaachypi je ayo'n huidibi Dios Teedy ti xyajnigo'adugiyich. Min n'ocminaxy n'ocyajnaixiyich jada tzaachypi jadu'n nej ixipy tüg tasi ta'm'ujtnii ngo'uucnaxyich.

Jesús ma je Teedy mijtungmiidpi yhuinduu

¹²Chi je soldados ajcxy, je soldado yhuindzin etz judíoäy ajcxy ytungmiidpi huingohuägiy ajcxy Jesús. Chi ajcxy majch, e chi ajcxy cıxojch. ¹³Chi ajcxy jayıp yajnicxy Jesús ma Anás yajpaady, je' anajty Caifás ymıd'ajtyp, je huidibi anajty mijtungmiid ma teedytije ajcxy

ymin je huin'it jimijt. ¹⁴Je Caifás je' anajty ti yecy je capxhuijn ma yi judíoäy ajcxy co tügtecy yminañ: jac'oy co tüg jäy y'ögipy miid tüg'óciy naax cajp ycixpi.

Pedro yminañ co ca' ix'y'adyii Jesús

¹⁵Simón Pedro miid jadügpı ydiscípulo ypanıcx ajcxy Jesús (co je ymidzip yajnicxi mach). E je jadügpı ydiscípulo ix'y'ajtip anajty yajxon je teedy mijtungmiidpi, paady ytigiıy axam huin'it co Jesús ymidzip yajtigiıyi ma je teedy mijtungmiidpi ytijc. ¹⁶E je Pedro jiıby je' yhui'mıy ma tijc aguu. E je jadügpı ydiscípulo co anajty ajcxy ñay'ix'y'adyii miid je teedy mijtungmiidpi, chi ypidzimy migapxy je tijc aguu adınaayb, chi Pedro ajcxy yajtigıy jiıby tigoty. ¹⁷Chi jada' je töxy'anäg huidibi anajty tijc'aguu adınaayb, nimay je Pedro:

—İNej ca' miich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸Je tumbidijc ajcxy etz je soldadtije ajcxy ti anajty ajcxy oy jıın yajmijııygıxy co anajty chachtiichity, e Pedro nañ jim anajty nañ jadu'n miid xamy ajcxy.

Je teedy mijtungmiidpi yajcomıdou Jesús ypocy

¹⁹Chi je teedy mijtungmiidpi y'amidooy Jesús pinjaty anajty ti yaj'ıxpıcy etz tijaty anajty ti yaj'ıxpıcy. ²⁰Chi Jesús y'adzooy: —Ti İich oy njacapxy njamiıydägy mayjäyoty. E ti İich njatyımy nay'ıxpıcyich ma miich ajcxy

mnaymujctacin etz ma Dios ytiyc,
ma yi judiojäy ajcxy nidüg'óciy
ñaymugyíi. Ca' ni ti ameech
ti nnigapxyich. ²¹¿Na'amy co
xyjactim'amidooyich ti anajty ti
nyaj'ixpicyich? Yi' ajcxy amidou
pinjaty ti xy'amido'ljtich n'ayucich,
yi' ajcxy nejhuíyib ti iich jadu'n ti
nyaj'ixpicyich. Yi' ajcxy tüg'óciy
ñejhuiydaayb nejaty iich ti
nmina'nich.

²²Co jadu'n y'adzooy Jesús,
huin'it tüg judío tungmíidpi huidibi
anajty jim huingon tinaayb ma
Jesús, chi tüg ci' acojxgy Jesús, chi
minañ:

—¿Nej co jadu'n jibic m'adzooy yi
teedy mjtungmíidpi?

²³Chi Jesús y'adzooy:

—Pen jibic iich ti n'adzooy yec
tiy'ajt nej co yjibicity. Pen oy iich ti
n'adzooy, ¿nej co xycoxyich?

²⁴Chi Anás nimay soldadtijc co
huen Jesús yajnicxy cixoch jim ma yi
Caifás ytiyc, je teedy mjtungmíidpi.

Chi Pedro jadüg'oc yminañ co ca' ix'y'adyi Jesús

²⁵Simón Pedro jimni anajty
ytinäy ma jímiba' yxamy anajty, chi
ajcxy amidoy jadüg'oc:

—¿Nej cay yi' miich xyaj'ixpijcp
nañ jadu'n?

Chi Pedro jadüg'oc coyüch Jesús
yminañ:

—Ca' je' n'iichity.

²⁶Nidügti ajcxy je teedy
mjtungmíidpi ytumbi, je' anajty
y'amigüg yi Malco, huidibi Pedro
yta'tz'ac quejtzpujxi, chi jadu'n
yminañ:

—¿Nej ca' mdiy n'ijxyi jim ma je
aguemy miid Jesús?

²⁷Chi Pedro midugiig'oc oy
coyüch yhuindzin, e tim huin'itiy
tzey oy yaaxigy.

Jesús ma je gobernador yhuinduu

²⁸Chi ajcxy jim yajtzoón Jesús
ma Caifás ytiyc yajnicxy ajcxy
ma agujctijc, tim jopyñi anajty.
Chi je judiojäy ca' ajcxy ytiigi
ma agujctijc, com ca' anajty
ytundigoyaangixy miid judiojäy
ycostumbre. Ca' ajcxy ytiigihua'n
anajty ma je romanojäy gobernador
ytiyc amayxiijoty, e ca' anajty
ajcxy ñayyajjibiccihua'ñyii. Com
co jadu'n ycanayyajjibicciy ajcxy,
e huin'it ca' ajcxy ycacaay ma
je pascua xii adzuu'ajtin. ²⁹Co
ca' ajcxy ytiigihua'n anajty ma je
agujctijc, chi je gobernador Pilato
nibidzimy ajcxy tiba'y ma anajty
ajcxy miidity Jesús cuend'aty. Chi
Pilato yminañ:

—¿Ti xihuín ajcxy mmiid, miid
jadayaabi yëydijc?

³⁰Chi ajcxy y'adzooy:

—Co ixypiy ca' ti jibicpi tuñ, ca'
ixypiy iich ajcxy ya yi' nyajmíñ ma
miich.

³¹Chi Pilato yminañ:

—Yajnicxcix miich ajcxy. Nicx
tiydingix jadu'n nej miich ajcxy
mley y'ané'my.

Chi je judiojäy ajcxy y'adzooy:

—Iich ajcxy ca' ni ti mic'ajt
nmiidity nicxy iich ajcxy njäyyaj'ögy.

³²Co jadu'n ajcxy yminañ, chi
jadu'n ajcxy cuyduñ je Jesús
yci'm'ayuc jadu'n nej anajty ti
yminañ ti o'cin anajty ypadamy.

³³Chi Pilato jadüg'oc ytiigi yjiyb
agujctigoty, chi coyaaxiij Jesús, chi
nimay:

—¿Nej miich je' rey'ajtp ma yi judíojäy ajcxy?

³⁴Chi Jesús y'adzooy:

—¿Nej mgi'mhuinmañ miid xy'amidooyich pen iich nrey'ajtpich, o huingjäy ti xyajnimäy co nrey'atyich?

³⁵Chi jada' Pilato y'adzooy:

—¿Nej nañ judiojäy jada' iichi? Mgi'mnaax mgi'mgajp etz je teedy miitungmiidpi ti xyciyecy ma iich. ¿Ti ti mdundigooy?

³⁶Chi Jesús y'adzooy:

—Iich ca' n'ane'myich ya naaxhuiñ. Huingduum iich n'ane'min nmiididyich. Co ixipy ya naaxhuiñ n'oc'ane'myich, tüg'óciy iich nmigügtijc ajcxy ti ixipy ajcxy tziptungixy, ti ixipy ajcxy xyñihua'ñich. E ca' ixipy ti naygyegyijich ma yi judíojäy tungmiidpi ajcxy. Per janch iich ca' iich ya naaxhuiñ n'ane'myich.

³⁷Chi Pilato y'adzooy:

—¿Nej mrey miichi?

Chi Jesús yminañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amido'ijtibich yi' n'ayucich.

Pilato y'ane'my huen Jesús yaj'ögyii

³⁸Chi Pilato y'adzooy:

—¿Ti jadu'n mdijy tiy'ajt tiydudägy pi?

Jadu'nyi je' jada'ajty yjacminañ, chi pidzimy jadüg'oc tiba'y ma anajty je judíojäy ajcxy. Chi ajcxy nimay:

—Ca' iich ni ti bocy nbaadyich ma jada jäy ma yi romanojäy yley.

³⁹E com miich ajcxy miid tüg costumbre co tüg nnajtmadziyim machyjäy miid jada pascua xii ycxipi, ¿nej mdzojcy ajcxy co nnajtmadzihuibyich jada judíojäy rey?

⁴⁰Chi ajcxy nidüg'óciy minanday:

—Jadayaabi jäy ca'

mnajtmadzihuipy, yi' janchtiy mnajtmadzi' yi Barrabás.

Barrabás hue' je' anajty tüg meetzpi.

19 Chi jada' Pilato ané'min pidacy co huen ajcxy Jesús huinhuopy jiphuopy. ²Chi jada' je soldados ajcxy yaj'oyiiy tüg corona mij'apy pa'apy, chi ajcxy yajcojeniy Jesús. Chi ajcxy yajnijeniiy tüg rey yhuít ucypí ycolor. ³Chi soldados ajcxy huingohuägiy jadüg'oc capxpooxcixy yajxigy'amy, nimaaygixy:

—¡Viva miich judíojäy rey!

Chi ajcxy ooy huingojxy jipcojxy.

⁴Chi Pilato jadüg'oc ypidzimy tiba'y. Chi nimay je mayjäy:

—Cham ajcxy nyajpidzimy tiba'y jada Jesús, jigix ajcxy mnejhuihuip co ca' ni ti pocy ti nbaadyich ma yi'.

⁵Co Jesús ypidzimy tiba'y miid je apy corona ma ycohuajc etz je rey yhuít ucypí ycolor. Huin'ti Pilato yminañ:

—Ijxcix, cha je yëydijc.

⁶Co je teedy tungmiidpi etz je judiojäy ajcxy ijxy, chi ajcxy yminanday nidüg'óciy aguipxyjatyi:

—Yajcruudzpet, yajcruudzpet.

Chi Pilato yminañ:

—Yajcruudzpejtciy miich ajcxy, janch iich ca' ni ti tiy'ajt nbaadyich nej iich yi' nyajcruudzpedipy.

⁷Chi je judiojäy ajcxy y'adzooy:

—Iich ajcxy miid tüg cötujcin, jëbi y'ögy miid iich ajcxy ngötujcin

ycixpi, com ti ycapxtigooy co ymina'n co yi Dios yteedy'ajtyp.

⁸Co jada ayuc midooy Pilato, chi nīgi chigiygoty. ⁹Chi ytigiiy jadüg'oc ma je cötujctac miid Jesús, chi nimay:

—¿Ma miich tiyi mgogajpity?

E Jesús ca' y'adzooy.

¹⁰Paady Pilato ymina'n:

—¿Hich miich ca' xy'adzohua'n?

¿Ca' mnejhuüy co nmiididyich mic'ajt jëbi nnahtzmadziy etz nañ jëbi nyajcruudzpety?

¹¹Chi Jesús y'adzooy:

—Ni ti mic'ajt ixypiy mgamiidity ma iich, pen ca' ixypiy mic'ajt ti xymöyich yi huidibi ane'mb jiiby tzajpjoty. E paady ycixpi yi tiibi iich xyciyecyich nīgi yi' pocy miidity ca'ydi miich.

¹²E huin'it Pilato ooy yjahuinma'n ixtay nej huaad ca' jëbi ocnajtmadziy Jesús. E je judíojäy, je Jesús ymidzip, nīgi anajty ajcxy chachxi'idich:

—Pen miich mnajtmadziyib jada Jesús, huin'it ca' m'ocjacnaymigüg'ájtinipy miid yi mhuindzin je César huidibi ané'min ti xymöy. Com tüg'óciy pinjaty naydijip rey, ca' yi' miid nay'ixa'níyii je César.

¹³Co Pilato jadu'n ayuc midooy, chi yajpidzimy Jesús tiba'y. Chi Pilato y'ixtacy jim ma je' y'ane'mdac ycötujctac, jim ma je it huidibi anajty xiijip Empedrado, hebreo'amy xiijity Gabata. ¹⁴Hue' tim cujcxii anajty, e chi com jabom anajty je pascuaxii ycodiicxni, co Pilato jadu'n nimay judíojäy ajcxy: —Cha ajcxy jada mrey.

¹⁵E je' ajcxy y'adzooy:

—Huen ögy, huen ögy.

Yajcruudzpety.

Chi Pilato ymina'n:

—Miich ajcxy mrey, ¿miñ n'ocyajcruudzpétyichi?

Chi je teedy tungmiidpi ajcxy y'adzooy:

—Hich ajcxy ca' iich ajcxy huingbi rey nmiidity, jëyi César iich ajt nrey'ajtim.

¹⁶Chi Pilato cïyejcy Jesús ma je judíojäy ajcxy, huen ajcxy ci'm yajcruudzpety. Huin'it ajcxy Jesús nihuaügiy. Chi ajcxy yajtzooñ.

Yajcruudzpejty ajcxy Jesús

¹⁷Chi ajcxy je cruudz Jesús ci'm yajquejycabiüy. Miid nicx ajcxy ma je it xiijity o'cpi cohuajc, hebreo'amy xiijity Gólgota. ¹⁸Jim ajcxy yajcruudzpejty quipxyi miid jametz jäy, tüg anajty'amy, jadüg a'oy'amy etz Jesús cuje'amy. ¹⁹Chi Pilato ane'my huen cijxjay ayuc ma je cruudz, e jadu'n je ayuc ajcxy jay: “Jesús, Nazaret jäy, je judíojäy ajcxy yrey.” ²⁰May ajcxy ooy je judíojäy capxy je ayuc huidibi anajty cijxjay ma je cruudz. Com je it ma anajty ajcxy Jesús ti yajcruudzpejtcixy mihuingon anajty Jerusalén. Hue' anajty yjayity: hebreo'amy, latin'amy etz griego'amy. ²¹Chi je teedy mijtungmiidpi ajcxy nimay je Pilato: —Ca' ixypiy jadu'n ti mjay: “Judíojäy yrey”. Hue' ixypiy ti mjay: “Yi' jadu'n naydijip iich judíojäy xyrey'ajtpich.”

²²Chi Pilato y'adzooy:

—Yi tiibi njaayich, ti iich yi' njaay, ca' nyajtigadza'nich.

²³Co soldados ajcxy yajcruudzpejtay je Jesús, huin'it

je' yhuít ajcxy huijtzi'ci. Chi ajcxy je huit yajhuäcxy midaxpicy. Chi soldados ajcxy cijptüg ciichypijcy. Yi' yjocxhuit jadu'n nej anajty ytügijjpxuyiyity. ²⁴Chi ajcxy ñayñimayi ac jëyi soldadtijc:

—Ca' huaad ajt n'agiidziyim jada jocxhuit. Tzoc ajt suerte n'oc'ijxim, jigix ajt nnejhuiyim pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n yminañ: “Yajhuäcx ajcxy iich nhuit, e ma iich njocxnijen jim ajcxy suerte ijxy.” Je' je' huidibi soldadtijc ajcxy ycuyduun.

²⁵Jim ma Jesús ycruudzmiyc, jim anajty ajcxy ytinäy: Jesús ytaj, je ytaj chi', je María (Cleofas ytöxyijc), etz María Magdalena. ²⁶Co Jesús ijxpaty ytaj etz je ydiscípulo huidibí anajty ooy nigi tzocy ma ytaj ymijc, chi nimay ytaj:

—Nan, iich nmigüg huidibi tinaayb ma miich mmijc, yi' xycuend'adip jadu'n nej jihuüy miich yi' xytaj'adyii.

²⁷Chi Jesús nimay je' ydiscípulo:

—iich ndaj miich mgüend'adipy, jadu'n nej ixypy mgi'mdaj'adyii.

Jadu'n nej xii tiempo jac nicxni Jesús ytaj tzinaydacpicy ma jada discípulo ytiyc.

O'c Jesús

²⁸Co jadu'n ytundaayi yjajtaayi, chi Jesús nejhuiy co ti anajty tüg'óciy ytundäyii yjajtäyii jadu'n nej Dios tzocy. Huin'it jadu'n yminañ:

—Tidziyininibich.

Co jadu'n yminañ, je' anajty ycuydundaayb nej anajty ycojayity ma Dios ñecy miid yi' ycixpi.

²⁹Jim anajty tüg pi'c uugiñ miid anajty vinoxunni. Chi ajcxy je' yajxoogy tüg esponja (jadu'n yi' nej po't) miid vinoxunni, e chi yajjiip'eedziy tüg paxyijj, je' miid yajjädy je vinoxunni ma Jesús y'ahuac. ³⁰Co jada' Jesús co'uucnaxjy je vinoxunni, huin'it jadu'n yminañ:

—Ti tüg'óciy nguydundäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyjijp

³¹Com jabom anajty je pascua mijxii (amayxii ooy), e nañ sábado xii anajty. Paady copicy anajty co ajcxy yajminájcipy ajcxy je jäy ninicx je tiibi anajty yajcruudzpejtcixy. Miid je' ycixpi je judíojäy ajcxy ñicxy ma Pilato pijctzoy may'ajt co huen ane'my yi soldados ajcxy, co huen nicxy yajtijy je jäy ytecy ajcxy huidibi ti yajcruudzpety. ³²E chi ajcxy je soldados yja'ty ma je it ma ajcxy yajcruudzpejty Jesús. E je metzpi jäy ajcxy ytecy tiji huidibi ajcxy yajcruudzpejt tú'ciy miid Jesús. ³³Co je soldados ajcxy ymijhuägy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴Chi tüg soldado cumy Jesús ma ycaachyjijp miid quipy jijpxu'nybi. E huin'it tim mic'amy ni'py etz nii ypidzimy. ³⁵Tüg jäy jim anajty ixxy nej ytuni yjajti, e nañ yejc tiy'ajt. E je' ytiy'ajt janch je', e je' nejhuiyb co yjanchity. Miid je tiy'ajt ycixpi jëbi miich ajcxy nañ jadu'n mmibijctähuip. ³⁶Paady je' jadu'n ytuni yjajti, co jadu'n anajty

yajcuyduna'n jadun nej yjaybetyity ma Dios ñecy, co jadun yminañ: "Ca' huaad ni tüg ypajc yajtijy." ³⁷E jadüg'it anajty ycojaayity ma Dios ñecy, ma jadun yminañ: "Y'ixipy ajcxy je jäy huidibi ajcxy ycuum."

Yajnaaxtigiyy Jesús

³⁸Jim anajty José huidibi anajty cogájpip Arimatea. Yi' je' huidibi anajty mijpidacp Jesús, oy anajty ca' capxpídzimy, miid co anajty chigiy miid je judiojyä ajcxy huidibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jëbi ñicxy yajtzooni Jesús ñaaxnícx ma anajty ti yajcruudzpedyiy. Co Pilato a'ixiy, chi José ñicxy jim oy yajminajci je Jesús ñaaxnícx, e chi yajnicxy.

³⁹Nañ miid ñicxy José je Nicodemo, je huidibi anajty yayijp ti ni'oy Jesús coodz. Nicodemo yminicx oy nimigo'px libra mirra etz áloes tzooy huidibi ooy oy yxuugy. ⁴⁰Chi ajcxy yajpidici Jesús ñaaxnícx, chi ajcxy mo'n miid poob huit, chi tzoyiy ajcxy miid mirra etz áloes tzooy, jadun nej je judíojäy ajcxy ycostumbre miidity co o'cpi yajnaaxtigiyygixy. ⁴¹Huigon ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigiy. ⁴²Jim ajcxy Jesús ñaaxnícx yajnaaxtigiyyi, co anajty jim yjac-huigonity, e janch jottigooy ajcxy yajnaaxtigiyy, miid co anajty ti chu'iiyñi, e je judíojäy ajcxy tzachni'ixiiyñi tzach'a'ixiiyñi co je amayxii anajty chondägaani com jabom.

Jesús jugypijc jadüg'oc co anajty ti y'oc'o'cni

20 Tim seman ixtigi', moñiy anajty, ca' anajty oy xiimiyyñi. Huin'it María Magdalena ñicxy ma Jesús anajty ti ñaaxtigiy. E chi jim ijxy co je tzaa ti anajty jim yajjiidiguecy ma je jut agu. ²Co ajcxy ijxy je jut ahuädz, chi jada' mic'amy poyigy ninicxy Simón Pedro, etz je jadügpi ydiscípulo huidibi anajty Jesús miid ooy naychogyii, chi nimay: —Ti yajtzoongixy iich ajt nHuindzin ñaaxnícx ma ajcxy yajnaaxtigiyy, e ca' nejhuiyim ma ajcxy ti pidaaccixy.

³Huin'it ajcxy nimetz choon poyigy Pedro etz je jadügpi discípulo, ñicxy ajcxy ma je o'cpi anajty ñaaxtigiyy. ⁴Poyigy ajcxy ñicxy nimetz, per je jadügpi discípulo yayijp ñajxy, e yayijp jim oyja'ty ma je naaxtigiydac. ⁵Chi yco'ixiiy jutjoty, huin'it jim oy ixty je mo'n huit jiiby jutjoty y'ooxnäy, per ca' yi' jiiby ytigiy jutjoty. ⁶Simón Pedro co ymiñ jac'axam, tim janitigiyy jutjoty, chi ijxy je mo'n huit y'ooxnäy jiiby jutjoty. ⁷E chi ijxy je cöxotz, je huidibi anajty miid ycohuajc yxochity, abicy je' anajty, ca' anajty tú'ciy y'ooxnäy miid ymo'n huit. Y'ijx ajcxy je cöxotz yajxon y'anëgyity abicy. ⁸Huin'it ytigiy jutjoty je jadügpi discípulo huidibi jacjayijp ja't. Chi ijxy, e huin'it mibijcy co Jesús ñaaxnícx ca' anajty jiiby. ⁹Ca'ni anajty ajcxy yajxon huinjihuüy co anajty jadun ycojaayity ma Dios ñecy, co anajty je Cristo

yjugypiga'n. ¹⁰Chi je metzpi ajcxy ydiscípulos yhuimbijty ma ytiç.

**Jesús nayguëxici ma
María Magdalena**

¹¹E je María jim yhui'miy ma je o'cpi jut ayaaxip. Chi ayaaxip yco'ixiy ma je jut. ¹²E chi ijxy metz ángel, poob huit ajcxy ymiid, y'iñaaygixy jiiby ma je Jesús ñaaxnícx anajty yhuijtnäy, y'iñaaygixy tüg cöduy, jadüg tecy ixaay. ¹³Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnícx yajnicxi, e ca' nnejhuiyich ma ajcxy ti pidägy.

¹⁴Jadu'n anajty ymina'n, co ñayjii'ijxi, chi ijxy Jesús ytinäy ma yjiix, e ca' ijxcapty pen Jesús je' anajty. ¹⁵Chi Jesús ymina'n:

—Töxyjäy, çti co myäxy? ¿Pin m'ixtaayb?

María hue' anajty tijy je aguemy cuend'ajtpi migapxip, paady jadu'n ymina'n:

—Huindzin, pen ti myajnicxy Jesús ñaaxnícx, nigapx ma ti mbidägy, e iich nícxy nyajtzoönich.

¹⁶Chi Jesús ymina'n:

—María.

Chi jada' María yhuäg-huimbijty, chi yajxon huindicxpejty, chi nimay:

—iRaboni! —jada hebreo ayuc yhuimbidzimy Huindzin.

¹⁷Chi Jesús nimay María Magdalena:

—Ca' xyñidooñich, com ca'ni iich nba'ttigiy ma Dios Teedy yajpaady.

Nicx miich ixta' nmigügtijcich, e nima' co nnicxaamich ma Dios Teedy, iich nDeedy etz miich ajcxy mDeedy, iich nDios, etz miich ajcxy mDios nañ jadu'n.

¹⁸Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yi' ti xycapxymöyich co nyajnimähuiyich miich ajcxy.

**Jesús nayguëxici ma
ydiscípulos ajcxy**

¹⁹Co je huin'it xiimbi chuu'iiy seman ixtigi', aducy anajty tijc'aguu y'ity ma anajty je discípulos ajcxy yajpatcixy, miid co anajty ajcxy tzigiy je judíojäy ajcxy huidibi anajty midzip'ajtp Jesús. Chi Jesús ytigiiy cujc'amy ma je' ajcxy, e chi jada' capxpocxy ajcxy, nimay:

—Jotcugi' miich ajcxy.

²⁰Yam jadu'n anajty ymina'n, chi ajcxy yaj'ijxy je' yci' ma je clavo ytigiiy, etz ycaachyjiip ma anajty jäy ti ycumyii. Chi yjotcugiiy ajcxy co ajcxy ijxy je yHuindzin. ²¹Chi jada' Jesús jadüg'oc capxpocox, nimay ajcxy:

—Jotcugi' miich ajcxy. Jadu'n nej iich nDeedy xyquejxyich ya naaxhuiñ, nañ jadu'n iich miich ajcxy yam nguejxhuäcxy miid iich n'ayuc.

²²Co Jesús jadu'n ymina'n, chi jada' ajcxy ni'buxujy cöbuxujy nimay:

—Huen Dios yjihui'n ymic'ajt xy'adigiy xyjottigiy ajcxy.

²³Huenpinjäyity huidibi miich ajcxy mbocyhuinmeecxyp, nañ ypocyhuinmeecxipy Dios Teedy.

Huenpinjäyity huidibi miich
ajcxy ca' ypocy mhuinmeecxaani,
nañ jadu'n Dios Teedy ca' yi'
ypocyhuinmeecxa'ñyii.

**Tomás ymibijc co
yHuindzin yjugypijcy**

²⁴Tomás je' huidibi anajty miid
majmetz yca'pxy Jesús ydiscípulos
ajcxy, je huidibi anajty yajtijp
Dídimo, ca' je' anajty jim choonity
co Jesús ymiñ oga'n. ²⁵Chi je
jacjadyii ajcxy ymigüg ñimaayi:
—Ti ñich ajcxy n'ixy je Huindzin
Jesús.

E chi je' y'adzooy:

—Pen ca' n'ixyich ma yi' yci' je
clavo'au, e pen ca' ngühuäch
ngodijyich ma clavo'au, e ngi'
nbidägyich ma ycaachyjijp ma
anajty ycumyity, ca' nmibigipyich
co yjanchity.

²⁶Chi jacoductujc xii ajcxy
jadüg'oc anajty yajpaady tigoty
nidüg'óciy je discípulos ajcxy.
Tzooñ anajty Tomás nañ jadu'n.
Chi Jesús ymiñ. Agiy anajty tijc co
Jesús ytinay'ahuiy cuje'amy ma
je' ajcxy. Huin'it ycapxpocxy, chi
nimay:

—Jotcugi' miich ajcxy.

²⁷Chi jada' nimay je Tomás:

—Pidäg ya mgühuäch ma clavo'au
ma ngijich. Najtxxaji' mgi' etz pidäg
ma ñich ngaach ma jäy xycumyich,
e mibic yajxon tiydudägy.

²⁸Chi Tomás y'adzooy:

—Ñich miich nHuindzin'ajtyp etz
ñich miich nDios'ajtyp.

²⁹Chi Jesús Tomás nimay:

—Miid co miich ti xy'ixyich,
paady miich ti mmibicy. Jotcujc
yi' ajcxy huidibi ca' xy'ixyich, e

ti ymibicy co ti njugypicyich co
n'o'gyich.

**Jada ayuc ngojaaybich ma jada
necy, jigix miich ajcxy mmibigipy co
Jesús je' yi' je Cristo, je Dios y'ung**

³⁰Ti anajty Jesús ooy tuñ
mijhuinma'ñ ma ydiscípulos ajcxy
yhuinduu huidibi ca' ycojaayity ma
jadayaabi necy. ³¹Paady ycix jada
ngojaayich jigix ajcxy mmibigipy
co Jesús je' yi' je Cristo je Dios
y'ung. E co miich ajcxy mmibigipy,
huin'it mbaadip jugy'ajtin huidibi
ca' tücc'i'yi ycixipy ytigoyipy miid
Jesucristo yxii ycixpi.

**Jesús ñayguëxigyii ma
ydiscípulos ajcxy nihiuxtujcpi**

21 Co jadu'n jayijp ytuni
yjajti, huin'it jadüg'oc
Jesús ñayguëxici ma je' ydiscípulos
ajcxy jim ma mejypa', je huidibi
anajty xiijp Tiberias mejy. E jadu'n
ñayguëxici: ²Jim anajty ajcxy Simón
Pedro miid Tomás huidibi jäy ytijyp
Dídimo. Nañ jim Natanael huidibi
anajty cogajp jim Caná Galilea
naaxjot. E nañ jim anajty je Zebedeo
ymang ajcxy etz jametz discípulos
ajcxy. ³Chi Simón Pedro yminañ:

—Ñicxy n'oc'acxmachich.

Chi ymigügtijc ajcxy yminañ:

—Tzoc ajt jámim.

Chi ajcxy ytigiiy ma tüg barco. E
je huin'it tzuu ca' ni ti ajcxy majch.
⁴Co yjobiiy jim Jesús anajty ytinäy
ma mejypa'. Je' ydiscípulos ajcxy
ca' anajty ajcxy nejhuüy co Jesús je'
anajty.

⁵Chi Jesús yminañ:

—Migügtijc, ¿nej ca' ajcxy
mbaadyñi acxi?

Chi ajcxy y'adzooy:

—Ca' ni ti.

⁶Chi Jesús yminañ:

—Pidaaccix ajcxy je huidibi miid m'acxmajtzcixy aa'oy'amy ma yi barco, e huin'it ajcxy mbaadipy acx.

Chi ajcxy pidacy je acxmadzi'n aa'oy'amy, e huin'it janch adzaach ajcxy yajpidzimy, co janch may acx anajty ti ytigy. ⁷Je ymigüg huidibi miid Jesús ooy anajty ñaychogyi, chi nimay Pedro:

—Je' yi', iich ajt nHuindzin.

Co jadu'n midooy Simón Pedro co anajty yjëjty je Huindzin Jesús, huin'it yhuit yajtigi. Com ti anajty yhuit jeñ, com jadu'n anajty jac'oy ytuñ. Chi ytigy meyyoty huitmiid.

⁸Jacjadyi ajcxy ymigügtijc yjady ma mejypa' miid je barco, pahuich pajugucy ajcxy je y'acxmadzi'n janch ujtz miid acx. Hue' anajty ca' ooy yjiguemyty ma mejypa', jëyi anajty migo'px metro yjiguemyty.

⁹E co ajcxy ymech ma mejypa', chi ajcxy ijxy co jim anajty jimbajc y'ity ni'ixi', e jim anajty acx jimbajc nigix huidibi yajtzaayb, e nañ jim anajty tzajcaagy. ¹⁰Chi Jesús nimay je' ydiscipulos ajcxy:

—Yajmiingix yi acx tiibi ajcxy mmajtzcixy.

¹¹Chi Simón Pedro ypejty barcojoty, chi yajpidzimy huindiztuum y'acxmadzi'n ujtz miid may'acx. Chi ajcxy michoy migo'px jahuixchigi'px majtugiig acx mijatypi, e jadu'n ca' je acxmadzi'n yciich miid tzachmay'acx. ¹²Chi Jesús nimay ajcxy:

—Min ajop'ajtcix.

E ni tüg ydiscipulos ajcxy ca' y'amidoohui:

—¿Pin miich?

Com ñejhuiyb anajty ajcxy co je' anajty Huindzin Jesús. ¹³Chi Jesús ymijhuägy ma je acx ci' etz tzajcaagy anajty y'ity, e chi yajhuäcxy, chi moyday ymigügtijc ajcxy.

¹⁴E je' je' anajty je midugiig'ocpi co Jesús ñayguëxici ma je' ydiscipulos ajcxy, huin'it co yjugypijcy co y'o'cy.

Jesús yajni'ixiij Simón Pedro ti ytunipy

¹⁵Co ajcxy y'ajop'ajttay, chi Jesús nimay je Simón Pedro:

—Simón, Jonás y'ung, ¿nej xyjactzojcpich miich, ca'ydi jada jacjadyi ndiscípulo'ichi?

Chi y'adzooy Pedro:

—Huindzin mnejhuiyb miich ndzojcypich njihuiybich miich.

Chi Jesús nimay:

—Cuend'at iich njäy, jadu'n nej jihuüy borregi cuend'ajtpi yaj'ocy yi' yborregi.

¹⁶Chi Jesús mimejtz'oc yminañ:

—Simón, Jonás y'ung, ¿nej xychojcypich xyjihuiybich miich?

Chi Simón y'adzooy:

—Huindzin, mnejhuiyb miich ndzojcypich njihuiybich miich.

Chi Jesús nimay:

—Cuend'ajtigich njäy, jadu'n nej yi borregi cuend'ajtpi cuend'aty yborregi.

¹⁷Co midugiig'ocpi oy y'amidooy:

—Simón, Jonás y'ung, ¿nej xychojcypich xyjihuiybich?

Chi Pedro yjotmaybijcni co midugiig'ocpi y'amidoohui: “¿Nej xychojcypich xyjihuiybich?”

Chi Simón yjac'adzooy:

—Huindzin, miich mnejhuiydaayb tüg'óciy, e nañ mnejhuiyb co iich ndzojcyp njihuiybich miich.

Chi Jesús jacnimay:

—Cuend'ájtigich njäy, jadu'n nej borregi cuend'ajtpi cuend'aty yborregi. ¹⁸Janch janch iich miich yam jadu'n nimäy: “Co anajty miich mjac'anägnity, ci'm anajty mhuit nayyajñijeniyi, e mnicxp anajty ma mdımdzocy. E co mjacmijjähuiipy, huin'it mgi' mnajtxaxähuiipy, e huingbi mhuit xyajñijenihuiipy, e xyajnicxyipy ma anajty ca' mdzocy.”

¹⁹Co Jesús jadu'n yminañ, chi Pedro yajhuinjihuiy jadu'n nej anajty jäy ajcxy yaj'öga'ñyii miid Jesús y'ayuc ytiy'ajt ycixpi, e nañ ma yi y'o'cin tiy'ajt yegipy co ymiid Dios ytiy'ajt.

Je discípulo huidibi anajty

Jesús ooy tzocy jihuüy

²⁰Chi Pedro ñayjii'ixxi, chi iixy co anajty tú'ciy anajty ymiingixy je' ydiscípulo huidibi anajty Jesús ooy tzocy jihuüy je huidibi anajty iñaayb huingon ma Jesús ma je mesa co anajty y'adzoo'ajtcixy. Je huidibi nimay je' yHuindzin:

—Huindzin, ¿pin miich yi' xyciyegam ma yi mmidzip? ²¹Co Pedro iixy je jadügpi discípulo axam Jesús ypanicxyii, chi yminañ:

—Huindzin, e jadyaabi migüg, ¿ti yi' jadaanip?

²²Chi Jesús y'adzooy:

—Co ixipy ndzocyich co yi' huen jugy'aty ixti mabaad nhuimbityich, ca' miich xypaady mnejhuihuipy ti yi' jadam. Panicxcich miich.

²³Paady ycixp huinjihuiy je ymigügtijc ajcxy co je ymigüg huidibi Jesús ooy tzocy jihuüy ca' anajty y'öga'ñ. Per Jesús canan je' anajty jadu'n ytiyyp co ca' y'öga'ñ. Hue' anajty ti ymina'ñ janchtiy:

—Pen ndzojcypich ixipy co jada migüg yhui'mipy ixti mabaad nhuimbityich, ca' miich xypaady mnejhuihuipy ti yi' ytunamy.

²⁴Je' je' je Jesús ydiscípulo huidibi tiy'ajt yecp jadu'n nej Jesús ytuñ y'ayoy etz yjajty y'ayoy, e nañ yi' je' huidibi cojay nej Jesús ytuñ y'ayoy, yjajty y'ayoy. E iich ajt nejhuüyim co janch yi' je tiy'ajt huidibi ti yecy.

²⁵May ooy tijaty mij huinma'ñ Jesús jactuñ. Co ixipy yajcojaydäy tüg'óciy, ca' yi naaxhuñybi ixipy yhuaadüy miid maylibro tzachpidägiy. Jadu'n n'aa'ixiyich.